

大隐集

李正民

文硕阁

wenshuoge.com

目录

关于我们 3

提要 5

卷一 6

卷二 15

卷三 27

卷四 38

卷五 49

卷六 56

卷七 63

卷八 70

卷九 79

卷十 87

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部四

提要

大隐集十卷 别集类三【宋】

臣等谨案大隐集十卷宋李正民撰正民有已酉航海记已着录正民宋史无传事蹟始末不可考惟据航海记所述知其事高宗为中书舍人尝奉使通问隆佑太后而已今以集中诸表考之则在朝尝为给事中礼部吏部侍郎在外尝知吉州筠州洪州温州婺州淮寧府敷历颇久晚予告祠以归又考徐梦莘三朝北盟会编载绍兴十二年五月金元帅来书云汴梁留守孟庾陈州太守李正民及毕良史者比审议使萧毅等回具言江南尝询访此人今并委沿边官司发遣前去六月金人放东京留守孟庾知陈州李正民还云云是正民於知陈州时尝为金人所获以和议成得还集中南归诗所云沦身絕域久睽孤投老归来鬓髮疎者盖即其事特孟庾以东京附金归後高宗弃不复用而正民屡更任使终始弗替则其在金朝当犹未至於失节特史文阙畧不能得其详耳其集见於宋史艺文志者三十卷传本久佚惟嘉兴府志载其海月亭诗一首今据永乐大典所载掇拾编次厘为文六卷诗四卷中多中书制诰之作温润流丽颇近浮溪其诗亦妍秀可诵在南渡初犹不失为雅音焉乾隆四十六年九月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

大隐集卷一 宋 李正民 撰制

朱胜非观文殿大学士知洪州制

勅通班秘殿地冠禁严作牧大邦望隆屏翰匪我旧弼曷称茂恩具官德宇靖深材猷博敏懿文足以华国谠议足以济时徧历禁涂荐更政府适属省方之日进跻次辅之联遽解繁机易临近郡朕惟君臣相与之际既谅乃诚而进退曲全之间重违所请眷鍾陵之都会实江表之上游繫我宗工镇兹南服乃申前命庸便尔私噫廊庙葦年克保初终之节湖山千里允资绥抚之方母有遐心竚闻报政可

观文殿学士中太一宫使除右弼制

门下鸣玉曳履夙隆秘殿之班当轴处中尤慎西台之长眷惟旧德方领真祠宜锡命书还弼予治具官某风猷凝远器宇端方才周万务之原学贯六经之奥怀文抱质彬彬君子之儒效信纳忠蹇蹇王臣之节早腾令闻浸历要途惟中外之荐更嘉勲劳之备着言皆可绩每坚享上之诚知无不为确守致君之义旋跻华於清禁仍均逸於殊庭陪辅燕朝有献纳论思之益雍容琳馆适冲虚恬淡之游虽高难进之风殊郁具瞻之望朕方循名而责实稽古以建官耳目股肱增重庙堂之选左右前後肇新辅佐之联必惟其人久虚乃位往践厥服莫如汝谐勋相钧衡允赖訏谟之助典司机密聿观政事之修载示宠光庸昭体貌於戲尊德乐道王者所以立太平之基经体赞元贤人所以成可大之业茂摅其蕴永孚于休可

王棣赠资政殿学士制

勅志能之士因时而立功名封疆之臣守死而明节义既叹捐躯之易宜推恤典之隆具官出自相门跻于侍从智勇足以扞难恩惠足以抚民久领近邦适逢外寇力振孤军之气屡摧强敌之锋既甚於析骸食殆穷於掘鼠睢阳无援张巡之志不衰东郡久围臧洪之辞靡屈虽势穷而力尽终身殒而名存特升秘殿之华资俾视政涂之宠数用彰死节加贲泉扃式慰冥漠之知聿为忠义之劝可

顏岐资政殿学士宫祠制

勅朕忧勤庶政思济艰难进退大臣矜全体貌具官早以材望闻于搢绅徧更侍从之华进秉钧衡之重赞襄滋久裨益居多方隆注倚之怀遽有便安之请察其雅志盖亦重违加秘殿之

宠名领殊庭之馆御庸昭朕眷庶便尔私噫邦国多虞赖君子经纶之蕴燕闲自适蹈大雅明哲之方母有遐心对予休命可

范宗尹除参知政事制

勅朕履险阻艰难之会怀宗庙社稷之忧迫蹙侵陵曾无寧岁震荡播越靡有奠居思得豪英之材共济阽危之运具官某清明而博达简重而粹夷奥学贯于本元沈谋周于事物惟衆口易諛之日当诸儒射策之辰首发说言力扶颓俗逮寇难之遽作以直谅而见思擢置宪台遂跻諫省比召从於外服旋进长於中司慷慨济时之心密勿安邦之论屡观献纳灼见忠嘉宜峻陟於文阶俾参陪於政路天下之势如置器必审处於安危邦家之基在得贤每因人而轻重往服朕命其远乃猷可

张守翰林学士制

勅帝王有所号令前代议者谓其难能文章施於朝廷近世儒臣以为荣遇矧在险阻艰难之际欲图德意志虑之孚入直禁林必符雅望具官性资鲠亮材术周通奥学贯乎九流高文兼於衆体训词温厚允资西掖润色之工议论坚明更显南司纠弹之峻薛宣举措之当理真卿绳治如平时比恩解於宪纲乃力祈於外补朕惟尔久居台阁宜在朝廷俾参宗伯之官将典行台之政载念北门之遽夙传内相之称警蹕时巡文书云委方用兵如至德式求深谋密议之咨詢必下诏若奉天可使悍卒武夫之感涕力行尔学庸称朕恩可

刘洪道除直显谟阁制

勅国家承平日久州县之官非文法吏即书生也自外敌冯陵继以寇盗二千石而下颠沛失据莫能枝梧而元元之衆病矣此朕焦心劳思求慷慨之士为吾扞御以慰安斯民也尔奋身庠序早更任使青齐之郊实尔桑梓之地乃能纠率师徒抚寧三郡奏功来上朕用汝嘉峻陟文阶进直延阁益图来效庸称茂恩可

程昌?直显谟阁制

勅国家承平日久【至以慰安斯民也同前】尔智畧深茂材力强勉承淮蔡伤残之後而能拊循疲瘵缮修守备朕用嘉之乃俾进职二等以为尔劝昔汉世二千石有治理効辄增秩赐金以表宠之尔宜体朕意益懋尔庸尚有褒恩以须後效可

晁公为直显谟阁制

勅具官延阁寓直儒臣清选二千石有治理効辄畀以美名所以示劝也尔服勤文艺不坠家声承流海邦敏於从政来朝行在朕用汝嘉其繇中秘之严躡进文谟之直往钦朕命尚勉厥修可

胡寅直龙图阁观制

勅具官国家祥符中肇建延阁以奉祖宗谟训华榜昭揭拟古河图乃置学士待制等员以为缙绅劝誉处而资望未至者亦俾寓直其间迄今为五阁之冠其选任岂不美哉尔儒雅端亮跻于柱史乃以亲疾祈便奉养贴以峻职处之祠庭尔其益励忠孝之节以待异时之用尚其勉之可

王宾追复龙图阁学士制

勅赦过宥罪惠溥及於多方隐卒崇终礼夙优於近列乃眷论思之旧肆颁甄叙之恩具官学问深醇性资直谅事朕干戈之际备殫羈勒之劳粤自台端亟跻谏省进执中司之法旋更八座之聯献纳居多每尽心於啓沃忠诚自许浸忤意於贵权遂貽贝锦之伤往就祠庭之逸方思图任遽叹沦亡念沛泽之荐更矧嘉言之犹在俾复河图之职聿为窀穸之光恩典有加幽冥无憾缅惟精爽尚克钦承可

王朋约赠直龙图阁制

勅具官朕顷者省方淮甸移蹕江吴念斥堠之不明骇风尘之甚遽衣冠顿蹕倪耄震惊眷惟在服之臣不及巨川之济隕于非命朕甚伤之尔列职周行宣劳王事奄罹物故适丁斯时其进直於河图仍优加於恩典庶几冥漠尚克钦承可

刘晏直龙图阁制

勅具官比自外敌冯陵继以寇盗其能先登贾勇以挫其锋者鲜矣尔以忠力自奋纠率戎行阻隘鼓儻杀敌决胜乃俾进直河图以为尔劝是谓不次之赏矣其益思所以称之可

刘榕除直龙图阁制

勅济陰大邦也自敌国侵暴之後寇攘竞扰二千石能保其封疆亦已难矣尔顷以材猷往膺郡寄閱时滋久宣力居多乃俾进直河图以为劝传不云乎有功而见知则说矣尚勉之哉可

刘洪道直龙图阁制

勅朕惟海岱之区丝枲之利号为冠带衣履天下自顷羣盜相挺兵无寧岁田菜多荒呻吟未息其能攘却丑类以保斯民者可无褒劝之恩哉尔早膺任使总制东秦而能剿除鲸鲵抚绥疲瘵河图之直文阶之峻併以命尔式獎贤劳往服恩荣益登乃绩可

李擢徽猷阁待制制

勅朕惟祖宗圣神相继咸有谟训载在方册历代宝之藏于延阁又命儒学之士寓直其间以为咨访讨论之地其选任顾不美哉具官文辞之敏行义之良早被徵求荐跻华贯掖垣琐闥尝已践更属时艰危久辞着位宜还次对之选以备内朝之臣往即钦承无忘励翼可

何志同复待制制

勅朕绍履尊极康济艰难思得四海贤雋豪杰之士共图兴复庶臻嘉靖矧尝位禁从之臣岂宜置而不用哉具官问学淹该器质纯粹典领编摩之任优游礼乐之司遂进长於天官旋跻华於秘殿比从物议稍黜近班宜推起废之仁复还次对之选尚思励翼庸副眷怀可

康允之除徽猷阁待制制

勅国家肇建延阁以奉祖宗谟训翬飞跂翼遂在西清乃置学士待制等员以为搢绅誉处二千石有治理効辄畀以美名聯于法从所以示褒劝也具官其怀应务之材有御衆之略早更烦使克着能声比守寿阳屡摧强敌逮移镇於武林而能寓兵於农鼓作士气为战守备忠绩可嘉宜还次对之班增重名藩之寄夫膺文儒之选以论思献纳为先专方面之权以镇御抚绥为重益图来効庸称朕恩可

刘洪道除待制制

勅国家肇建延阁以奉祖宗谟训又置学士待制等员以为搢绅誉处二千石有治理効辄畀以美名所以示褒劝也具官智略深沈材猷敏达早膺显授总制东秦保全一方攘却勍敌宜升次对之秩增重连城之寄斯为高选其益懋哉可

商守拙待制制

勅延阁谟训所藏西清咨访之地靡劳心於文墨将次对於燕闲爰涣茂恩用优耆德具官处躬纯厚应务详明练达国章进跻廷尉释之议罪每见於持平陈宠献言务从於矜恕擢司宪部允赖老成乃引疾以陈辞欲就闲而去位朕法仁祖之寬厚举嘉佑之诏条献议颇殊於重轻着令未分於甲乙必资明习文法之士以定摩研编削之规虽遽去於朝廷宜勉留於祠馆往亲药石之辅少须符竹之行尚究乃心图称朕命可

范直方直秘阁参议官制

勅惟尔曾大父仲淹方未显时慨然已有忧天下之志晚更大任名重华夷辅政临戎咸有成绩深谋谏议人到于今称之尔渐摩余训克守家法服采朝列未究尔能乃俾夺情进直延阁参吾行营之议朕将观尔之材而试用之矣尚勉之哉毋忝朕命可

张上行直秘阁制

勅具官汉自宣帝综核名实二千石有治理効辄增秩赐金或爵至关内侯故汉世良吏於是
为盛称中兴焉尔顷以材猷往临郡寄兵既服於纪律民遂安于里闾冉駘妥安巴夔静谧俾
进直於延阁用旌表於尔劳思称朕恩益图来効可

胡考寧直秘阁制

勅具官中秘寓直清选也异时文学材能之士咸得庀职其间所以劝在列而起治功也尔倅
貳襄阳屡当寇敌踰年保守宣力惟多则汝之材能可见矣乃俾进直以为尔劝是曰优宠其
益懋哉可

贾惇诗直秘阁制

勅具官中秘图书之府朝廷以为清选异时文学材能之士咸得庀职其间所以劝在列而起
治功也尔倅貳淮邦克图固守因事献策忠义可嘉乃俾进直以为尔劝是曰优宠其益懋哉
可

陈国瑞直秘阁制

勅具官惟我太宗崇儒右文肇建秘阁奎壁之画昭回在上又命儒学之臣寓直其间以为咨
访讨论之地谅匪名人未易称选尔以材猷之敏将漕浙部锡对便殿敷纳可嘉进直中秘之
严增重皇华之寄往祇朕命益究乃心可

梁汝嘉直秘阁制

勅中秘寓直清选也异时文学材能之士咸得庀职其间所以劝在列而起治功也尔倅貳支
郡服采惟勤朕比因时巡再临瀾部供帐趣办民不告劳则尔之材能可见矣自顷貳车未尝
贴以秘职今以命尔是为优恩其尚知劝而勉哉可

向子汲直秘阁制

勅惟我太宗崇儒右文肇建秘阁奎壁之画昭回在上乃命儒学之臣寓直其间以为咨访讨
论之地自匪名人未易称选尔以材猷往膺郡寄踰年于此治効已彰宜增重於麾符俾进职
於中秘益思砥礪图称恩荣可

滕膺直秘阁制

勅国家承平日久州县之间非文法吏即书生也自外敌冯陵继以寇盗二千石部使者颠沛
失据莫能枝梧而元元之衆病矣此朕焦心劳思求慷慨之士以将使指而慰安斯民也尔智
略深茂材术强敏早繇州掾能御贼锋倅貳淮阳克着声绩自被皇华之选尤嘉宣力之勤进

直秘严以为尔宠宜体朕意勉迄尔庸尚有褒恩以须後効可

陈机直秘阁制

勅具官尔以艰难之时居郡守之任用能缮修备御审度事几奏牋详明达于行在察其忠贞朕用汝嘉进直中秘之严增重一邦之寄益图来效庸称朕恩可

赵不羣直秘阁制

勅具官中秘寓直清选也异时文学材能之士咸得庀职其间所以劝在列而起治功也尔顷以邑令能御强敌擢贰郡政宣力尤勤比涉鲸波朝于行在论事中理朕甚嘉之乃俾升华延阁侔于近郡是为优宠其益懋哉可

万格监察御史制

勅具官御史府朝廷纪纲所寄自分建六察以督文昌诸曹之政事凡有稽违皆得纠而治之于是抨弹之職益为雄峻尔刚介不屈儒学自将黉舍郎曹誉处休显宜易冰厅之简往践霜台之严尔其澄肃官僚振举法度斯为称职尚勉之哉可

杨 礼监察御史制

勅国家自元丰中始正御史之职以分察文昌六曹之政事视唐推弹公廨杂事之制为加详矣于是枢机周密品式备具上下相维莫有苟且之意迄于今而遵用之宜择其人俾修厥职尔议论平正经术深醇兹用擢置台属以司纠察之事传不云乎人有所不为然後可以有为朕观汝之靖共守道不求合于当世之人今或可以有为矣尚其勉哉可

沈与求殿中侍御史制

勅御史府朝廷纲纪之地台纲正则朝廷治朝廷治则天下理故选用寮属必得实材尔问学多通议论持正比自师儒之官锡对便殿嘉尔敷纳擢置抨弹乃能遇事慨然无所枉挠旋更郎署未究尔长其执法於殿中以纠绳於列位尔其毋畏拂指毋憚当权知无不言以广朕耳目之寄斯为称职尚勉之哉可

赵鼎侍御史制

勅宪府职在纠弹台端号为雄剧维持政体督察官邪儆正色而立朝可不绳而自肃尔材猷敏达议论坚明尝赋命於使华旋记功於选部顷繇谏省执法殿中不为义疚而利回岂以刚吐而柔茹抨弹既允裨益居多其升横榻之严进贰中司之峻惟尔之任职者见於已试而朕之用尔者盖以叙迂益奋厥忠奚俟多训可

胡寅富直柔左右史制

勅左右置史言动必书自艰难以来或废典籍而不录然春秋之义当系日月而无遗若时记注之臣思得誉髦之士兹以尔寅湖湘之秀直谅多闻以尔直柔名臣之孙儒雅蕴藉宜并司于国志以对侍于螭坳往修厥官无忝朕命可

赵鼎除御史中丞制

勅昔谏议大夫郑昌有言山有猛兽藜藿为之不采是以汲黯在朝淮南寝谋干木处魏诸侯息兵矧居纲纪之地持纠弹之权为吾中执法者乎诚得人而任之则精神折冲有见於朝廷之上矣具官操行直方志气刚大既洁身而无党每论事而不回自总杂端风节甚峻属中司之虚位顾横榻之久专宜进长於南台俾澄肃於在列真卿之当至德绳治不异於平时孔纬之在凤翔造朝独先於百辟勿以扰攘而废厥职思於艰难而尽其忠往体训言期予治可

汪藻给事中制

勅黄门列职均为侍从之臣东省设官乃专论駁之任择人而授历代攸艰虽官曹沿革之制不同而政令书读之事则一匪时髦杰弗以次迁具官某襟度粹夷性资端亮夙蕴贯穿淹该之学发为经奇伟丽之文荐长赞书动无滞思简严而蔚仲舒最得於古风纯厚而明元稹遂变於时体虽称办事允谓贤劳宜进陟於琐闥俾更直於螭禁当官不挠尚观批勅之言论事必行更効回天之力益坚尔守庸称朕恩可

胡安国除给事中制

勅朕惟祖宗时中书门下合而为一而封駁之官实在银台不废厥职肆朕纂服属时艰难爰举旧章务从简易封駁之任必惟其人具官某以文学甲儒科以德行着闾里嘉言说议显于朝廷朕方康济阽危寤寐贤俊宜为朕起复还还聯尔其守乃节修乃职举凡诏勅有未善除授有不当悉论而駁正之勿使批敕之名独专於前世尚勉之哉可

周望给事中制

勅【上词同】具官某操履清修志气刚大顷求人而将命乃徇义以请行遂旌尔劳寢陟华贵比戎车之及境复抗节以出疆輶传载驰能达国命孔子不云乎行已有耻使於四方不辱君命可谓士矣尔其守乃节修乃职凡诏勅有未善除授有不当悉抗论而駁正之勿使批勅之名独专於前世则於尔为无愧矣尚勉之哉可

谢克家兵部尚书制

勅文昌分理万务武部实掌五兵自国家复董正之聯视前代有因革之异军政归於枢府右

选揔於天官品秩高华文书清简匪时贤德曷称褒迁具官材度宏深性资忠厚殖学造古人之蕴摛辞追作者之英早师表於儒宫遂翱翔於谏省文章尔雅入更四禁之游悃悞无华出载列城之誉久辞着位想见仪型比锡对於便朝实副怀於虚伋宜陟中兵之长进聯八座之崇时属多虞朝方尚武虽军旅征伐必资庙算之奇而献纳论思允赖辰猷之告益殫忠荃图济艰难可

曾榘礼部尚书制

勅文昌兼總六聯宗伯实典三礼祷祠祭祀之事既系於司存学校选举之文悉掌其政令比属干戈之扰靡闻典籍之传必求其人俾领厥事具官风猷庄重德宇粹温学该六艺之醇文擅四科之美早驰声於庠序旋任职於词垣浸升延阁之班出奉名藩之寄朕遭罹变故躬总师徒既垂橐於尔邦遂驻蹕於近甸首修朝贡深叹忠勤念久去於周行适来还於翰苑宜陟春官之长进聯八座之崇时属多虞朝方右武军旅以同邦国亦惟尔职之修方岳以朝诸侯更讲时巡之制益殫忠荃图济艰难可

郑望之吏部侍郎制

勅唐制右列三铨掌於武部本朝肇分四选揔於天官方时多虞尤号难治惟品流之龐杂员患其多矧典籍之散亡吏得以肆欲司厥事必惟其人具官某识虑精明材猷敏济顷郎曹之分职正戎马之在郊奋身请行抗节而出遂陟近班之峻以昭信誓之劳旋徇公言乃从远适兹召还於着位将協济於事功俾参常伯之聯专掌武阶之衆尔其纠摘真伪审核条章人无滯留之嗟吏絕欺罔之弊斯为称职尚勉之哉可

刘珏吏部侍郎制

勅天官之选吏员猥衆簿书丛杂在承平时号为难治顷自巡幸浙右典籍多为煨烬凡在选之士自一命而上功罪履历之实漫不可考自非精明吏治而习知其事者孰能胜斯任哉具官识度详明政事练达居怀忧国之虑荐贡救时之言顷貳选曹金谓平允分符出守曾未淹时宜还法从之聯复典中铨之寄尔其区别贤良纠正隐慝使吏无得并缘为奸时乃之休是为称职可

叶份户部侍郎制

勅国家之务用度为急祖宗循五代之制总於三司元丰复六官之聯归於户部比缘多故稍革旧章兵食所资费出弥广典领厥事实难其人具官某智畧疏通材资敏达荐更事任綽着能称纠察省纲总临漕运朕方时巡江左式遏寇攘眷兹百万之师奚止千金之费资尔心画以饷五军擢参法从之班往貳地官之任尔其裁制盈虚斡旋多寡使朕有足食足兵之信兹为称职尚勉之哉可

李迢除户部侍郎制

勅文昌政事之本源民部财赋之管辖兼周官司徒司会之职总唐室度支盐铁之权于时列曹号为剧任欲贰厥事每难其人具官某智术周通材资夙给服劳郎署已观心计之良列属宰庭克着声猷之美干戈未定调度方烦全师驻于会稽馈饷资于左户俾陟贰卿之峻往图经费之充士饱而嬉无乏千金之用师直为壮伫收三捷之勲尚悉乃心期称朕命可

黄檠兵部侍郎制

勅国家自祖宗以来聚天下之兵於京师尺籍伍符付之列将牙璋虎节秘在枢庭夏官所掌特其名与数而已厥今国步方艰外患未弭五兵之寄视承平为重畴咨庶位我得其人具官风力敏强性资超迈试之选部而铨总平允列于宰属而纠察严明遂进直於河图俾按临於蜀道惜其远去宜为朕留擢居法从之联进参帷幄之议朕方时巡江左式遏寇攘资尔谋猷济予经画尚恢远略庸报异恩可

陈邦光除刑部侍郎制

勅文昌六卿之贰品秩惟均宪部三典是司条章滋衆矧在险阻艰难之际凡居论思献纳之联思协公言必图夙望具官某论辩閎博问学淹通文足以广国华材足以通世务望之射策早擢於科甲主父奏书尝嗟於晚见遂陟西垣之峻旋临南夏之雄无施不宜所居可纪向召从於远服趣来还於近班逮此造朝允符前席宜辍司於国用俾總猷於邦刑傳古义以决疑其克修於尔职有嘉猷则入告尚益究於乃心济时多艰对予休命可

郑望之工部侍郎制

勅文昌为万化之源水部掌百工之事虽缮修营造在巡幸之日有不暇为而献纳论思凡侍从之臣悉资辰告肆颁明命褒进还僚具官某知术疏通材猷敏达荐更事任綽着能称当敌骑之济河以单车而出使遂修隣好峻陟近班逮信誓之载渝徇公言而远适朕方时巡江左式遏寇攘思得豪俊之人共济艰难之运尔顷缘使事能察敌情宜还持橐之联俾赞筹帷之密济予经画赖尔谋猷往称茂恩尚恢远御可

卷二

钦定四库全书

大隐集卷二 宋 李正民 撰制

郑士彦除吏部员外郎制

勅天官之选吏员猥衆簿书丛杂在承平时号称难治自扰攘以来人怀欺诞吏缘为奸必得明敏之士以为其属尔材猷之美列职奉常进擢郎曹俾赞铨综是为高选其益懋哉可

张纲吏部员外郎制

勅文昌六联兼总万务而诸曹郎吏分职其间虽繁简不同其选任则均也尔早以经术名冠多士书林省户皆所践更往佐天官俾司小选亟祗尔事嗣有褒陞可

上官愔吏部员外郎制

勅吏部在南宫为眉目於选士为司命自国朝以来非名士不以居之比因典籍弗存而议者喜出新意因事立文承用多駁吏缘为奸不可胜诛非得儒学之士通於世务者孰能举其职哉尔文雅决科达於吏治学宫策府皆所践更往佐天官俾司小选汝其检吏而勿纵守法而勿拘使文书无滞留而铨综平则予汝嘉尚有褒宠可

张宗元工部员外郎制

勅具官朕比遣枢臣往将使指命尔由奉常之属掌其幕府文书之事乃能纠合士马张其军声用酬宣力之勤俾陟郎曹之秩是为高选其益懋哉可

沈与求兵部员外郎制

勅具官汉以尚书为中台御史为宪台二者地望略等自唐以来南省为重国朝以台察省虽任职不同其选则均也尔以儒学之美列属推弹议论慨然风采振起为郎武部其职甚清往祗厥官嗣有褒陞可

韩裕兵部员外郎制

勅具官朕观春秋之际列国公卿大夫之子孙咸以材能表见於世朕甚嘉之尔名臣之後儒

雅自将学以从政有如寒士擢居郎属用显尔长往祇厥官嗣有褒宠可

潘因刑部员外郎制

勅昔路温舒患治狱之吏以刻为明以为奏当之成虽咎繇听之为死有余辜何则成链者衆文致之罪明也今朕设宪部之官以掌天下之奏讞务从寛恕又以尔明察俾为之属其深惟前载之言以广吾好生之德则予汝嘉可

惠柔民礼部万格祠部并员外郎制

勅某官等文昌之政兼总治官宗伯之聯特为清选掌南宫之章奏举祀典之礼文列属其间必求名士尔等由庠序进以儒学称宜参郎位之华往佐春官之长各恭尔事勿替厥勤可

成大亨祠部员外郎制

勅文昌六聯分理万务诸曹郎吏列属其间虽烦简不同而选任均也尔以材猷早居宪部出临漕计宣力惟多还陟祠曹素号清选往修尔职其益懋哉可

王禹得礼部员外郎制

勅具官宗伯之属掌礼文表奏之事号为南宫舍人自非名流不在其选尔儒学操履见称于时不伎不求恬於进取其升华於郎位俾列职於春官益励厥修嗣有褒宠可

王?驾部员外郎制

勅具官文昌六聯分理万务自顷裁损溢员而郎选重矣尔以强学待问名冠多士书林省户皆所践更誉处既休器业弥茂惟輿辇车乘之政属於武部职清而事简亦儒者之所宜居也今以命尔往其懋哉可

韩古都官员外郎制

勅都官之名尚矣在汉为司隶校尉之属纠中都官不法事自後凡盜賊臧获部曲俘囚之事悉掌之于今为刑曹之聯而职事视前世则简矣尔以材猷荐更任使其升华於郎位俾列属於秋官往既乃心嗣有褒陟可

张闇等并诸曹员外郎制

勅张闇等文昌天府衆务泉藪内外折衷远近稟仰而诸曹郎吏分职其间虽烦简不同其选任则均也尔等或以儒学进或以才能显誉处之美有闻于时并趋丹地之严往佐列曹之长

各恭尔事勿怠厥修可

韩肖胄左司员外郎制

勅具官昔唐太宗谓房元龄曰公为仆射当广访贤材比闻闾讼牒日数百岂暇求人哉因敕细务属左右丞大政乃关仆射今朕当艰难之时方以战守大策责成宰辅而左司郎官乃冢司之属也凡文昌细务宜悉以付之则选任之意视平时为加重矣以尔名臣之孙践更省府老成练达裁割详明是用命尔以尚书左司之事尔其弥纶省闕纠正纪纲使大臣不劳而庶事皆理时乃之休嗣有褒陟可

张公济除右司员外郎制

勅具官国家元丰中肇建文昌以六曹分总天下之事而提纲提领实在都司必得明敏之士乃堪其选尔以儒雅缘饰吏事练达世务金谓老成久参郎位之华既预列卿之贰比持使节士誉益孚其跻省闕之严以参宰士之列是为遴柬尚勉之哉可

李承造右司员外郎制

勅【上词同】以尔名臣之孙闻见殚洽忠义之气勇於敢为是用命尔以尚书右司之事【下词同】可

管思可度支员外郎制

勅地官之职素号繁冗自顷裁损滥员而太府司农出纳之数悉隶其间期会簿书视前日尤剧为之属者可不遴其选哉尔枢臣之後材謂有闻久服官常所临必最宜还郎位总核邦财其既乃心毋乏吾用可

韩球度支员外郎制

勅具官古人有言曰千里馈粮士有饥色樵苏後?师不宿饱今朕命相臣提重兵以镇抚建康又分遣大将戍守旁郡凡馈饷所须者博矣乃留掌计之臣专领供亿之务有请于朝以汝为属兹命起之庠次列于郎曹所以因尔之能而济事功也其悉乃心往佐而长可

黄龟年除仓部员外郎制

勅具官古人有言曰虽有金城汤池带甲百万无粟不能守也故用兵行师馈饷为急尔早以选擢尝赞铨衡材智之优宜膺任使载加召对敷奏可观司庾民曹是为剧任往修厥职嗣有褒陞可

程迈除太常少卿制

勅具官某奉常职典天地任兼礼乐凡历代之沿革本朝之典故皆当深思而熟讲之以参酌情文述作之本旨自非博习之士通于古今者孰能任之尔以儒学决科以文雅饰吏荐更剧任继历要涂比自螭坳复持使节宣劳于外亦既閱时兹用召还俾居秩宗之任斯为清选尚勉之哉可

陈戡太常少卿制

勅具官某昔齐仲孙湫适鲁犹秉周礼知其未可动也朕当艰难之际未尝不谨于礼故比虽裁损溢员九卿之列皆罢而太常之官独存焉岂非隆礼而重本哉尔儒雅自将操行无玷台僚省户皆所践更其贰奉常以掌郊庙朝廷礼仪之事虞舜命九官于伯夷作秩宗曰夙夜惟寅直哉惟清盖不如是不足以交神人也往祇尔职尚勉厥修可

柳约太常少卿制

勅记有之班朝治军涖官行法非礼威严不行盖礼虽治定而後制然治军之间亦不可废也朕遭时艰难讲古巡狩而宗庙朝廷征伐军旅之事凡系于礼文者非一则率属以任其职者可无其人哉具官某性资开敏学术深醇早励猷为践更台阁比参议于军事遽书警奏殆无虚日虽遇盘根错节迎刃而解朕用汝嘉肆命汝进贰于奉常以司赞导朕将观汝之材而试用之矣昔祭遵为将虽在军旅不忘俎豆矧汝以礼为职乎往祇厥官无忝朕之明命可

程迈除检正制

勅具官中书门下机要之司给事中舍人皆为其属然列於从官各有职守纠驳讽议莫非朝廷大务至文墨细故参酌典法督责稽违者又不可以无其人此朕设检正以察诸房之事也尔儒学之美吏治之明有称於时见於已试践更中外再至九卿兹用仍其旧职处之宰属是为高选其益懋哉可

周顥检正制

勅具官朕循祖宗之法中书门下合而为一所以省文书而壹统类也又命设官以纠察诸房之事如古掾属列于公府庶使大臣不劳心於细故而专意於机务之大者非夫明敏练达孰宜任此哉尔儒学之美政事之能有称於时见於已试其由铨选之任俾赞机要之司往其钦哉毋忝休命可

綦崇礼除中书舍人制

勅西台出令之原内史赞书之任自昔独存于三字专号词臣于今分押于六曹兼总吏事择

人而授得士为难宣教郎试起居郎綦某学富本元文兼体要既殫洽于闻见亦明习于宪章省户握兰恬而自适螭坳载笔动而必书比给札于尚方俾试言于右省落笔而观者如堵共惊倚马之材终篇而纸价顿高深得演纶之体肆扬成命进陟从班时方属于艰难朕急图于贤俊修饰润色允资播告之辞献纳论思更伫尽规之益往祇朕训无怠厥修可

李釜中书舍人制

勅政事总于西台诏令掌之内史赏罚黜陟之柄既得以与闻讨论润色之辞必资于行远每难是选必得其人具官经术邃深文词敏妙儒科发策早居多士之先选部为郎固已历年之久比列曲台之贰浸跻柱史之聯自密侍于轩墀尝赞为于名命宜起祠庭之逸进参法从之华时方属于艰难朕急图于英俊致治以得贤为本当益励于尔猷鼓衆以出命为先其不匿于朕指往服予训亟修厥官可

李公彦中书舍人制

勅西台出令之原内史赞书之任自昔独存于三字专号词臣于今分押于六曹兼总吏事择人而授得士为难具官学富本元文兼体要驰声场屋早冠上游试艺词科复居前列遂预道山校讐之职纵观策府奇异之书滋博洽于见闻益沈涵于器业比还着位再贰奉常命给札于尚方俾试言於右省肆扬成命进陟近班时方属于艰难朕急图于贤俊修饰润色允资播告之辞献纳论思更伫尽规之益往祇朕训无怠厥修可

洪拟起居郎制

勅具官某昔孔子作春秋於隱桓之际则彰於哀定之间则微辞虽不同然记事之文不可废也朕惟艰难以来史失其职而着作之庭俄空焉撰述之官非左右记注将孰任其事乎尔儒术资深议论持正横经学省师表克修执法台端风节甚峻践扬之久誉处弥高兹既御於祥琴宜即还於朝着尔其载笔轩陛言动悉书无旷厥官使论次者有考焉可

刘范起居舍人制

勅具官朕惟古之王者世有史官君举必书所以慎言行昭法式也左史记言右史记事帝王靡不同之顷自艰难以来典籍或废而不录矧官弗备员将孰举其职乎尔学问通博质性淳厚尝冠多士老於郎潜退处祠庭安恬自得宜还朝序入侍螭坳尔其秉笔而书言动悉载斯为称职尚勉之哉可

董道徽猷阁待制与郡制

勅入持从橐出领藩符惟时还臣宜膺异数具官某博学而多识殫见而洽闻诵甘泉之遗仪如指诸掌记南宫之故事不忘於心早擢秀於士林遂飞英於儒館荐更郡寄复叹郎潜浸陟

九卿之聯乃躋二史之列遽以疾谗丐于外迁宜升次对之班俾遂偃藩之逸往祇朕命勿替厥修可

汤东野徽猷阁直学士知平江府制

勅分职六卿盖重朝廷之体承流千里式隆屏翰之权惟内外之势既殊则名位之实必称方膺委寄宜涣宠章具官某器局靖深材资敏劭果艺以达得孔堂从政之方经术而文继汉儒饰吏之美荐更事任藹着声猷眷兹吴门乃尔旧治顷缘移躋之务实繫先置之行颖川愿借于寇恂西河欢迎于郭汲俾即贰卿之秩仍紆太守之章属议臣之有陈稽旧典而或戾谓开创於近比非增崇于本朝宜更延阁之班专布名藩之政矧吏民素遵于条教而关梁方谨于谁何尚悉乃心益观来效可

王循友知建康府制

控江山之都会望莫重于陪京抚民卒之浩繁治必资于良牧非声猷之素懋曷宠寄之兼隆以尔雅亮不羣威寬有济夙播儒绅之誉荐更省闕之华司列东铨尝羽仪於禁路承流北固方屏翰于名邦嘉善政之流闻宜雄藩之就陟任兼留钥尔典其严地有宿兵尔为之重懋乃藩宣之绩体予眷倚之优可

陈邦光移知建康府制

勅朕省方侯甸移躋近邦惟置器之未安念囊弓之无日分屯师旅控扼襟喉爰求侍从之良俾任藩宣之寄具官某谋议深博材资雋明早润色于西台旋镇临于南服比朝行在进陟贰卿辍从荷橐之近班付以朱方之巨屏惟时建业实古名都据吴会之要冲命相臣而留抚资尔术畧修彼戎兵宜析左符就更重镇能通世务儒者虽乐于有为思济时危人臣固难于择事图称朕命益既乃心可

凌唐佐升职知应天府制

勅睢阳要冲宋台都会实艺祖兴王之地乃朕躬纂服之邦爰择守臣式隆委寄尔材猷之美风力之强将命王畿声绩懋着其升华于延阁俾司钥於留都尔其绥抚疲民缮修守备思固吾圉以观尔成可

李邴知平江府制

勅浙部奥区苏台重镇当三江五湖之会多强宗大姓之家民俗阜蕃食货滋殖乃眷藩垣之任必资心膂之臣爰涣茂恩式隆委寄具官某智周而材贍学博而闻多愷悌足以临民忠嘉足以谋国徧仪禁路殚论思献纳之诚入赞政涂有同寅协恭之德比辞机务均逸祠庭念王室多事之秋正大臣宣劳之日矧吴门之名郡欲师帅之得人畴咨于朝肆以命尔朕心朕德

夙惟左右之亲有社有民宜布朝廷之惠抚循良善摧抑豪强尚既乃心图称朕命可

胡舜陟知建康府制

勅昔汉高守关中光武保河内皆深根固本以制天下朕念中原云扰未有旋旆之日惟建康实古帝王所宅又为仁祖兴王之国符朕躬潜邸之名形胜具存亦今日之关河也付之守帅可不遴其选哉具官某智畧辐凑材资儒明事不辞难勇於为义载惟是邦乃江左要地是用命尔以二千石之重为朕守焉尔其修扞御之备励水陆之师以保长江天堑之险无令敌人侵軼而已勉迄尔庸图称朕命可

叶焕待制知镇江府制

勅价藩共理允资师帅之良延阁通班尤高次对之选矧方思於固守宜增重於近邦将图尔庸肆颁朕命具官某性资爽迈风力强明荐更藩翰之符雅着循良之誉官所居而可纪材无施而不宜比辍漕权往分郡寄朕念朱方之巨屏实居京口之要津宜升迹聯式隆雅望壅门曲格尚存铁瓮之高墉战舰艨艟更讲水犀之长技往服厥事益既乃心可

陈邦光知镇江府制

勅设官分职文昌为政事之源宣化承流刺史居吏民之表眷予近列方造明廷宜膺柬求式分委寄具官某风猷英迈智畧深通彬彬徐干之文纚纚马周之论早被非常之遇骤更不次之迁荐析州符屡踰岁纪逮来朝於行在俾进陟于贰卿念当戎辂之戒涂尤重朱方之近屏地隆京口城迫江津惟武备之未修顾帅臣之屡易与其持橐簪笔参兹侍从之班孰若缮甲治兵固我封疆之守跻华延阁作镇大邦允资材术之长实出眷怀之厚伫观来效庸称茂恩可

胡唐老知镇江府制

勅朕省方侯甸移蹕近邦惟置器之未安念橐弓之无日分屯师旅控扼襟喉爰求侍从之良俾任藩宣之寄具官某材猷敏劭识虑精深早更台阁之华继奉麾符之守荡平逋寇荐奏肤功遂进陟于近班仍易临于重镇属枢臣之将命顾幕府之须材载念朱方夙称京口适严武备已驻大将之鼓旗遴柬帅臣俾总连城之节制允繁术畧协济事功尚悉乃心图称朕命可

汤东野除待制依旧知平江府制

勅朕躬履至尊遭时多故师徒沸扰宫闱震惊非赖股肱心膂之臣与夫藩垣屏翰之寄提兵入卫扶义抗章孰能协济而戡斯难哉具官某夙蕴智谋素怀节义使华将命风力着闻郡国承流教条孚信比属勤王之举载嘉宣力之劳尽瘁赴功竭忠卫社宜进从班於延阁复仍旧治於苏台用昭庆典之行聿为有功之劝可

李贵遥郡刺史制

勅具官朕命枢筦之臣提兵扞敌军功爵赏皆决於外不从中御也剡章来上谓尔尝有战多之绩而恩典未称是用命尔以遥刺之秩以为懋功之劝朕惟尔方执干戈备戎行而强敌之侵暴未已汝立功名取富贵之日也畴昔之劳赏既厚矣方来之効尔其图之可

薛庆武功大夫忠州刺史制

勅上游之地素号繁庶比经外寇民物凋残而吏或拘於文法不能为战守之方尔乃纠率兵民缮修备御措画有绪忠义可嘉其峻陟於武阶仍遥分於郡刺并以命尔是为优恩尚既乃心益图来效可

刘洪道知明州制

勅朕惟四明奥区西限重江东奄左海在承平之时号为无事比因外敌冯陵移蹕於此事丛人衆供亿萧然非有文武智术者不足以胜守臣之职也具官躬应务之材怀御衆之畧顷守东秦屡摧强敌提兵远涉纪律甚明山涛暗合孙吴之言充国习知夷虜之事今干戈未定州县多虞尔其式遏寇虐惠绥黎元固城守明斥堠以制胜於未形则所赖以安者非特尔一邦而已可不勉哉

程迈集英殿修撰知福州制

勅具官福在东南为一都会俗兼瓯粤之旧地有山谿之险师帅之任岂不慎选哉尔以儒术之美政事之材中外践更誉处休显比持使节往按列城宜躋论譔之华资俾任藩宣之重寄外敌侵迫南土震惊其修扞御之方布抚绥之政庶臻嘉靖式宽顾忧可

权邦彦起复依旧知江州制

勅移孝为忠乃尽人臣之节断恩以义盍先戎事之忧我图共理之良式举夺情之典具官材为世用仕以学优智名得之勇功文事兼其武备早更华序旋镇边陲既委贄以造朝实毁家而殉国方赖干城之略遽兴陟岵之悲朕惟墨以临戎晋侯能达礼之变經而从政闵子得事君之宜俾节抑於苴麻亟亲临於金革允资千里之寄靡待十旬之淹王事不以家辞鲁史着为明训长吏难以忧去汉法载其旧章勉迄尔庸思称朕命可

曲端知渭州制

勅陕右奥区平凉古郡统制夷落表里关河宜得爪牙之臣往任藩垣之寄具官材资宏毅智略深沈学通玉帐之奇气稟金方之劲早共武服屡积战功比统率於西师以缉绥於陕服朕念关中之险固实为天下之本根士马精强歌謠慷慨稍失藩篱之守半为虵豕之场宜纠合

於隣邦力恢復於列郡自頃連帥之職靡親行陣之臨方時多虞豈遑自逸凡今警急之報尚何文法之拘援桴鼓以徂征冀旌旗之改色永清全雍以濟我師其益勵於壯猷用欽承於遠御可

趙令?起復黃州制

勅具官列城共理國之藩垣要經從宜理有權變方遭時之右武斯以義而斷恩爾頃執親喪乃辭王事顧黃陂之支郡亦淮右之要津欲扞侵凌當圖備豫宜服晉侯之墨往分漢守之符勉修厥官思固吾圉可

又直龍圖依前知黃州制

勅具官昔唐天寶之際張巡許遠守睢陽身殞而名傳薛愿守淮陽城全而事不顯杜牧乃有良臣不如忠臣之論頃自抗攘以來敵國內侵寇盜充斥二千石能保其城郭者鮮矣爾以宗室子任符竹之寄忠勇自奮備御有方身被重傷誓以固守保全城壘民賴以安乃俾進直河圖以為爾寵所以勸良臣也尚勉之哉聿觀後效可

晁公為直秘閣知台州制

勅朕惟東粵之壤民物康阜凡在守臣尤加遴擇爾雍容文雅嘗處甚休進直中秘之嚴往莅名邦之寄有民有社尚勉之哉可

謝克家徽猷閣學士知泉州制

勅設官分職文昌為政事之原宣化承流刺史乃吏民之表匪時賢德曷稱選抡具官造道深醇秉心端亮既孜孜而奉國每惓惓而納忠上庠居師儒之官西省聯諫諍之列遂徧更於華要旋出殿於藩垣召自南邦進躋八座方資辰告乃以疾辭升延閣之崇資鎮溫陵之巨屏宣揚惠澤撫字遠民尚既爾心圖稱朕命可

宋彥通待制知筠州制

勅承平之世朝廷尊榮人樂仕進則所重在內多事之日州郡閑暇人思遠去則所重在外昔人或起登仙之羨或恨得地之晚也具官材資敏達識慮精深列職郎曹聲猷克茂司刑卿寺讞議惟明奉使節而出疆屬戎車之在境能達國命式邁其歸俾仍延閣之班往莅一邦之寄爾其布宣惠澤撫字遠民無以暇逸自居是為稱職可

李邕待制知越州制

勅【上詞同】具官材猷敏達識慮精深素懷忠義之心習知邊鄙之事宣和之季亭堠弛嚴

方万骑之济河以单车而出境未明信誓复应诏音慨然请行载驰使传能达国命式遄其归俾仍延阁之班往莅大邦之寄广宣惠泽镇抚列城无以暇逸自居是为称职可

商守拙知筠州制

勅次对西清持从臣之橐承流列郡分刺史之符爰眷贤劳肆颁朕命具官禔身无咎秉德有常既砥砺於材猷亦明习於文法比繇廷尉进贰秋官属就领於真祠俾刊修於挈令力祈外补盖亦重违其綰郡章俾从尔志宣布朝廷之惠往安闾里之民可

许中知桂州制

勅具官桂林大邦湘南都会师帅之任尤难其人尔博涉艺文通达吏治校雠儒馆多所见闻践历郎曹已称强敏兹承流於江表乃闻问於朝廷其升延阁之华资俾镇南荒之巨屏自昔夷獠之俗每患於难安惟时方面之臣必先於无扰服我明训往其钦哉可

林通待制知福州制

勅东瓯故区福唐都会旁连百粤兼总七闽在治安之时镇临为重当扰攘之际抚驭尤难宜择近臣往分委寄具官材猷通敏学术淹该以文章成名居多杰思用儒雅饰吏藹着能声比殫润色之劳愿就词廷之选朕念南方之巨屏荐更赤子之弄兵溪山阻深民俗剽悍思得贤守安而治之惟尔久在里闾身习知其情伪尝持使节下亦服其教条宜剖左符往谕朕指尚图来效庸称朕恩可

柳约直龙图阁知吉州制

勅朕惟吴越之壤民物阜蕃凡在守臣尤加遴选尔儒学吏能见称於世践更台省贰于奉常乃俾直河图付以郡寄朕择人共理之意厚矣其茂承之可

范致虚知鼎州制

朕惟式遏寇虐康济艰难当馈兴嗟岂必借贤於异代若古有训亦惟图任於旧人眷兹师帅重权宜畀庙堂夙望尔智博而材赡文丽而学优守节不渝尝闻汲黯之好直因时或异遂见徐公之有常协赞机衡斯谋必告荐临方面靡劳弗宣兹趣召於选阙俾来朝於行在德与年而弥劭志虽穷而益坚还秘殿之华资以彰体貌领殊庭之馆御庸便咨询乃慷慨以有陈愿驰驱而自効惟荆楚之奥壤实夷獠之与邻方赖老成重烦镇抚杜诗在外乃心不忘乎朝廷申伯于蕃王室允资其屏翰往祇朕命尚远乃猷可

李釜待制知筠州制

勅次对西清持从臣之橐承流列郡分刺史之符谅匪时髦曷膺宠数具官文兼体要学富本原早居多士之先寢为当世之用惟践馱而滋久顾誉处以弥休比擢置于西垣俾典司于外制而乃固形辞避至於再三其班延阁之华往莅名邦之寄宣扬惠泽抚字远民尚悉乃心图称朕命可

季陵复待制知温州制

勅朕惟浙东之壤民物阜康凡在守臣尤加遴择具官文辞典丽经术深醇早奋励於材猷久践更於台阁守官柱史夙推载笔之辞书命掖垣深得代言之体眷永嘉之支郡实负海之名邦时属多虞允为寄重宜还次对之秩往奉藩宣之行尔其扞御侵袭消弭盗贼俾尔四封之内自臻比屋之安尚悉乃心图称朕命可

董道知信州制

勅次对西清持从臣之橐承流列郡分刺史之符谅匪时髦孰膺宠数具官材猷博敏学问淹该出典藩垣惠昭民誉入更省寺望着朝端宜陟近班俾膺郡寄往继循良之治广宣德意之孚可

连南夫知饶州制

勅名藩巨镇在全盛之日并列於方维通邑大郡自艰难以来半罹於兵革凡兹易地而处必曰度时之宜靡有重轻式均委寄具官风猷凝粹学术深醇早擢殊科遂跻儒馆逮专对於絕域旋聯华於从班出守淮邦间里有安居之适奉迎戎辂储峙无告乏之忧载念尔劳易临便郡朕惟黄霸之治称於颍川公绰之材优於赵魏往祇休命益究尔能可

刘洪道知楚州制

勅朕惟敌国内侵兵无寧岁寇攘竞扰民靡奠居念齐鲁之邦已悉罹於涂炭惟淮楚之壤当益固於藩篱爰得能臣俾膺郡寄具官猷为敏达学术详明早践儒林寢跻郎选向结倚庐之戚适当戎事之兴乃析左符俾守尔土智足摧夫强敌材堪制夫劲兵方属盛秋就分近屏眷兹望郡俯控长川是谓可为之时矧曰必争之地淮甸既倚之为轻重江吴亦视之以安危尚悉乃心思固吾圉可

张汝舟除直显谟阁依旧知明州制

勅具官国家肇建延阁以奉祖宗谟训翬飞跂翼列于西清乃俾搢绅之士寓直其间以为儒者之高选部使者二千石有治理効辄畀以美名所以示劝也尔儒学吏事有称于时顷自台僚出分符竹鄞江之政亦及暮年治行有闻办事不扰进跻华职用獎尔劳增秩赐金无愧於古盍思报称尚勉之哉可

<集部,别集类,南宋建炎至德佑,大隐集>

卷三

钦定四库全书

大隐集卷三 宋 李正民 撰

制

刘珣权知三省枢密院使制

勅朕遭时艰难法古巡狩念长乐六宫之衆必安处于善邦惟百司庶府之繁难久稽于常务思讲变通之策预图忽眇之几欲寄朝纲式资时杰具官性资忠厚识度详明行已过乎古人言有补於当世徧更两省殫猷可替否之忠进总三铨着激浊扬清之誉朕惟江表之寄实均廊庙之权思得老成共厘邦采矧践扬於台阁仍久习於宪章特陞秘殿之华资俾视政涂之宠数载隆衆望允出朕怀奉东朝之尊宜益严於羽卫总行台之政当躬治于文书时乃之休寛予忧顾可

滕康权知三省枢密院制

勅【上词同】具官材堪大受学富多闻厚德足以镇浮懿文足以华国徧仪禁路殫猷可替否之忠入赞枢廷有厌难折冲之畧比分江表之寄共持廊庙之权念久服於股肱实备昭於愰幅载隆柄任允出朕怀奉东朝之尊宜益严於羽卫总行台之政当躬治於文书时乃之休寛予忧顾可

张守签书枢密院制

勅天下之兵至衆操柄必在於朝廷堂上之奇无穷胜算莫先於樽俎朕绍承令绪思济多艰念匈奴之日骄叹得臣之犹在爰图髦杰入赞枢机具官靖深而能谋端方而不挠智足以知当世之取舍学足以造古人之渊源久总台纲实参国论远矣君子之虑利哉仁人之言磨涅不能磷缁刚柔无所吐茹属枢廷之虚位眷词禁之得贤与其因笔墨以成文发予号令曷若运帷幄以决胜修我戎兵特跻秘殿之名兼峻文阶之序进聯宥密协济事功噫上兵伐谋靡待干戈之用真儒无敌允资德义之修尚远乃猷图称朕命可

陈思恭转遥郡团练使制

勅具官周官司勲之职凡赏无常轻重眎功朕於勤王之赏已加厚矣其有拘於彝制而未尽者岂所以示劝哉尔见义敢为临机必断移檄以令近郡率师而当戎行已进陟於武阶仍遥

陞於郡寄益殫忠草图报恩荣可

俞儋遥郡团练使制

勅具官出纳之吝谓之有司然必得其人乃可以举职也以尔材力掌吾外府之事而究心夙夜克修厥官会课当迁既有常法俾尚仍於旧贯特升秩於州团益励尔为图称朕命可

刘鍾贈团练使制

勅殉義忘生乃见忠臣之节捐軀扞敌宜膺国典之褒具官早服戎行克宣勇力冒锋鏑而弗顾履行陈以无前势既屈於豺狼身遂膏於原野载嘉尔烈深厪朕怀特陞左武之阶仍领遥团之寄庶几英爽尚克钦承可

胡舜陟水军措置使制

勅肄习舟师屡更使任未见久长之策已当危急之秋宜得其人俾司厥事具官材猷敏给识虑精深振职台端风采行於百辟承流方面威望着於列城三载服劳羣盜屏迹比览奏封之来上深嘉论议之坚明更畀使权旋颁召节载念戈船之利实防天堑之津谓尔智之有余验尔能於已试历选在服莫如汝谐仍延阁之近班总水犀之长技往只朕命益究乃心可

王義叔水军措置副使制

勅朕式遏寇虐经营四方少安警蹕之行周览江山之胜俾修守备当择其人具官识虑精深猷为敏达着君卿行能之美实山东礼义之家早历郎曹遂跻禁从久辞着位退处燕闲朕肄习舟师屡更使任未见久长之策已当危急之秋历选於朝肆以命尔总水犀之节制扞天堑之要津其既乃心亟图厥事可

杜充宣抚使制

勅安强成道德之威莫先於正本折冲在精神之运尤贵於择人朕遭时艰难法古巡狩暂驻江左式遏寇攘方倚用於耆英往控临於淮甸宜正使名之重以光阃寄之雄具官庄重而渊深刚方而宏毅厚德有鎮时之望沉谋烛先事之机比守两都尽消羣盜吴汉隐若敌国民赖以安李积贤於长城寇莫能犯辍司留钥入赞筹帷逮来对於便朝实副怀於虚伫人皆欣见其风采朕亦深挹其谋谟兹属盛秋当严武备仍总枢机之柄亟驱徒御之行增重使权益隆节制式符衆望庸示眷怀噫光弼之号令一新旌旗改色万福之威声夙着草木知名往励壮猷图称休命可

周望宣抚使制

勅决胜千里允资帷幄之谋宣力四方必赖股肱之助眷予枢辅总国兵机思远振於军容俾暂将於使指具官中正不挠宏毅敢为郤縠既说於诗书翁归兼备於文武单车出使屡通邻国之情十乘前驱实仗元戎之畧既克平於逋寇益增重於威名遂跻常伯之联进陟中枢之峻朕念江汉上游之地是为荆楚四战之郊宜乘輶传以按临悉总连城之节制击楫而济祖逖奋威於中原抵几以行公瑾收勲於赤壁聿臻绥靖式伫旋归可

宋辉直龙图阁发运副使制

勅朕惟江淮六路财赋之渊藪而发运使副实总治之自外敌冯陵移驻江左仰给调度视平日为多而懋迁有无於一时为急欲任厥事可不惟其人哉尔材力强敏心计精明事不辞难所临必最舳舻应募则千艘毕集转输浮海则万斛安济已试之效卓然可观是用命尔进直河图以总东南之漕计尔其究心乃事济时多艰益着尔劳思称朕命可

李承造两浙转运使制

勅朕惟吴越之壤民物阜康惟兹戎辂巡幸之时尤重外台转漕之寄尔才资明敏智畧周通比由宰士之联往涖名城之守【以下原本缺】

成大亨直秘阁两浙转运使制

勅具官外台转漕之权漕部富实之境衣冠避地流寓为多警蹕省方仰给者衆孰膺遴选宜得能臣尔早涉艺文尤通吏治久服劳於州县既擢位於郎曹誉处弥休安恬自得俾直图书之府往临吴越之区非威望不足以厌服奸萌非清裁不足以表率羣吏贡赋无追科之扰关梁有扞御之方往体训言是为称职可

苏恪广东转运使制

勅朕惟五岭之南去朝廷远甚官多假版吏缘为奸思得忠信之臣往将使指尔材猷明敏列职郎曹服采惟勤闻誉休显持节南粤宜为朕行使民情上闻惠泽下究斯为称职尚勉之哉可

姜仲谦起复湖北转运使制

勅人子执亲之丧三年不从政然金革之事无避也朕属时艰难思与四方之士共图康功可不变礼以从宜哉尔风力强明材猷敏济荐更使指咸以能闻比以苴衰乃辞王事朕惟荆湖之沃壤实连江海之上游控扼输将于今为重宜起倚庐之戚往持漕运之权其既乃心亟图厥事可

上官悆除直秘阁京畿运副制

勅具官昔荣夷公好专利而王悦之芮良夫知王室之将卑以为王人者导利而布之上下者也而或专之其害多矣朕念掌财计之臣务以聚敛趣办或者取羨余以市恩其能捐横敛恤民隐为朝廷布仁义之泽者几希尔将漕王畿论事有体乃能奉朕宽恤元元之意丐罢苛扰刻剥之令於用度殫屈之时朕甚嘉之其升延阁之班仍正使名之重将以风厉四方使刻削之风丕变而吾凋瘵之民庶乎少休息矣清资显秩於尔何爱焉可

张徵知江州充江南东路制置使制

勅浚阳古郡据上流之地在东晋时号为重鎮非宿望大臣不以居之朕今时巡江左式遏寇攘繕甲治兵以张军势匪我旧辅孰付帅权具官风格方严器宇浑厚代言西掖润色居多执宪中司纠弹甚峻逮兹南渡进总右纲方赖协恭之诚遽陈均逸之请朕命四邻之旧任重股肱矧兹多难之辰忧深屏翰爰分符竹之寄俾扞江湖之冲加畀使名庸示眷倚钦予时命益励远猷可

中大夫起居舍人赵纶除右文殿修撰知庆元府兼沿海制置副使制

千里曰畿莫重甬东之鎮八命作牧爰咨螭右之英论撰通班藩宣示宠具官某才猷闳硕德望峻清正直靖共确乎有守进退出处付之无心自畴庸於外台肆陟明於武监豸冠正色纠察官邪鯁论犯顏维持国是身方居於要剧志每尚於清高侍立记言引之自近直前奏事深所愿闻厥今四明视汉三辅惟制阇有营垒甲兵之衆惟相卿有衣冠闕閱之多乃睠老成是资鎮抚德威远暨自令瀚海之无波声迹相闻尚冀京师之蒙福式称予选益懋尔庸可

刘舜文防御使制

勅朕遏寇虐以绥疲瘵之民厚爵赏以劝忠勤之士览奇功之来上宜异等以疏恩具官久践戎行克共武服屡底战多之最荐膺懋赏之褒威名既立于淮邦绩效未书於盟府爰正有司之误载酬马栅之功增重使名用昭御侮往只朕命益励尔庸可

乔仲福左武大夫遥郡防御使制

勅朕躬履至尊遭时多故孽臣骚扰反易天常实赖熊罴之士不二心之臣纠合戮力克清大憝肆颁国典用答殊功具官拳勇有闻忠诚自许荐更武服屡奏肤功比属勤王之行实嘉宣力之着躬率虎士先驱顏行宜仍左武之班进领御戎之寄兹为异数益励壮猷可

王罕赠观察使制

勅徇义忘生乃见忠臣之节捐躯扞敌宜膺国典之褒具官某久服周行克宣武力顷总戎於畿右适遇敌於淮西授兵登陴既励三军之气蒙楯负羽孰当强敌之锋孤坚不支摧陷以殲载嘉尔烈深?朕怀俾遥领於廉车仍就升於显秩并隆恩典用慰存亡想尔冥灵钦予休命可

贾说换观察使制

勅君臣之义险夷当秉一心立国之方文武固无二道适图守备宜越常规具官某风力强明材猷敏劭早联儒服亟践周行浸跻华近之班屡典剧繁之寄比繇庠次畀以使权扞天堑之要津总水犀之节制辍以从橐易处廉车其躬属於戎韃以总临於战舰往只朕命益既乃心可

奉圣旨内侍郑湛恬退自守不妄干进特除和州观察使制

昔者先王以德诏爵以为两者皆天下之达尊必惟其人而後称君唯曰天命臣唯曰德赏则上下不敢以轻而民服具官某恬於势利不妄进取夫以左右近习之臣而有廉节自喜之行固朕之所嘉予也陟汝廉车以劝在位使汝德称其服而人浮於食也不亦於汝安乎可

皇兄沂州防御使权主奉吴王祭祀多才磨勘转明州观察使制

勅朕崇长宗支以绵帝系高爵厚禄宜与共之而犹计岁课劳循次而进所以昭至公谨成宪也具官某信厚以为质靖共以自将入不恃家人之恩而出无违阙庭之礼况以尊属于今几人则径陟廉车云谁不可而必中有司之度积十年然後进之岂朕有所爱哉然而身无吏事之责秩比法从之崇其视匪躬尽瘁没齿下僚者又何其幸也宜对殊渥无忝所生可

汤东野降官制

勅刑辟所系虽有司存州郡之权悉归长吏倘容越逸难追谴诃具官顷以材能跻以侍从惟兹警蹕巡幸之地实同輶轂浩穰之区赖尔强明俾之兼治囚徒纵脱实典狱之瘵官讥察阔疎乃自陈其旷职用示防奸之戒聊从降秩之科往既乃心益图来效可

田思迈袭封溪洞都誓首制

勅春秋列潞子之爵许其慕中夏也尔父世守边隅克谨侯度剡章来上以老自陈溪山故封俾尔承袭尔其敬念忠孝之义永为封疆之臣无忝乃父之训以钦服朕命尚其勉哉可

周离萼直秘阁转运判官制

勅具官朕惟仁祖时尤重东南漕路漕运之职乃命施昌言许元为之使又命马遵为判官三人者其才足以相济能叶于厥赋是时人不告劳而财赋充足朕甚嘉之以尔学问甚富材力有余早践郎曹尝升柱史比列地官之属允资心计之良宜直秘严往图邦用能通世务儒者虽乐於有为思济时危人臣固难於择事伫观成效无愧前修可

董道赠官制

勅朕待遇臣工务全终始遽起沦亡之叹可无褒赠之恩具官早负时名亟跻儒馆嗜学至老而不厌所闻既博而愈精未尝枉道以徇人故每进寸而退尺晚记言於柱史浸联华於从班方俾分符俄闻易箴宜优加於恤典仍峻陟於文阶庸示?伤并推余泽尚其灵爽歆此宠休可

徐处仁赠官制

勅秉钧当轴尝宣力於邦家隐卒崇终宜疏恩於泉壤乃眷我朝之旧弼未膺身後之余荣厥有典常式隆着位具官忠厚廉正靖深简夷学造古人之方材周当世之务徧仪禁路兼严乐侍从之能屡典藩符擅龚黄政事之美靖康有作寇难方滋首擢冠於机衡遂再安於龟鼎总领衆职已闻魏相之有声鎮抚四夷方赖陈平之多智恳辞魁柄退处祠庭遽兴愍遗之悲莫逮亲临之礼尔孤有请令德未忘升特进之崇阶示褒贤之异数庶几英爽尚克歆承可

沈思赠官制

勅朕待遇臣邻务全终始遽起沦亡之叹可无悯恻之恩具官夙励材猷浸跻华近代言西掖早殫润色之劳均逸琳宫自得燕闲之适稍淹岁序未究设施顾逝川之弗留嗟易箴之何及宜加恤典厥有彝章俾超进於文阶用增光於幽窆灵而未泯尚克钦承可

魏宪赠父制

勅朕躬执珪币只见郊丘逮厘事之告成肆湛恩之溥及眷予近列宜有宠章乃推本於所亲用追荣其先世具官父某躬怀德义性服典常沈于下僚未究远业丕显子孙之余庆遂为富贵之大家服在迓臣实汝贤嗣荐举褒扬之典已跻通显之班属禋祀之肇修乃弟昆之有请载迁峻秩用贲幽局尚想冥灵钦承休命可

赠母制

勅朕躬执珪币祇见郊丘逮厘事之告成肆湛恩之溥及眷予近列宜有宠章乃推本於所亲用追荣其先世具官母某氏秉心淑慎迪德温恭宜其家人克昌厥後丕显子孙之余庆遂为富贵之大家服在迓僚实汝贤嗣荐举褒扬之典已膺休显之称禋祀肇修弟昆有请载锡小君之号俾开名郡之封尚想冥灵钦承休命可

封妻制

勅朕纂绍丕图欲修禋祀举三岁之大典以初为常施四海之湛恩无远弗届眷予近列宜有宠章肆推家室之荣以示闺门之庆具官妻某氏温恭淑慎柔闲静专生于名门来嫔令族辅佐君子克勤厥家早开石窀之封已侈榆衣之贵载疏国典式示朕恩往修中馈之恭更劝南山之义钦予时命永建乃家可

郑枢密封赠曾祖制

勅古者公卿大夫皆有庙以祀其先而视名位之高下为多寡今朕推褒崇之典以观在列亦因爵秩之隆杀以差远近惟执政大臣乃得追荣其三世则待遇之礼亦云厚矣具官曾祖某积德累行晦于邱园流泽之长鍾於後裔赞我枢府惟尔曾孙遭时艰难能任重大兹属延登之始宜疏休显之恩超进文阶以为尔宠灵而有识尚鉴之哉可

赠曾祖母制

勅妇人正位乎内有全德懿行之美无以自表暴於世惟其宗族之盛子孙之贤有闻于时浸以昌大虽乃祖乃父积累之庆抑其内德之茂盖有助焉具官某曾祖母某氏柔闲静专克配君子宜其家室胥及逸勤流泽之长克昌厥後赞我枢府惟尔曾孙遭时艰难能任重大兹属延登之始启以大邦之封灵而有知尚克歆享可

赠祖制

勅传称商俗尚神说者或讥焉然盘庚之迁都告其羣臣以灾祥祸福之降未尝不以乃祖乃父为言则庙祀之礼褒封之典历世修而兼用之岂特为虚文而已哉具官祖某潜德弗耀积善弥彰行义之修称于乡党厥躬弗有施及後昆惟尔贤孙赞我枢府兹属延登之始并疏褒显之恩超进文阶用光窀穸灵而有识尚克钦承可

赠祖母制

勅自秦汉以来妇人或裂郡县以称君汤沐之奉与列侯比近岁分八等之封以易郡邑之号虽曰弥文盖亦美称也以为闺门之宠光实兼古今之令典具官祖母某氏温恭淑慎宜其家人妇德之良称於宗党厥躬弗有施及後昆惟尔贤孙赞我枢府兹属延登之始并疏褒显之恩启封大邦用光窀穸灵而有识尚克钦承可

赠父制

勅古者子为大夫父为士则祭以大夫而服以士盖服不敢以子之贵而加於父也今之士族子贵且显矣父之爵秩或弗至焉则非所以慰其心此朕推褒封之典以及其先有不宜缓者也具官父某躬秉德义性服典常流泽之深施于後裔惟尔贤子赞我枢庭御侮折冲方资庙算显亲报德式称孝思超进宫师以锡尔宠丕昭有後之庆蔚为窀穸之光冥漠有知尚其歆享可

赠母制

勅人子之於亲虽三牲之养未足以为孝惟立身行道扬名於後世以显父母於是至然自

彤管女史之职废而纯德懿行之美不传於时惟观其子之贤世昌以大则母之德可知矣是可无褒显之恩哉具官母某氏温恭淑慎克勤厥家辅佐严君乃有贤子赞我枢府为时名臣爰於试用之初并举疏封之典俾开名郡加贲重泉冥漠有知尚其歆享可

封妻制

勅夫贵於朝妻荣於室古之义也然执政大臣方尽瘁於国事而家事有弗及知焉矧当艰难之时类皆以一身从朕於干戈之际则壺内之寄必有贤德之助可无褒异之典哉具官妻某氏柔惠温良克佐君子赞我枢府为时名臣爰於登用之初并举疏封之典乃启大郡以为尔荣尚祇服於宠光益克羞於馈祀可

王参政赠曾祖制

勅朕惟王氏远有谱系而望出太原琅琊者遂独盛於天下自秦汉以来世为将相大家淮水之占尤盛於东晋逮我国朝凡元功宿将多其苗裔虽受姓命名或不同然其源流之盛远矣具官曾祖秦国正懿之孙郑国恭肃之子鍾英令族为时闻人质俭自将弗流於骄侈刚介特立靡惰於燕闲垂训义方乃有贤子名继登於科甲已安享於寿康虽跻环卫之官未究清芬之选参吾大政实尔曾孙爰於登用之初诞举褒崇之典正位宫保光贲泉扃以彰积善之家以示君子之泽庶几英爽服此宠休可

赠曾祖母制

勅朕惟唐室之制宰辅封赠不过其父故权德輿自东都改葬其先始求赠祖以五品之秩亦未尝极保傅之位也国朝加礼大臣务隆恩典名器之大必上及於三世祿翟之贵亦光施於有家待遇之意可谓厚矣具官曾祖母某氏柔闲静专温恭淑慎生於贵族来嫔大家风行闺壺之间惠浹宗姻之党乃生贤子子又有孙为吾政事之臣事朕艰难之日国方图於协济尔宜极於褒荣特开名郡之封载锡小君之号庶几冥漠服此宠休可

赠祖制

勅昔汉世祖中兴不以功臣任事故高秩厚礼允答元功峻文深宪责成吏职於是邓禹教授诸子各守一艺贾复之徒并擢甲兵崇儒学然後守成之业茂焉国朝修文偃武元功宿将皆教子孙以诗书而鸿儒硕学之士接武于朝者衆矣矧其流泽之长世昌以大是可无褒异之恩哉具官祖承勲门之後蹈儒者之风下帷潜心讲诵大业躬稟义方之训显登甲乙之科受知公卿宜居馆阁黄香博士之举当接武於俊游祁奚内举之亲终引嫌而补外屈临别乘旋剖左符弗有於身庆鍾厥後参吾大政实尔闻孙爰於登用之初诞举褒崇之典东宫三少位极显荣聿为窀穸之光丕显子孙之庆灵而有识尚或钦承可

赠祖母皇甫氏制

勅妇人正位乎内虽有全德懿行之美无自表暴於世惟观其子孙之贤浸以昌大虽乃祖父积累之庆而内德之茂盖有助焉具官祖母某氏秉柔懿之姿躬婉娩之行生於贵族来嫔大家有士而良服采朝列流泽浸远积善弥彰惟尔贤孙参吾大政国方资於协济尔宜极於褒荣俾开名郡之封载锡小君之号灵而有识尚或钦承可

赠祖母韩氏制

勅【上词同前】具官祖母某氏秉柔懿之姿躬婉娩之行生於贵族来嫔大家被贤王训育之恩着妇德慈祥之誉均一之美既显馈祀之职惟恭克勤厥家以相君子流泽浸远积善弥彰【下词同前】

赠祖母来氏制

勅【上词同】具官祖母某氏躬淑慎之姿服组紃之事克媲君子勤於厥家裴秀之誉早闻王符之书既显训於贤息罔有逸言未开石窀之封每结寒泉之念跻华近列惟尔有孙早推天支就傅之恩允愜前人追封之志始颁恩典未极褒崇兹进服於政涂方参毗於国论乃即登延之始并推加赠之文升荣号於小君启新封於名郡灵而有识尚克钦承可

赠父制

勅昔汉张汤杜周并起文墨小吏致位三公皆有贤子德器自过继踵将相遂为世家史臣乃谓元功儒林之後莫之能及然自我国家奄有区夏宗工名臣轩冕相承大抵皆元功儒林之後岂遽不及文墨吏哉具官父某嗜学弗厌执德不回仲舒究天人之原晁错明国家之体虽沈英於州县乃驰誉於朝廷尝被名卿之荐论莫遂谗言之访对厥躬弗有施及後人以文学嗣其家声以材德进为时辅参预大政康济多艰爰於登用之初诞举褒封之典式扬先德进位官师以彰积善之符以显儒家之庆英灵未泯休命其承可

赠母制

勅古者君子之仕也三釜及亲则足以乐至於千锺弗泊则其心悲盖父母之德欲报罔极已则富贵而亲弗逮焉此人情之所甚戚也宜有褒崇之恩以慰霜露之感具官母某氏秉贤淑之姿躬婉娩之行动不违於矩矱性自乐於组紃生於名门来嫔甲族爱子益严於慈训趋庭弗假於义方是徵令息之贤早着上庠之誉徧仪禁路为时名臣参华政事之聯实朕股肱之辅登用兹始恩典并加式彰圣善之规特锡小君之号启封名郡增贲重泉尚想冥灵钦承休命可

赠故妻制

勅邦君之妻各因其国而称曰夫人古也未尝裂郡县以表之自秦汉以来汤沐之奉与列侯

比至於金印紫綬文軒丹轂显於当世盖所以宠劝臣下者如此虽曰弥文亦不可废也朕兼历代之制以修褒封之典则燕及其私庭者顾不厚哉具官妻某氏温恭淑慎严恪静专克勤厥家以相夫子降年不永弗逮显荣宜疏名郡之封载锡小君之号副之钿轴贲于泉扃尚想冥灵钦予休命可

封妻制

勅朕尝观召南之化始於诸侯大夫之妻修德循礼不失法度其效见於人伦既正朝廷既治夫形於国者如此则施诸家者其勤亦至矣今吾政事之臣修身齐家以致禄位则盥饗在中必有其助是可无褒显之恩哉具官妻某氏柔明淑懿婉婉静庄生于名门来嫔令族辅相君子为时良臣参华机务之聯实朕股肱之佐方亟图於王事靡暇及於私家壺则具修絜尔内助载锡小君之号俾开名郡之封永保宠荣称予休命可

刘棐复官制

勅具官数赦者古人之德宥罪者君子之仁朕临御以来殊恩屡下矧方隆於郡寄宜一洗於刑书尔顷坐愆违法当褫秩既荐更於肆眚盍悉复於故官尚谨厥修勿以为幸可

兰整复官制

勅朕祇见圆丘肆颁大赉赦过宥罪咸与惟新施惠行仁无远弗届矧方共於武服宜一洗於丹书具官久历边陲屡膺任使顷上太原之奏有亏石建之恭降领廉车已更霈泽其复使名之旧以昭庆典之行往服恩荣益思祇慎可

李釜转官致仕制

勅告老而闵烦若古之明训以疾而谢事近代之通规眷予迓臣宜加恩典具官名生於实行顾於言早冠儒科浸阶膺仕冯唐潜於郎署仲舒老於胶西比畴夙望之孚擢掌赞书之重乃陈疾疚愿丐麾符方躋次对之班遽上退休之请勉从尔志叙进文阶式宠其归往钦朕命可

曹昱转官致仕制

勅告老而闵烦若古之明训以疾而谢事近代之通规眷予迓臣宜加恩典具官持身愿慤迪德端良出於鼎甲之门自励材猷之美荐更任使进陟近班遽上封章愿还印綬其勉从於雅志仍增秩於崇阶以彰止足之风以示归休之宠钦予时命益介寿康可

韩俨加职制

勅云梦之间复为支郡自顷寇攘屡扰二千石能保其封疆亦已难矣尔以材猷往膺郡寄抚

循疲瘵逮此暮年俾进尔职以彰治理之效传不云乎有功而见知则说矣尚勉之哉可

辛兴宗辛企宗降官制

勅无将之诛罔或攸赦缘坐之法厥有常刑岂容私恩辄紊成宪具官早共武服久扞边陲既稍积於战多遂进躋於留务属时逆党乃尔外姻弗知请罪於私门遽敢露章於政府公为道地轻视朝廷其降领於廉车尚屈从於宽典往思循省无重悔尤可

卷四

钦定四库全书

大隐集卷四 宋 李正民 撰

疏

天寧节功德疏

天德出寧诞圣夙标於令节臣能归美逢时愿罄於欢心届兹绕电之期先以象钩之候恭临净宇仰叩佛乘恭惟道君皇帝治格三登泽渐九有即常无以观妙早从汾水之游履成功而不居爰整襄城之驾燧林在望海?倾心伏愿三极垂休百神荐祉以金玉为度伫瞻八骏之归与箕翼参光永介万年之壽

功德疏

正气为圣早开鸣社之祥申命自天爰契赤符之兆适临诞节恭诣祇园乃集缁流聿修象教阐三乘之妙旨诵十号之徽名广集殊因仰资宸算伏愿天垂眷佑人与成能副尧封三祝之辞介周雅万年之壽仪刑四海用光绍於丕基敷锡庶民期诞膺於多福

又

流虹炳焕夙纪於诞辰华藏庄严恭临於梵宇逢一人之有庆祈万壽之无疆式布?诚爰修佛事伏愿照临四海如日之升覆焘多方与天无极宸算协万年之雅丕基开过历之符大庇羣生永臻多福

开启疏

千龄复旦逢真人载育之辰弥月先期集象教无边之福冀龙天之卫护严香火以薰修广殖殊因仰资宸算初中後善惟佛法之难名亿万斯年副封人之善祝

表

天申节贺表

佑下民而作之君诞受穆清之命有大德者得其壽丕昭平格之祥茂对休辰敢忘善颂尊号

钦明稽古神武应期慎俭德而怀永图抗明威以摄不类彼疆此界伫臻恢复之功旰食宵衣躬聽忧勤之治已获天人之助茂迎戩谷之休保周余民还夏旧物臣偷安散地綴籍清班阻瞻如日之光?祝後天之算

五百岁而圣人生爰契中兴之运亿万年为天子壽敢殫善颂之诚凡属照临同增拚蹈尊号诞敷文德载纘武功每怀宵衣旰食之忧弗憚沐雨栴风之役如江如汉已震耀於皇威我泉我池即恢张於輿地新又新而不息旦复旦以无穷臣名綴近班身栖闲馆渔樵遁迹方观东海之澜輶轂驰心遥祝南山之壽

贺正旦表

献岁发春会三朝而谨始贊阳出滯推六律以更新以初为常惟圣时宪尊号中正履位稽谋自天躬六载之忧勤清四方之氛祲宏开泰运驯致丰亨既顺履於春祺宜永膺於天祉臣久辞禁近假守偏州宣化承流身在江湖之上望云就日心驰户牖之间

贺冬至表

杓回子位律应黄宫亚岁会于晋朝备陈仪品书云物於鲁史式验休祥恭惟尊号皇帝陛下睿智有临聪明时义神武以恢大业忧勤以御庶邦有臣三千既纘修於旧物辟国百里期光绍於丕基属刚德之浸亨宜圆穹之纯佑臣久尘从橐适馆郡章身流落於江湖未迷楚些心飞驰於霄极徒想尧云

贺大朝会表

七始载华爰纪履端之序三朝称庆肆临会极之朝盛典时行羣心胥悦尊号德合天地孝通神明应大人休否之时致太平守成之乐讲信修睦使輶交聘於殊隣正位辨方都邑备修于礼制四方来贺万福攸同臣昔在先朝尝叨儒馆怀鈇抱槩久接武于英躔结绶影纓获覩光於元会洎逢舜旦滥玷周行进无补於毫分退坐安於畎亩靖循畴昔深愧平生何图衰晚之年重见升平之运身同太史徒叹滯於周南心若子牟实怀瞻於魏阙

知吉州到任谢表

清曹持橐久怀窃食之羞列郡分符误玷承流之寄趣装上路涓日涖官已见吏民具宣德意伏念臣衣冠末裔庠序诸生文不足以广国华武不足以治军旅徒自安於卑位偶拔真于周行荏苒岁时践更台阁负羈勒而扞牧圉曾微横草之功簪驾鹭而接夔龙荐冒踰涯之宠暨频频于省闕浸沈迷於簿书深慙无补于朝廷莫为轩轻颇欲自试于州县尚可驰驱忽被恩俞远分优寄惟庠序之奥壤居江表之上游田畴因流徙而多荒井邑经燹灾而仅在旧惟插笔觚箒之讼繁兴今或弄兵潢池之徒间发岂容孱陋可备藩宣虞诩之得朝歌来宾相吊龚遂之入渤海寇盗稍平恍可偷安诚为侥幸尊号尧仁光被汤德又新祈天命而开中兴思振

无疆之烈收人心而纾多难载怀共理之良欲惠泽浹于遐方遣从臣往为郡守臣虽久趋轩陛未尝历于治民然亦粗习宪章或可勉于从政但知循理不敢辞难少清佩犊之风庶弭争桑之渐材非吾壽虽无智畧之在前忠类萧生尚有本朝之雅意

知湖州到任谢表

臣某言伏奉诰命复臣宝文阁待制知湖州寻具辞免奉圣旨不允已於今月初三日到任讫疏荣内阁复尘法从之聯假宠名城骤委殿邦之寄威顔不远震惧靡寧中谢伏念臣托业简编起家蓬荜以山野戇愚之质困风波销铄之余造言者每出于无根希意者更从而下石覆盆终照赖日月之至明朽骨更生荷乾坤之平施既许过都而入覲因令假道以之官获瞻睟穆之容莫副殷勤之问言多迂濶慙无献替之能职任藩宣惟切抚循之志静言忝冒实出恩慈此盖伏遇皇帝陛下以大有为之资行不忍人之政凡在羣臣之列曾无一介之遗起之丘园放废之中副以江湖全盛之地溪山清远间里阜安全家有饱煖之荣千里无流亡之虑臣敢不勉思策励图効涓埃劝课农桑仰体丁寧之意蠲除苛细益推寛大之恩誓毕余生仰酬洪造

知洪州到任谢表

臣某言伏奉诰命除臣江南西路安抚大使兼知洪州寻具辞免伏蒙诏书不允臣已于今月初九日至抚州金谿县交割安抚司职事於十七日至本州交割州事讫东国分符曾乏循良之誉南昌易镇更叨屏翰之优祇见吏民布宣条教顾慙疎拙叠被恩荣中谢伏念臣奋自书生冒居华贯入陪禁闕出总戎行临机无应变之方制胜谢折冲之畧夤缘遭遇累玷使令虽縻岁月之多莫効涓尘之益况鍾陵之巨屏据泽国之上游江山遐控於荆蛮襟带内连于瓠粤地灵人杰尚余前辈之风流水走陆驰最为今日之要害非得弼谐之旧曷当节制之雄岂此妄庸可膺委寄此盖伏遇皇帝陛下裁成万化总核庶工有鞭笞四夷之心得驾御羣才之术故如孤远亦被简求臣敢不宣畅国威恢张庙算运筹决策虽匪腐儒之能息盗安民庶几明主之意

知温州到任谢表

臣某言伏奉诰命除臣端明殿学士知温州已於八月十六日到任讫入奉严宸曾乏谋猷之助出临雅俗猥当师帅之荣既见吏民具宣条教被私恩而未报窃宠禄以为慙中谢伏念臣涉世迂疎稟生坎 久栖迟於散地甘蹭蹬以终身累困风波虽恃大明之傍烛每虞谤毁或伤全度之至仁因黽勉以辞荣庶逡巡而免祸傥非圣察遏遂微诚还秘殿之崇资副东瓯之名郡远临民社职尚列于西清越在江湖心实驰于魏阙惟东嘉之胜壤乃越絶之奥区当表海之襟喉为行都之屏翰暂安九庙有香火之具严尝驻六龙觉山川之增壮士尚传家之学民无珥笔之风叨此便安实为侥幸此盖伏遇皇帝陛下知人则哲待物以诚修政事以图中兴聚贤材而建大厦谓臣更事多而将老至或可牧民知臣操心危而虑患深庶几寡过致兹冒昧尽出生成臣谨当仰体慈怜弥加策励秉愚忠而自信坚素履以弗渝少期岁月之淹粗

有涓埃之効

知婺州到任谢表

置散投闲方窃宫祠之禄承流宣化复叨屏翰之除退自省循益难报称中谢伏念臣欽 危迹卷曲散材智尝竭于守官资不宜于逢世但知事主岂暇营身已期自放于江湖敢意复瞻于天日沃心造膝未输献可之忠御衆牧人遽冒于蕃之寄遂兹安便悉出恩怜兹盖伏遇皇帝陛下乾覆无私离明徧照以器使人而不求备因能任职而知其劳致此孱庸有斯僥冒臣敢不祇服丁寧之训布宣寬大之书禁戢暴奸冀絶夜鸣之桴鼓抚循凋瘵庶闻雅俗之欢謡

给事中谢表

紫微书命已叨綴於近班青琐涂归复冒膺於华宠衣颁上楮带锡兼金揆小已以何堪抚危心而增惧窃以黄门设官於汉有朝夕侍从之亲东台率属於唐掌駁正违失之务虽省号合而为一然事任各有所分论营造劳人则张公効回天之力指奸邪误国若袁高着屈軼之称必惟其人乃举厥职顾如臣者畴克宅之伏念臣学不通方材非适用幼闻诗礼盖初有志於科名长习艺文遂欲脱身於州县偶中有司之程度窃窥秘府之图书未尝梘貌蜡言以追时好徒苦桂薪玉粟自守固穷远去周庭归安顔巷逮稍阶於寸进廼亲逢於百罹信赋分之多奇亦谋身之太拙顷陪羈勒备历山川乏良策以济时抱愚忠而许国乘长风而破浪亶符宗慤之言驾驷马而出关偶合终军之志郡邑之干戈未解閭閻之煨烬尚新帝有恩言既阻於道涂而莫能周徧民所疾苦又拘於法令而弗即蠲除逮此遄归谓当幽黜敢图睿眷俯録孤踪叨明诏之前颁与羣贤而彙进彤庭并敞隔篱遥想於神京黄纸聯名摘尾尚惊於误笔夫何幸会荐玷要津尊号至德动天沉几先物委任无私以凝庶绩赏罚必信以励羣工据鞍而谋既锡韩彭之地当馈而叹正思颇牧之材曾是孱微岂堪驱策求田问舍甘为豪士之所羞斩将搴旗夫岂诸生之所习误膺獎擢弥切兢慙必知称塞之难愈觉颠隮之易文章小技已无补於右武之时节谊大闲尚有望於致身之日

谢转官表

琳馆尸官曾无事任铨曹着令厥有典常自惊流落之踪忽被便蕃之宠凌兢拜命局躋知思伏念臣碌碌无奇沾沾多易昨辞从橐黜典州符当里閭凋瘵之余值师旅征行之衆但期免咎岂敢告劳屯戢踰於十旬糗粮动以万计元戎第赏常例进於一官清诏观风遽自貽於重劾赖圣明之洞照知供亿之必时俾追深文止还滥赏泊屏居於林藪已絶意於轩裳天官考三岁之小臣责其献状内史裁五色之温诏烂其及门凡兹予夺之公尽出生成之造至於进崇列爵增衍爰田矧当投闲置散之时仍玷君国子民之号名同李蔡妄被乐安之封学谢韦成获继扶阳之绪萃兹光宠并及孱庸簪履未忍於弃捐江海自忘其孤外尊号乾刚独运离照方亨命将帅以出师抚寧中夏操爵赏以厉世驾馭羣才如臣草芥之微曾预轩墀之末尚推优渥弗以遐遗取禾三百?已愧无功而受禄行年六十化更知今是而昨非

谢转官表

岁成无状甘俟黜幽宸命俯颁遽蒙增秩伏念臣久尘侍从无补事功出领藩符曾微善最已露投劾之请方思解绶而行敢谓洪私不遗菅蒯之贱尚遵常典曲推雨露之恩因氏疏封启疆衍食但知多幸实愧罔功尊号礼厚使臣仁恩遍物不废有司之法以示天下之公加赉辱微用光遐外训词温润知罪戾之既明宠数便蕃誓糜捐而後已

礼部侍郎谢表

总铨部之剧烦方虞旷职贰礼闱之清简尤愧叨居已布俞音嗣颁温诏揆庸愚而弗称冒眷獎以奚堪窃以文昌兼统六官宗伯实典三礼祭祀宾客之式既备其物宜学校选举之文悉掌其政令荐罹多故浸失旧章占旄头之光不习俎豆之事抱师襄之器散居河海之间黍离虽闵於宗周赤伏肇隆於有汉谓理军市者固无取於乡饮之礼而尊朝廷者亦有待於絺繻之仪不遗瓠叶之微宜举西隣之祭欲司厥事可无其人伏念臣学术空疎智能浅短素乏左右先容之助滥跻论思献纳之官陪羈勒者三年接鸳鸾於九陛顷絺琐困擢寔铨曹蒙谷离次之典既亡各怀欺诞光庭循资之书仅在靡辨科条徒知以公而灭私罔敢违道以干誉罪固多矣偶未致於烦言幸莫大焉忽叨膺於华宠矧是夷夔之任夙兼礼乐之司多士指为清流儒臣号称高选岂图懵陋猥玷束求尊号独运乾刚大明丰照欲投戈而讲艺方修德以振兵宗庙会同不以军旅而废礼情文制作亦将损益以因时申敕攸司俾修厥职孰谓久虚之位乃容孤进之臣臣谨当紬绎前经讨论故实是仪也非礼也愿谨守於此言幼学之壮行之虑弗胜於其任誓殚夙夜无忝司存

吏部侍郎谢表

掌駁议於东台方慙无补典铨曹於南省允谓非宜已惊涣汗之难回更沐出纶而申谕凌兢就列龟勉包羞窃以六官之聯职守虽均於奉法三铨之任典司尤在於择人惟并用而不偏乃可久而无弊晋魏之际任人而不任法故德行文材或取於一时隋唐之间任法而不任人故身言书判必严於四事逮圣朝之有作稽历代之攸行简拔既在於朝廷资格悉归於选部枢机品式咸具吏不容私刑名分守已明士无犯义比属干戈之扰靡存典簿之传稂莠并兴难以循名而责实鴈鹓自恣惟知弄法而舞文盖琴瑟之不调致风波之易动然一於守法所以为至公也则不能免烦苛留滞之讥专於用人所以为通变也则无以革欺诈诞谩之弊实今日之共患岂公朝之所宜必得通材允厘剧部伏念臣羈孤寡与朴拙无能屈身州县之间岂怀荣望接武图书之府已过初心连蹇十年凄凉万状遇銮輿之巡幸起涂巷以蹇翔荐历郎曹浸升禁路方惧窃位素餐之责敢萌拔茅彙征之心遽被异恩超居司列念颠跻而去必矣顾冒昧以处云何逊避弗从震惊失措尊号刚健中正钦明文思以道观能将使分职而率属用人惟已皆思坏植而散羣欲威德之兼隆策文武而并进致兹謏薄亦预使令臣谨当祇奉简书审核情伪并缘靡容於奸吏拘挛宜畧於细文少清弊源庶弭羣议论思弗效固非严徐侍从之材条理惟精愿继裴马铨衡之誉

谢宫祠表

冒居烦剧慙非立断之材规求安闲遂窃便私之幸恩从愿始感自中深伏念臣顷玷近班黜临远郡身敢怀于择地志将在於息民惟簿书期会之劳粗知黾勉若钱谷甲兵之事曾弗习知值更戍之频仍顾里闾之凋瘵玩岁愒日虽期补过於目前任职居官深恐忧生於意外辄缘私计仰丐眷怜获栖息於祠庭尚叨縻於稍廩蒙恩甚厚负愧则多恭惟尊号明并日升德侔乾健观能以道而不求其备使臣以礼而得尽其心顾如臣愚亦被上施思长林而志丰草幸同麋鹿之游饮坠露而殄落英颇适江湖之兴少休弩蹇终効涓埃

状

辞免中书舍人状

闻命震恐罔知所裁窃以法从近班词臣高选用人得失系国重轻岂容疎愚濫膺超擢伏念臣受材无取赋分多奇偶玷词科遂跻儒馆十年留落自抵于困穷四海孤寒曾无于党援逮陪警蹕之巡幸遽遭道路之流离尽弃青箱祇慙空腹岂图睿简俾掌赞书退省无堪必难胜任伏望曲回洪造追寢误恩非特厌于师言实少安于愚分

中书舍人谢状

叨奉宸恩俾司外制顾文辞之无取何简拔之非常直由推借之私有此遭逢之异阶前红药怅坐隔于云霄阁上麒麟幸日陪于步武虑勤典谒不敢造门感愧之深敷宣罔既

辞免给事中状

闻命震恐罔知所裁伏念臣受材无他涉世尤拙顷自叨尘词掖已惭润色之非工若使进处琐闥岂复论思之有补比持使节远适江湖无所将明遽更寒暑自度必貽於严谴敢期前布於明廷徒怀非据之忧更切多言之畏伏望陛下曲垂天鉴俯察臣诚收还误恩庶安愚分

辞免吏部侍郎状

闻命震恐罔知所裁窃以天官三铨於列曹为剧部文昌贰卿在搢绅为高选自艰难以来典籍散佚真伪混淆必得强敏精明熟於吏事者乃能振职况今羣材居外被召而未至在廷执事惟臣等辈数人虽云乏使岂宜轻授伏念臣材力絀弱地势孤寒昨被误恩径跻禁路叨尘两省无补万分忽奉俞音俾司铨综重念臣忧患飘零之余心志凋落动多健忘目视昏花非惟进用超越必致人言亦恐职事旷弛自速罪戾伏望追还成命以安愚分

辞免礼部侍郎状

闻命震恐罔知所裁窃以宗伯之官任兼礼乐自顷典籍散佚朝廷一有礼文之事则官吏愕眙莫知其原念掌故之弗存虽求野而莫获则夫分职率属以典司厥事者讵可轻授其人哉伏念臣未学肤受单见浅闻自分羈穷初无荣望顷自叨尘二省已乏寸长可称擢置天官益慙非据弗思与物多忤惟务当官而行罪戾已深方图自劾敢期睿眷遽易清曹非惟孤迹之难胜亦恐烦言之可畏伏望收还成命改授一闲慢职局庶安愚分

辞免徽猷阁待制奏状

伏念臣疎拙愚陋误蒙陛下拔擢置之从班于兹三年虽居官任职自竭弩钝然艰难之际毫无所补揣分量材所宜谴黜久矣今者重沐寬恩付之剧郡尚被朝廷任使不敢辞难若乃延阁次对是为近臣高选退循孱琐非所宜蒙伏望收还成命以安愚分

辞免筠州恩命第一状

承命震恐罔知所裁伏念臣謏薄之资误尘法从投闲累岁分所宜然今者忽被圣恩起於祠庭付以民社之计义当奔走上道以趋官守重念臣流落之余侨寄异县家贫累重婚嫁失时今若远适江西数千里之外私计实为狼狈兼臣今任宫祠合至来年三月任满欲望圣明特赐收还成命令臣终满今任异日或有驱策臣不敢辞

第二状

承命震恐罔知所裁再沥肝肺仰尘天聽伏念臣叨处祠宫坐縻岁月无功受禄每积兢慙非不欲痛自激昂少图报称误膺渥泽尚何敢辞实缘臣十载飘泊侨寓江海家贫累重婚嫁失时未毕所谋势难远适所以冒昧陈述兼臣遯迹海隅杜门扫轨未尝敢希求试用而居处之陋使令之乏比於为郡荣悴不同盖臣赋分奇穷触事齟齬虽欲勉强承命有所不能若以稽违诏令获罪臣亦无以自解伏望圣慈照察许臣终满今任宫观容臣别具陈乞誓竭弩蹇以効涓埃

辞免淮寧府恩命状

伏念臣謏薄之资碌碌无取投闲置散分所宜然荏苒岁时困约弥甚今者误蒙圣恩付以大郡非臣愚之所克堪窃以宛丘巨镇密迩旧都宜得望实兼着之人以为屏翰臣若贪冒荣宠深恐必致人言欲望圣明照察追寢误恩以安愚分

举孙傅自代状

伏覩文林郎孙傅学有本源文兼体要材周於用深知世务之宜器藏於身不求衆人之誉置之近列必有可观臣所不如举以自代

举杨正权自代状

伏覩廸功郎新两浙路提刑司干办公事杨正权廉靖之操不求於人典则之文庶几於古寘之朝廷必有可观臣所不如今举自代

举蔡居中自代状

伏覩承议郎前太学正蔡居中行能兼备文学俱优早擢甲科久沉下列揆其材器宜在朝廷臣所不如今举自代

举薛嘉言自代状

伏覩承议郎新通判舒州薛嘉言文辞典丽操履清修早擢词科久淹书局恬退自守器业弥充流落外迁衆论嗟惜观其所蕴臣实不如举以代臣实允公议

举杨愿自代状

伏覩承奉郎枢密院编修官杨愿忠义之气勇於敢为文学之优多所自得比膺召擢益奋才猷臣所不如今举自代

应诏举官状

準尚书吏部牒奉圣旨应内外侍从各举所知三人以上如有不实同罪保举臣今谨遵诏命举所知如後一员朝散郎直龙图阁主管建州冲佑观祖秀实操守坚正学业深醇久在上庠晚擢高第刚方之概鯁直之风孚於衆言共推硕士屡经任使历着能声谓宜召还以备朝选一员朝请郎提点江南东路刑狱公事邵昂儒学决科材能任职累历省府寺监之选所至靡不办治宜备朝廷清要烦剧任使一员从事郎添差两浙东路安抚司干办公事王扬英性资温厚文学贯通可备馆阁清要任使右具如前所举如或不当臣甘受谬举之罚谨録奏闻

应诏荐士状

惟建炎四年五月十二日勅节文臣寮上言乞诏台諫及左右司郎官已上各荐二人随材任使者臣伏覩承议郎新通判温州柳绰性资爽迈材术优长试之剧烦必有能效从事郎衢州江山令吕求中名臣之後材力有余蒞政临民威惠兼着伏望特赐召审擢用以备任使

举胡铨应十科荐士状

伏覩左承直郎前吉州军事推官胡铨早富文艺峻擢甲科去官累年恬养自守杜门读书深究治体议论坚正刚而不屈臣今保举堪充节操方正可备献纳科如蒙朝廷擢用後不如所

举及犯赃入己甘伏朝典

劄子

建康上殿乞置史官劄子

臣闻今之所以知古後之所以知今不可言传必凭诸史史者国之典也孔子作春秋於隱桓之际则彰於定哀之间则微辞虽不同记事之文未尝一日废也臣窃见朝廷自艰难以来典籍或废而不録陛下龙飞商墟驻蹕淮甸旋幸江吴又幸建康其间一两大节皆史臣所当谨记而悉书之今又秘书省权罢着作日历之局久废深恐士大夫各矜所见私自記錄好恶不同是非失实既无有司载籍异时难以考证臣愿陛下慎选文学之臣兼领着作或专置一二员以日历按隶门下省除百司关报事节仍许其参以闻见裒类成篇上之御府以补异时之阙文虽多事之日亦不可後也

江西使回越州上殿劄子

臣闻将帅之任有进无却是以古之善将者受命之日则忘其家临军誓师则忘其身岂有见敌不击移患於民者哉伏觀去岁之沿江设备分命诸将各据要津而大敌之来鲜有贾勇而前者往往退保旁郡而所至州县困於供亿或厚献犒设或剽掠平民其深入闽粤者为患迄今未已臣谓陛下赏太重罚太轻非所以御将帅弭寇敌也今兹已迫盛秋敌骑盘礴于淮南者尚多分戍备御乃适其时臣愿陛下明诏诸将各务奋击以振国威策勲第赏当倍常等其或不应往州县而辄往者必罚无赦州县监司敢以金帛过为犒设者并坐以罪如是则敌所不至之地州县之民尚得保全安息实今日之急务也

江西使回越州上殿第二劄子

臣闻书曰一人有庆兆民赖之此言人主安则兆民安也又曰四方无虞予一人以寧言四方寧则人主寧也盖君之与民名分虽殊而安危之势其体则一故曰君以民为心民以君为体此古今之通论也陛下临御之初谋国之臣不能深思远虑以天下安危为计但为说曰吾奉銮輿於安全之地而已逮维扬震惊仓猝南渡则前日之说亦已穷矣以今日之事观之财赋益窘兵将愈怯议者谓先事而动则虑漕运之不继粮饷之不给而吾之力屈矣今吕颐浩辞疾而未至刘洪道宿留而未行赵鼎除建康守虽非御侮之才而尚未闻之官则沿江控扼之事果何恃以为备也臣愿陛下深察事机预图长算勿以敌骑稍去而怠於防守以保生民以幸天下无待警急之际徒为集议而已

论时事劄子

准尚书省劄子备奉手诏以保民弭盗遏虏寇生国财等事令侍从台谏条具奏闻者臣窃以陛下即位以来于兹五年寇难日深政治未洽虽未发于圣问而臣已窃怪其故久矣然陛下

日晏坐朝宰辅大臣远猷辰告谅无急于此数者而今日所以为国实在于是矣臣诘高言濶论以污陛下之聽覽哉臣伏以方今外有强敌之侵暴内复寇盜蜂起田野之民不得保其耕桑城郭之民不得安其居室汉沔之盜即赵魏齐鲁之盜江湖之盜即汉沔唐邓之盜也如是而欲保民曷可得乎淮泗之南不能守弃而之江吴江吴之地不能安转而之海道甲兵不足以当战阵之锋城池不足以为扞卫之固讲防守之策者不过于顺动居将帅之任者每谋于退保如是而欲保民曷可得乎然则寇虜未已盜賊未息虽欲保民臣未之闻也今陛下躬履艰难之运亲见祸乱之源忧勤求治非不至也然自建炎迄于今将益贵而难御兵日骄而难使所以备爪牙之任总虎貔之师者三大将而已昨遣刘光世防江之後李成猖獗因欲复遣大将而意颇难之始闻车驾有亲征之举臣愚不知陛下留輜重而自将轻骑以击张步能如汉光武乎结雨服于鞍以伐高丽能如唐太宗乎羣议不同斯谋既寢乃畀张俊以招讨之权实任专征之寄今则寇在江东而俊已趋江西矣然今日之将贪赏而冒利养寇以全身皆非豪杰之士也今日之兵招安于寇盜之余强刺于驱虜之後皆非节制之兵也如是而欲遏虜寇弭盜賊人皆知其难矣今江湖之间大将有如杨惟忠张俊者旧相有如吕颐浩朱胜非者皆任之以扫除羣盜之事然兵少而不可分粮乏而不可继此胜负所以未决也臣愿陛下训齐戎行缮修备御拔卒为将以求可用之材以仁爱民无失天下之望则盜庶几能弭敌庶几能遏然後可以图中兴之业矣臣又观今日郡守之任其选太轻愿稍革承平之制参文武而并用之亦保民之一端也昔太祖皇帝削平僭伪始罢方镇在建隆开宝之间居方面者亦多功臣宿将其後稍稍易之夫今之守臣惟考其资序之高下不量其人材之优劣方其无事则治簿书以偷岁月之安及其有警则怀印绶而为遁走之计大抵皆昏耄震骇不知所为其能指麾吏民为战守备者亦已鲜矣城郭之民何赖焉今议者稍欲擦拭赃吏号为有材而任使之臣谓与其任赃吏不若任武吏也愿诏大臣选择实有材武者及曾经出战有军功人与文臣相参委之列郡平居无事则专于按习军马缓急即以州事付之聽出战捕賊庶几列郡足以隆藩屏之势矣臣闻记曰生财有大道生之者衆食之者寡为之者疾用之者舒则财恒足矣後世用度无艺赋取无制遂行伤财害民之政榷酤盐铁均输平準自汉唐以还凡可以图利者无不为之矣国朝兼修历代之法而常有财乏之叹虽使桑弘羊孔仅宇文融扬矜之徒复生亦无所施其智巧尚何生财之可论乎臣谓今日正当节用而已况輿地既狭而赋入有限道路多梗而漕运不通盜賊既衆而耕桑失时于此而不节臣即恐他日必有上下俱敝之患汉唐兵革之际至于内饗之膳不继百官之服不给每覽载籍为之寒心然今日军旅之费太多胥吏之给太厚侥幸之禄未减于平时横取之物继入于内府如是欲财丰而用足不亦难哉议者方献生财之说以惑陛下之聽臣闻昔桑弘羊为平準均输之法号为民不加赋而上用足然其法不过陰夺民利而已此乃桑弘羊欺汉武之言太史公书之以见武帝不明尔当是时奄有四海尚可施为今陛下播迁吴越已失天下之半榷酤之价既日增于旧茶盐之钞又屡变其法今日所谓生财亦无踰此虽欲加赋而赋不可加虽欲夺利而利不可夺余民无几尚忍掊克之乎愿陛下深念节财裕民之义自上以及下由中以及外一切遵于节俭敢有言生财者罪之则无伤财害民之政矣陛下勿谓降一德音下一手诏为足以示天子之仁怀百姓之心若无实德之施适足以取怨于人尔譬之父母之爱其子告之以矜怜抚恤之言而显夺其衣服饮食之具如是而谓之爱其子乎虽孩提之童不可欺矣此又保民之尤急者也臣无状备数从官虽早夜以思徒忧祸难之未已是敢竭其狂瞽以仰答圣问亦以少谢尸禄素餐之责而已

<集部,别集类,南宋建炎至德佑,大隐集>

卷五

钦定四库全书

大隐集卷五 宋 李正民 撰

启

贺帅冬启

日临南极占化景之舒长律中黄锺验微阳之来复道由时进福以类升某官识妙元龟材推隆栋赞元经体夙殚许国之忠宣化承流暂倚维垣之重世资耆哲帝赖明谟既顺履於休辰宜位膺於介祉复还钧轴大庇黔黎某叨綰郡章获依河润莫预贺宾之列徒深善颂之诚

贺赵参政启

光奉制书荣参机柄邮传播告輿颂欢呼窃以御寇敌之侵上策莫如自治尊朝廷之体强本则能折冲历观比岁以还仰止一堂之近辅弼任轻而易於进退台谏气锐而动辄抨弹上无以当明主仄席之心下无以副疲民息肩之望第徒劳於土苴靡暇瞻於旷芸爰求旧德已试之贤稍清一时流弊之未必视覆车而知戒谓宜解琴而更张效周墀之无权姑务於大体若谢公之经远不求於近功然後运沉几帷幄之中制庙胜樽俎之上使远夷望风而知畏庶黎元按堵而有归遂致中兴悉还旧物惟四海所望如此在今日非公而谁某官业贯羣伦道侔前哲浑然河山之气卓尔关陕之英直大而方应羲易坤元之二智仁且勇备天下达德者三挺诚节於中司运良筹於右府辍一路抚绥之寄参四辅赞襄之聯和羹允待於盐梅大厦式资於梁栋惟经纶之蘊必陈臯陶底绩之谟需功业之成尚述王褒得贤之颂某方安散地簞阻崇墉侧闻成命之行徒极懽惊之积

贺翟参政启

显膺制命入预政机国步方艰允赖更张之举上心俾乂爰资杰异之材搢绅耸传庙堂增重某官诚明毓粹雋伟迈伦英名擅於八区高眄邈于四海班聯玉笋自结明主之知任寄麟符夙昭黎民之誉久游琳馆遽解尘缨傅岩因帝梦以旁求谢安为苍生而再起果符睿眷亟赞民谟步骤儒林素负孔融之高气翼扶国运更观公瑾之盛心伫期功烈之成式展经纶之蘊某久尘近着方莅小邦进有後先虽闻荆州而愿识义均休戚且欣乐正之有为瞻颂之深敷宣罔既

安抚李参政启

久持从橐无补事功宠畀州符尚寬罪戾获在按临之下实为幸会之多某官明哲超羣谋猷经国比忝辞於大政暂偃息於雄藩吹之嘘之已苏凋瘵之俗晏也粲也行臻富庶之风即奉玺书复归廊庙某比污近着密借余光昔在门墙尝有一日之雅今兹官守遂托二天之仁瞻咏惟深敷宣罔既

贺沈参政启

总师薄伐扈跸言还清丑虏於淮瀆震天声於边徼执俘折馘大挫犬羊之锋布令陈辞式警鸛鵒之性惟庙谟之决胜假将略以宣威国势既隆民心胥悦某官英姿不世爽气殊伦芝草凤凰来作明时之瑞南金东箭允为内府之珍纠弹既肃於搢绅眷注遂隆於旒扆拨烦治剧尤高铨综之称宣化承流暂试藩垣之重亟趋节召入覲枫宸玉堂之地深严黄麻之文温厚昼接尝留於步辇夜谈载炳於金莲遂膺亚相之求式赞繁机之任汉廷黜陟允资丙吉之同心周室将兴孰云山甫之莫助休功可望公论皆然某顷缀班聯尝陪步武方投闲於祠馆欣诞布於纶言亟闻警奏之传稍致贺牋之缓其为悚忭曷究敷陈

贺席参政启

光奉制书入参机政庙堂增重华夏交欣窃以君臣之义相须非贤不义安危之时靡一得士者昌经营虽本於人谋辅佐实资於天佑降神崧岳用恢复於周邦梦弼傳岩遂增光於商祚矧鸿图之中启顾亨运之有开既贤者因时而兴宜圣主不次而用某官学臻闳奥材擅经纶房乔之所长在谋陈平之有余於智高文大册雍容两禁之游激浊扬清更践六官之长上心乃眷公望攸归遂膺当宁之求亟赞秉钧之任某顷倍近着尝覲光尘侧听绪言见心期之甚远谛观符采知柄用之不迟逖闻成命之行弥极欢惊之积

贺都督吕相公启

诞扬制命宠畀戎昭远考成周分陕之规近稽东晋都督之号六师增气四海倾心恭惟某官明畧佐时雄才应运道之源而德之藪所资者深文之杰而武之英无施不可元勲烂於竹帛贵名昭於鼎彝惟中外之迭居皆将相之剧任比再躋於钧轴实增重於庙堂裴度来朝毅将咨嗟而出涕子仪入覲诡辞造膝而无嫌朝恩由是以沮谋逢吉因兹而去位一新师律载整朝纲以万民离居为忧以四郊多垒为耻灼见扶颠持危之术深陈救焚拯溺之图刘琨以逆虏未梟犹枕戈而待昧旦陶侃思中原致力乃运甕而惜分陰岂怀安以败名将驰骛而不足上心攸注民望胥同遂宣出征入辅之劳尽总尺籍伍符之衆淮陰之拜大将曾弗预於谋谟王导之秉重权亦无闻於征伐兼举二柄创见一时袞衣绣裳继姬旦东山之咏轻裘缓带同羊祜夏南之行伫期功烈之成式展经纶之素某辱知惟旧荷德实深方武节之是宣顾腐儒之安用拘縻符竹流落江湖负朱羽以临顔行慚无壮志曳长裾而陪後乘莫佐下风侧闻涣汗之传弥切摇旌之慕欣愉徒极敷叙奚周

贺知州侯修撰启

光膺宸命荣领雄藩顾惟幸会之多获托邻邦之好某官智周而材赡文丽而学优早践亨涂
蔼闻令望比显跻於柱史已深简於宸衷时乎未可有为天将降其大任暂跻论撰之职出分
藩翰之权乃眷大邦久厌羣盗潢池多警欣闻龚遂之单车错节尚坚正赖虞卿之利器涓辰
云吉布政惟新已腾载路之谣遽辱贻书之赐某尝接武旋叹分襟念出处之难期曾何加损
顾愆尤之已积不自觉知夫何谴逐之余乃沐抚存之厚永言欣忭曷既敷宣

贺枢密权端明启

伏审显膺制綽荣赞枢庭右府谈兵允赖谋猷之助岩廊图治实均辅弼之求凡预庇庥举同
欣忭某官资兼文武学贯天人智畧通於万方冲和备於四气飞英庠序列职师儒名与时而
益彰材因事而乃见当倾侧抗攘之际历艰难险阻之劳咏溪堂之诗方美扶风之政纾楚国
之难孰先令尹之忠旋临蒞於近邦遂总持於大计入殫猷告适契上心正宥密之需贤矧经
纶之在抱天寒既至松柏知其後凋猛兽在山藜藿为之不采必有折冲於樽俎之上乃能息
兵於潢池之中驯致太平益光洪烈某夙陪近着尝觐下风侧闻成命之行第极懽惊之积

贺枢密胡端明启

光膺纶制荣贰枢庭华夏聳闻搢绅胥悦窃以司马掌邦政周官尝兼以上公太尉本五兵汉
仪实次於丞相矧本朝循近古之制而右府为机密之司将相交修文武并用方时多故操纵
或预於台衡论职有常委任宜专於帷幄爰迪师中之吉式资堂上之奇某官当世名儒中朝
宿望川淳岳峙浑然器宇之存玉璞金相展也质文之备自亲逢於华旦已平步於要津离着
位者七年蹈险夷而一节小雅之什尽废周室中兴淳耀之烈未渝晋朝南渡欲扶兴运当得
伟人天子喜其来归曾是甘盘之旧邻敌畏其风采允符汉相之威应大人休否之期竭近臣
尽规之义果膺成命入赞鸿枢以道觉於斯民信伊尹之自任好善优於天下宜乐正之有为
伋膺钧轴之重权诞阐经纶之大业某支离散吏浪漫畸人叨陪正始之诸贤纵观开元之四
部秉青藜而辨蠹尝借余光对方野以沈思获窥妙算旋因漂泊絕企光尘慕鸿鹄以高翔亦
云久矣同燕雀以相贺徒有志焉

贺知秀州王直阁启

光膺宸命荣镇近藩涓时日之惟良布教条之甚穆顾兹侨寓久托部封海角遁身方希於小
隐祠廷窃禄有赖於余辉适困负薪之忧尚阻造门之谒其为欣悚岂易敷陈

贺李龙图知?州启

及瓜受代解组还朝奉计三年已闻於优最蒙休千里谅结於去思某官迪德温良赋材瓌杰
郎序之声猷夙着郡国之政事甚修衆口铄金顾何伤於明哲君子如玉终自守於坚刚将趋
文陛之严行陟近班之峻某久栖邻壤窃借余光喜瞻飞舄之归遽失卿云之?倾依徒切敷叙
奚周

吴运使启

显膺纶命荣蒞漕台凡预庇休举同欣拚窃以江西诸郡昔号富饶庐陵小邦尤称沃衍一千里之壤地秔稻连云四十万之输将舳舻蔽水朝廷倚为根本民物赖以繁昌逮更比岁之凋残无复承平之彷彿强扞者或操戈以拒吏催科虽严而难必行困穷者方接穗以供军馈饷已多而犹不足非讲火耨水耕之术宁无头会箕歛之伤傥徒峻於文移亦何裨於事实某官宏材济务厚德镇浮久践历於亨涂益发扬於雅望未摅远大之业暂分飞挽之权苏此疲瘵允资谋畧某谬膺郡寄方托使辉涓日时之良已承问俗裁尺牒之礼恭布贺诚

安抚赵枢密启

显膺宸命移镇帅藩幕府初开輿情胥悦某官谋猷经国明哲持身堂堂柱石之姿浑浑河山之气谠言正论早推台谏之声远算深图进秉枢机之任身虽屈而道不能屈时可行则义与之行起偃息於殊庭作藩垣於会府惟时南服实重两邦俯控长江相望千里山川天险有同关中河内之雄师旅云屯固异霸上棘门之衆欲恢远略允赖宗工櫓戟来临都督已隆於雅望旌旗改色临淮夙着於威名诸将禀从列城倚重某投闲得请候代少留方图千里之行敢忘一日之庇张敞守郡胸臆固已亡奇羲之去官刑政疲於简对尚依樾?终脱谴诃顾符竹之有拘造门阑而莫逮欣愉徒切敷叙奚周

提刑丁郎中启

光膺宸命荣奉使华问俗观风已竦传於清致裁刑折狱复推广於仁恩凡预庇庥同深欣忭某官材猷博敏学术深醇久践历於亨衢尚韬藏於远器暂领外台之柄即跻近着之荣顾此孤踪夙叨末契蓬山抱槩早接於俊游画省握兰继联於同舍方在谴诃之数乃居临按之中仰苏孺之天欣逢故旧辨会稽之政必赐矜全欣忭之私敷宣罔既

答馆职启

宠膺明命讐校秘文诏旨初传士伦胥庆窃以国家举久旷之典所以明试於人材修已废之官所以储养於英俊待以岁时之久须其望实之孚取而用之有可观者惟兹首选宜得异材某官文备四科学该九变韬干将而未试怀良玉以自珍落笔銛坡论治明乎大体奏篇黼展称善发乎至言果符侧席之求遂冠登瀛之举蓬山复阻叹梦寐於旧游策府载开喜典型之尚在重烦左顾兼沐长綈愧感之私敷宣罔既

谢中书舍人启

充员省闕方叨宰士之聯承乏掖垣驟玷词臣之列退惟凉薄弥切兢慚窃以内朝供奉之班莫非德选西省赞书之地尤谓才难朝廷以为美官文士号称极任循沿流弊第传三字之除厘正经常复押六曹之奏既聚五花之判益严四禁之规岂专掌於王言实兼行於吏事非文

章尔雅而训词深厚不足以润皇猷非日月献纳而朝夕论思不足以达国体必善为于辞令且明习于宪章选而用之惟其宜矣如某者襟灵至陋学业非工文采固无奇朴遯不足数早缘薄艺误玷词科滥陪英俊之游敢起滞留之叹十年流落百指困穷相良马而利必迟学御龙而技无用重遭世难偶获生全敢图漂泊之余乃有遭逢之异掌丝纶之美幸克绍於祖风习台阁之仪或未慚於寒士谓尝摄职仍免试言永惟有国以来不过数人而已某官盛德经邦元勲卫社卓荦生人之杰纵横王佐之才尊主庇民功莫高於邓禹矫情镇物衆方赖於谢安思与羣贤共持丕业遂令疎远猥预陶甄然念世荷国恩身逢时故横槊鞍马之上未効微劳寄孥號郤之间已慚远虑惟当尽节岂复谋私某敢不温习艺文收还神观辞源已涸虽乏涌泉之称典籍尚存冀免师心之诮誓坚素履图报洪钧

吉州到任谢执政启

持橐三年猥玷从臣之列分符一旦遽兴逐客之嗟仰荷陶熔已只官守伏念某行能无异艰拙有余岂妄意於功名窃自娱於文史偶缘遭遇徧历高华後省备员更献纳论思之职南宫率属乏文学政事之长鼯鼠之技既穷弩马之力亦竭欲锐进则小器不可大受欲冒处则清涂难以久妨颇宿留以怀疑思彷徨而引去忽承恩旨远畀藩垣将内讼於愆尤分宜投於闲散鳬飞鴈集本无系於公朝鸡尸牛从尚窃怀於私计念干戈之未解慨田园之已荒且图餬口於四方未能忘禄乃使佩青於千里讵可辞难惟承命之甚严几攜孥之不暇栖迟近郡候吏卒之鼎来偃薄祁寒幸道涂之无壅小邦虽云远外平日素号剧烦兵革洊侵閭閻非旧田莱荒废斗米之价未平墟落凋残比户之氓半在岂容孱陋可备藩宣虽能知命而不忧尚愧见几而必断但勤夙夜宁较锱铢某官明畧佐时英材命世伊尹圣人之耦泽被斯民周勃社稷之臣义形於主愤国威之久蹙嗟世难之未夷并建羣英大凝庶绩顾兹疲懦难备使令俾聯五阁之班出奉一麾之寄疏荣若此论报谓何敢不畏此简书先於惠养军旅之事未之学也勉企於前修言行之宜可无慎乎更防於後患

谢建康张宝文启

艰难之际赖候伯以为藩垣凋瘵之余资惠爱以绥黎庶承下车之未久闻布政之已孚某官材应时求德昭民誉遇盘根错节而别利器之用因震风凌雨而知厦屋之安逢辰洊动於干戈受任屡当於屏翰惟兹建邺实古名都方移蹕之未遑乃分符而共理枕戈励志岂後祖生之着鞭乘传谕民已闻渤海之卖剑伫聆褒诏即践禁涂欣颂之深敷言曷究

谢孙宗博惠诗启

高秋摇落见宗武始生之辰壮齿迁流当孔融过二之岁偶故人之邂逅辱佳句之揄扬感黄菊於丘园空嗟侨寓诵蓼莪於风雅永负劬劳深慙华袞之荣曷效琼琚之报笑宦游之久困知难并於甲辰念得失之相承谅有同於磨羯其为欣悚未易敷陈

与知秀州刘待制启

涓辰惟吉布政云初輿颂载扬周邦咸喜某官躬行德义世济忠嘉蚤参荷橐之荣久奉珍台之逸暂游莲幕载锡麟符将还严助於承明聊试望之於冯翊惟时阖境方困旱灾望族高华施設行观於广大疲民凋瘵抚绥尤赖於寬仁仁臻循吏之风非独寓公之幸

与提宫刘待制启

叨奉宸恩误膺郡寄获居仁者之里忽贻记室之书拜颺惟勤揆能增愧某官学探道奥德冠民彝早领袖於儒林亟翱翔於从橐暂息殊廷之逸行膺前席之咨某昔预校讐尝陪步武萍蓬千里久驰想於风猷江海一麾仁亲承於音旨永言欣幸曷既敷宣

谢平江胡待制启

光膺中诏进陟近班纶命初传輿情胥悦某官道扶皇极德冠民彝体备四气之和文漱九河之润早擢科於高妙即结绶於清华率惟兹有陈已赖甘盘之旧学在德不以大方资邓禹之远图复跻荷橐之班仁听锋车之召某为僚滋久投分实深卢毓以常士为有名第愧尸官之无补安石为苍生而再起尚期贤业之有成欣拚之私敷宣罔既

回邻郡启

叨奉宸恩误膺郡寄获托邻邦之好实为幸会之多某官材映士伦望隆朝著久屈藩垣之剧即跻台省之华善政报成赖余波之见及提封接畛亦击柝之相闻瞻咏之深敷宣罔既

回袁州赵守启

显膺宸命荣剖藩符顾惟幸会之多获托邻封之好某官材猷敏达德宇冲深卓尔宗室之英浑然清庙之器险夷备历忠孝两全尚藩宣於小邦未翊扬於远业涓辰云吉布政惟新已闻载路之谣遽辱贻书之颺提封攸届实击柝之相闻润泽所渐赖余波之见及永言欣拚曷既敷陈

回信州李守启

久陪轩陛罔着勤劳远假麾符幸寬罪戾已恪居於官守方冀阻於封圻曾修记之未遑第驰情而曷已某官材宜世用仕以学优治剧拨烦每从容於为政任重道远期康济於斯民尚分千里之忧即奉五云之对某趋风惟旧荷顾良勤比缘行役之余获预樽罍之末听笑谈於捉麈幸接清徽传翰墨於置邮益慚谦德永言感悚岂易敷陈

答朋友启

叨奉宸恩获栖琳馆再窃无功之禄徒增有腴之顏某潦倒无堪嶽崎可笑早缘薄技滥陪英

俊之游晚玷从班适在艰虞之日久投闲散复见清平方乘传於遐陬忽陷身於异域东隅已逝空眷恋於桑榆三径就荒叹凋残於松菊甘腐儒之龕朽对黄卷之圣贤问舍求田杳无涯涘从徒乘马宁敢觊觎未忘干泽之心荐有叩阍之请方虞严谴遽奉俞音靖惟朽质之无庸实愧素餐之何补某至诚与善盛德包荒早联金石之交密借吹嘘之助更纾雅思宠示长牋文采烂然宛若灵芝之三秀揄扬过矣岂惟华袞之一言感佩惟深敷宣罔既

又

礼行於郊诞布配天之泽赏延於世爰敷任子之恩凡庀职於从班悉推荣於京秩顾惟忝冒弥切兢慚早侍轩墀蔑有涓埃之补久栖湖海第从鳬鴈之羣载覲休成猥沾大賚少时辛苦力绍家声晚境忧虞遂忘世味沐恩波之洊至觉缘累之已经过诸郎而击鲜难希陆贾游名山而采药方慕尚平敢谓谦勤远垂庆问永言感佩曷究敷宣

洪舍人讲易启

德无常师尼父尝勤於问礼学不可已次公犹急於传经况聯寮案之间获奉讲磨之益微言既阐滞念顿开窃以易之为书深不可识圣人设卦强为之名洁静精微冠於五经之上广大悉备行於三极之中历伏羲文王而其道全至周公孔子而其辞具分六位而成体兼三义以无方天未丧於斯文嬴相指之为卜筮道无以兴乎世汉儒释之以蒹兹必有通人乃明妙义某官识穷系表体蹈环中潜心早慕於仲舒勤学晚同於伯业发明九事陋何晏之甚疎传授三爻笑虞翻之未悟既用其易简以游斯世又推其绪余以觉後知载扬阙里之金声复振尼山之木铎何远之有吾无隐乎某智不足以安身材不足以补过未究陰阳刚柔之理岂知吉凶悔吝之几念河图之弗传抱韦编而永叹年已迫於知命动多昧於趋时夫何忧患之余获见微彰之蘊事斯语矣亦允蹈之运斤成风虽无受至道之质望洋向若终期造大方之家过此以还未知所措

卷六

钦定四库全书

大隐集卷六 宋 李正民 撰书

与祝师龙书

某启荐辱垂访问以着述之文仆於此不敢为也久矣欲默不言虑合下之未察也仆尝谓自孔子没大道乖离百家衆技杂然并起各以所闻着书行於天下於是孟軻氏荀况氏尊孔子明王道以至於今其书尚在也汉之作者多矣传於世者相如史迁扬雄班固而止耳唐之作者多矣传於世者韩愈柳子厚李太白杜甫而止耳其余綴文之士多者百余篇少者三四十篇其人不可胜数或仅有传者而磨灭散亡百无一二存焉是可不为叹息哉宋兴巨儒硕学之流彬彬继出述作之盛布在天下自今观之家诵而人习之者欧王苏黄四家而已前辈之文行於世者已少况其小小者耶自朝廷以经术取士有司以王氏之说为权衡学者靡然从之比使诸儒各出其门则向之隐而未见者亦已出矣试取而读之亦无甚异岂非圣人之意大畧不易於此欤又观唐之诗人各以所长自名一时近世之士喜广已而造大凡有赋咏则长篇短韵欲与李杜争衡矣此所以不能立名於天下也今以仆之闲暇身安而食廩禄无饥寒迫切之忧固可以游息於此也然将留心於经术耶则经术之说已明留心於文辞耶则文辞之作已多非特无以传於今又将无以传於後非特无所成其名又适足以劳其心至於仰看屋梁用覆酱瓿则又不足道也昔顔子在陋巷簞食瓢饮终日如愚而孔子贤之黄叔度议论风旨无所传闻而见之者服深远而去疵吝岂待文辞笺注之末耶仆何足以望此而窃有志焉若乃应用之文则又浅近俳谐不足为合下道

再答书

某启前日匆遽畧布所闻性又懶於作字殊愧草率昨日蒙枉车骑重辱翰墨之贶并诘其说夫所称汉唐及本朝述作之士凡十二家非以其余为不足称也盖取其盛者言之耳且在汉则有刘向王褒董仲舒枚皋父子张衡崔駰傅毅蔡邕在唐则有王杨卢骆沈宋陈子昂李峤燕许元白皇甫湜孙樵此尤其卓犖着见於世者至於魏晋齐梁以降代不乏人列於文苑艺文传者姓氏亦班班可考本朝文物之盛度越前代则有若王黄州杨文公刘子仪李邯郸二宋兄弟曾子固以及张文潜秦少游之流载於国书传於士大夫之口者亦已衆多未可以一二数也仆窃不自料亦尝猎其英华涉其波流矣凡诸家之作或有传者或不传者或有好之者或有不好之者若夫所举十有二家之作则未有不好之者矣未有不传之者矣是犹米之有稻粱肉之有刍豢也人皆嗜之孔子登东山而小鲁登泰山而小天下孟子观水有术必观其澜盖谓是也今合下疑仆独称十有二人何其鲜也盖十有二人皆所谓杰出者然亦岂能遽掩诸家之善哉且扬雄之赋学相如作也班固之书学史迁作也韩愈之文学孟子作也本

朝诸公之文学韩愈作也然则虽举十有二家仆尚以为多而合下又以仆比之富商大贾自托於贫窶之人而求益焉仆诚无以益合下顾可以益合下者不过十有二家之书尔观其为书也汪洋浩博千变万化涉之者不见其涯涘窥之者不见其阃奥譬之如衡阳之林岱陰之麓焉伐寻抱不为之稀艺拱把不为之数又如鍾山之玉泗滨之石焉累珪璧不为之盈采浮磬不为之索亦可谓盛多矣其为富商大贾何加焉合下好学多闻喜蓄异书於此必已深探而熟观之更少加之以意则如是而权轻重如是而知取予如是而懋迁有无皆可取之而逢其原也则合下之富又将孰御凡人奇伟所闻简忽所见愿合下勿以世所共传而忽之六经之文天下所共传自古及今用之而愈无穷未闻舍此而他求也若夫圣人之术固在於躬行亦岂敢谓仆之自得哉孔子曰文莫吾犹人也躬行君子则吾未之有得又曰行有余力则以学文虽然文非学者之先务而圣人之术亦非文不传韩愈亦云仆之为古文学古人而不得见则兼通其辞通其辞者本於志也前辈述作之指大抵如此合下其裁之

与胡枢密荐孙传书

某伏见左宣义郎孙传学术博通文彩掞蔚久历州县通知世务昨来参知政事谢公及从官数人屡荐於朝值其远宦南海未有所成凡前日宰执避地广中者无不倒屣接纳并曾荐举盖其文学政事议论材智非特州县中少见其比求之朝廷亦未易多得也况传出入州下既久其所蕴蓄想枢密必深知之然其人守道安贫恬於进取或恐聪明有所不及某区区之见窃惜奇宝横弃道左而合下箱篋所储犹有空虚不满之处所以率意称述不能自已幸察

与毕少董书

某尝观欧阳公沈存中诸贤所考古权量之制皆谓比今三分之一然权衡度量一本於律故三者大畧相等轻重小大姑置不论惟尺度犹显有可疑者曹交称文王十尺汤九尺则尚未及今之中人晏子不满三尺则侏儒已甚若公孙吕面长三尺广三寸不亦狭长乎晋荀勗得古玉尺亦谓古尺皆短不知比之尺度果如何耶以公博古愿以示教

文

吉州谒庙文

庐陵为郡素号烦剧国步方艰而井邑无虞吏民安堵此实神明默有以相之也某被命行朝滥纁印绂视事之始恭谒灵祠冀神之休永庇斯土

祈晴文

干戈之际沴气未息麴麦将稔淫雨害之大惧斯民转於沟壑是用奔走有祷於神惟神扫除氛祲阳燠时若则邦用足而民食充神之为赐大矣仰祈灵贶其亟图之

又

三日为霖厥罚谅因於旷职万里同咎至诚祈感於高真辉腾阳谷之精序正勾芒之律促趋南亩可徯西成某荷至德以难名感洪恩其上报式严醮事当荐愍忱

又

天作霖雨害於来麴民既病矣吏思其忧更无他术惟神之求神之听之速於传邮挥诃风云俾往勿留乾端坤倪日驭斯周俾我麴麦或播或揉民用以饱吏职亦修酒殽虽薄以答神休

祭王无竞学士文

呜呼壽夭数也全其生者盖寡富贵天也兼而有者几希惟君少不惑於货利能力学於文辞名誉光乎朋友发策揆乎天墀宣材猷之自励与英俊而并驰稍跻荣於儒馆竟坎 而弗施洞庭之野震泽之涯泛扁舟而啸傲追渔父以同嬉酌三吴之醇酎对十樣之蛾眉擷甫里之杞菊咏笠泽之诗书邈三贤之高躅美夫子其兼之何疾恙之仓猝与一世而长违昔壬辰之赐第识夫子於京师托同年之末契亦会少而多睽通婚姻而未久观翰墨之勤斯遽成凶於不救心惨怛其犹疑嗟日月之于迈卜窀穸之有期聊摛辞於一奠望矍柳兮增悲呜呼哀哉

祭石长孺文

昔我先公宦游东越论交豪俊接武耆哲君於是时妙龄秀发瑶林琪树辉映闾閻吐辞为论下笔成章才兼终贾气压王杨时我季姑年及结褵谓君英特望族是归材与命舛场屋差池屡试兰省弗克雄飞安贫乐道涧饮崑栖覃思麟经订正是非使者论荐促对天墀谓宜得志有所设施老於一命廩食丛祠云乎不淑与世长辞顾予晚进念昔追随弁髦之岁以君为师迄於今日能诵君诗我亦老矣霜髭满颐闻君之丧曷胜其悲絮酒千里词以侑之

祭吴伯承主簿文

呜呼酒者何物也天之美禄也醞酿麴蘖腐败秬稻而後成也自尧舜三代以来君臣上下朝廷乡党无不用也冠婚丧祭会同燕乐宾客军旅待此以行也宾主百拜以为礼一饮一石以为欢沉湎淫佚由是以生也夏禹之训周公之诰诗人之刺未尝不反覆而丁宁也为殄为觴为尊为罍曰卮曰敦曰觶曰觚未尝不取物比象以为戒也自古邦君卿士荒湎於此以至败国亡家者不可胜数也若夫高人达士沉酣於此将以忘情遯世者乃可无咎也往岁见君於乌丘之戍方自放於酒终日酩酊未尝醒也刘伶忘其思虑阮籍疎於礼法甚相若也君为余言酒之德可以御寒可以逃暑饥可饱饱可饥也余饮素少过量则困虽知其利亦畏其有害也奈何君於腐肠之药未节又济以伐性之斤嬉嬉然玩弄虎狼甘嗜酖毒自以为适也逮余脱身南还咫尺之书未报而君遽病且死也壽不踰五十位不过一命盖恃强壮之甚而戕贼之遽也昔尝相约扁舟载酒笑语於农隐之上斯言犹在而志何可遂也千金之躯万金之产

莫知贵爱戢其身於一棺也茆塔之滨芑湖之汭良田千亩春耕秋获宁复省察也沟塍刻镂版籍糾纷家之子弟与纪纲之仆莫能周知也君之从弟比屋而居丧服未终君又继而长逝也男婚女嫁弗亲见之而游魂神於岱宗也清酒特炙平日所乐今弗能厌饫也余方穷居武原杜门扫轨闻君之丧不克往也鷄黍之祭蓐鲫之奠古人之岂以微薄废也侑之以文冀冥灵来享而写余之悲也

祭勤王将士文【奉圣旨撰】

王室不竞寇难荐臻主上移跸江吴席未及暖逆贼苗传刘正彦包藏祸心乘间辄发逼脇上下反易天常实赖熊罴之士不二心之臣糾合戮力克清大憝逮主上返正元恶逋逃肆命将臣追蹶其後頑凶反噬敢拒我师金鼓所临有进无却惟君等奋忠贾勇被羽先登丧其首领歿於行阵此一时同功之士所以惻怛痛悼不能自己也今既取彼鯨鯢戮於都市摠国之愤神人闔恠而旋归将士郊劳而饮至舍爵策勲之礼无不备举皆叹君等之不及见也主上当宁太息慨然有感於心已命有司録君等之孤又周恤於家非特慰君等冥漠之知抑将为天下忠义之劝酒肴具设侑以斯文魂而有灵当体天子褒功隐卒之意尚飨

鼯鼠文

甲子之夜爰有鼯鼠跳梁栋楹盘旋堂宇纵横肆行啾唧相语败裂窗纸呵叱弗去两猫熟睡弗觉弗悟鼠无忌憚自谓得所既旦而兴日升东序容光必照黜闇斯覩鼠乃狃怙故态腾越鼓舞顾视周章沿梁及础有猫在後弗顾弗虑跃而搏之如狼遇虎鼯尔之躯执於爪距杀而食之再啗再茹肝脑狼藉血流当户陇西子惊而视之曰此余骄尔之过也余既不考邠诗以熏尔于穴中又不能效张汤磔尔于堂下包容纵恣弗尔谴怒使尔跳床撼席不忧不惧一朝至此祸不可御岂吾猫虽弱昔困而睡今适遭其醒耶岂恣睢日久罪慝贯盈而天殛之耶岂啗楮裂絮以御冬寒而反丧其身耶岂乘虚履危弗避嶮巇而陷於祸机耶岂出非其时弗知昼伏夜动而自取大难耶岂见其所可欲欣慕以往而不备不虞耶噫嘻悲夫是夕之後妖孽屏除奥突阒寂縑緗罗列窗牖完密余梦既觉安坐一席静而思之再三叹息

序

训闻人氏诸子字序

嘉禾闻人茂德于余为外兄弟比过其家命子侄出拜凡七人有巾而屋者有髧而髦者有祝而童者拜揖甚恭余以是窃喜闻人氏之多良子侄也既而持正谓予曰曩者盗发青溪之岁予子与兄之子实生奉先君之训曰寇难遽作如此吾孙他日别为二名请予字之余取其义训相近者书之下方又为说以告之曰尧舜三代之民大抵皆忠厚故比屋有可封之俗以其教化明而习俗美也传曰尧舜率天下以仁而民从之诗曰周家忠厚仁及草木盖忠恕也忠厚也其本皆出於仁未有仁而不忠厚忠厚而不仁者也孔子曰臣事君以忠盖能厚於其君也又曰与人忠盖能厚於其友也是忠者必厚厚者必忠也故尧民之字曰子仁舜民之字曰

子厚其义一尔诗曰天生蒸民有物有则民之秉彝好是懿德书曰于棐民彝是天下常行之道处君臣父子之间者也故彝民之字曰子常诗曰言笑晏晏谓和柔也书之古文曰钦明文思晏晏谓宽裕也扬雄称斯民之盛曰晏也粲也则二义亦兼之矣故晏民之字曰子和余谓诸童子耳目恂达志气方锐傥能思其义而力行之则忠厚者盖为仁人长者斯不流於浮薄矣秉彝者盖为躬行君子斯不失其常心矣治人者必跻世於仁壽则斯民不失其望矣是皆古之人立身行己之大者亦在夫勉之而已然公家於嘉禾为盛族百余年间簪绅相继而未大显於时宜其洗洗之庆方兴而未艾也继此而有命名者愿以见告方泚笔以俟焉

送唐道人序

资圣寺僧茂实造佛殿成求余文纪其岁月余谢不敏阅岁中凡三四至曰已伐石于平江矣继又与唐道人来则曰此善刊字者也余亦莫知其何如人碑既成以二三名士所予诗文见示具得其本末乃叹曰吕洞宾者世皆传其得道盖尝游东都或在江湖间题诗岳阳楼而人见之者甚少也今唐生有栖神导气之术不以告人而刊字以自给非出其所得诗文余亦何自而知之而况於洞宾乎古语曰相马失之瘦相士失之贫况夫方外之士初弗求知於人而人亦莫之知可胜叹也绍兴丙寅人日大隐居士书

记

汉麒麟阁名臣图记

自昔继体守文之君欲大有为於天下必赖辅弼共济康功是以元首股肱相须一体志同道合乃克有成载之诗书不可诬已非昭扬勲德以着其感遇之荣奉承之蹟则何以为君子之劝哉汉宣帝之在御也朝廷清明海宇靖谧符瑞并贶四夷宾服甘露三年帝思股肱之美乃诏取名臣之尤者十有一人图画於麒麟阁法其形貌书其官爵姓名焉曰大司马大将军博陆侯躬秉节谊定万世策以安宗庙功德甚茂其冠羣后尊而不名曰安世宿卫忠正勤劳王家曰增寛和有守世载令闻曰充国料敌制胜奋威先零曰相严毅廉正总领衆职曰吉寛厚不伐同心辅治曰延年典司朝正练习宪章曰德宗室之良持身谨厚曰贺儒术自进列位九卿曰望之忠正不挠经术该明曰武仗节忘身不辱国命并能毗予一人勒功王室内膺心膂之寄外备爪牙之任允文允武曰勲曰庸是宜表而扬之明着中兴辅佐列於方召仲山甫焉於戏君臣相遇昔人谓难矣观夫宣帝承累世熙洽之後励精政事总核名实自丞相以下各奉职而进枢机周密品式备具上下相安莫有苟且之意考其辅佐类皆知畧材术各称其任遂致政事文学法理之士咸精其能至於技巧器械自元成间鲜能及之故得纪律赫然号称中兴然则图绘其人置诸延阁俾预其选者知褒荣之不忘望其像者知勲业之可勉一举事而衆咸知所劝顾不盛哉窃尝观先王之崇有德报有功也纪之旗常铭之钟鼎或藏在盟府或祭於大烝皆所以激劝臣下使之趋事赴功而已汉承嬴秦之後三代典籍仅有存者乃能取其意而行之是先王崇德报功之道也固宜记之文字刻诸琬琰继夫烝民崧高之作以彰任贤使能之功不其韪欤至於阁之建自萧何之营造阁之名因元狩之获麟则具在掌故斯皆畧而弗书云谨记

刻戒石铭记

绍兴二年十二月诏遣监察御史五人循行诸路检察诏令平反刑狱观风问俗宣布德意凡异时所下诏令有司奉行不?徒挂墙壁而实惠弗及於民者咸得以按治之既亲洒宸翰丁宁训飭以太宗皇帝取孟昶官箴之语书为戒石铭命使者就赐俾刻诸石以为守令座右之戒於此见上之焦劳求治忧悯元元之意甚厚臣待罪此邦躬被诏旨敢不夙夜自竭以率八邑之吏其各悉乃心共乃事以承休德庶使斯民舍刀剑而操耒耜复臻太平之盛必自兹始矣谨记

农隐记

秉耒耜衣襁褓勤劳畎亩之中者是农非隐处山林乐闲旷逍遥尘垢之外者是隐非农农皆民也劳力者也食人者也隐则有士君子焉孔子所谓举逸民天下之民归心者是也其智愚贤不肖劳逸高下固不相侔则农与隐异久矣剑川吴伯承世为大族崇宁以来始徙家於湖秀之境仕宦之余父子戮力治生於今三十年田畴益广乃筑堂於场圃之上榜以农隐开辟窗牖栽蒔松菊南荣治耕稼之务北池有鱼钓之适萧然真隐者居也一日余造其堂试持前说而问之伯承答曰三代之时人有常产故仕者不出其乡里居者不窘於衣食以顔子之贫犹有郭外之田五十亩足以给饘粥郭内之田十亩足以供丝麻又得闻夫子之道故虽不愿仕而有终身之乐陵夷至於孟子则暴君污吏慢其经界而井地不均矣於是有所为贫而仕之说秦汉以还士大夫汲汲於利禄丧其所守者十常七八如陶元亮之徒愤世嫉邪弃官而去又菽粟不足以自给至冻馁以死若是则虽隐亦何聊耶今仆幸饶於田东臯南亩尽在吾堂之左右四顾芒芒无复舟楫闐闐之扰又得意於酒遇饮辄醉春到则耕者効其力秋成则获者献其功余方独酌引满陶然自得安知农之非隐隐之非农耶予曰子之言是也然方承世赏调官选部而轻财重义矜恤宗族惟恐不及则志气倜傥宜有以自立於世又岂可安於田里而为陈元龙所羞哉顾余不材滥被荣宠坐糜稍廩而靡有补报田园芜没茫茫然而曷归乃自放於寂寞之滨攻苦食淡以其余力买田数十亩於苕霅之间而将老焉若天假之年使其不待疾病垂死而後纳禄尚能扁舟载酒相从笑语於斯堂之上其必有日矣绍兴丁巳中秋日大隐居士李某记

颂

圆象徽调阁奉安隆勳颂

臣窃惟皇帝陛下永熙治之运绍扬先烈制礼作乐百度修举朝廷清明海宇康乂乃政和纪元之六年奉安隆勳於圆象徽调阁诚治世之盛举也惟兹宝鼎实国重器自禹而降其制弗传圣上深发独智与神为谋不贰不疑自我作古而隆勳居中独为重镇管摄八方九州之气可以孚享上帝卜世卜年永永无极而内阁之建深严靖密实为神器秘藏之地於皇休哉真有宋亿万年无穷之伟观也是宜播之声诗以昭着盛德臣愚不自揆谨拜手稽首而献颂曰宋受天命维亿万世重熙累洽既安既治圣主嗣兴诞扬丕矩建法立制自我作古与神为谋

乃作宝鼎气歊浮云光吐金景惟兹隆鼎屹然中峙八方既奠九州是理上应列宿下镇地纪为国之宝自今其始龙鸾光润神物所扶陈列於外匪安匪居广内之严云阁之秘邃在西清中藏神器圆象徽调华榜昭揭层建巍峩修梁巖嶷奠厥攸居天所保之卜世卜年永永如斯於惟古初一统天地取象三才黄帝是继禹平水土贡金九牧成周之隆定於郊廓一变而九取数斯备圣人铸之孚享上帝寥寥千载人孰敢议圣不有作器焉能制置诸内阁救宁四方網緼其色炜煌其光天子万年受天之祐庆流本支泽周率土薄海内外莫敢予侮小臣作颂以继吉甫

铭

复礼斋铭

浑然一性中有觉知感物而动私欲害之约之以礼勿顺乎非能克而复顔氏庶几

务本堂铭

仁为道远行莫能至究其本原在孝与悌孝悌之性诚矣无伪廓而充之为仁甚易

尊所闻斋铭

学以致道求所未闻追省高明其德曰尊昔者大舜闻一善言若决江河行之沛然昔者子路未之能行惟恐有闻力莫之胜或异於是口耳是咨伸其占毕弗虑弗思罔知守约罔知阙疑如彼涉猎虽多奚为嗜炙遗味弃醇啜醨求马唐肆亡羊多岐宜一其志经术是师思以精之问以辩之日长月益厥修乃来以所自得发於文辞既耕必获既菑必畲充实於内辉光烂如三余靡失多材是储勤而行之终始勿渝

赋

草堂春色赋

饮君以草堂之春色侑君以海蛤之甘鲜何羨兵厨之醞宁思蚁慕之羶顾十年其久困将一麾而远守腹贮玉川之五千食厌庾郎之三九酒之醇醴兮聊以浇其胸蛤之柔脆兮聊以爽其口鄙周瑜之高困举王衍之阿堵发孤笑於羣忧俄顿足而起舞虽非仲由百榼刘伶五斗亦足以解庾信之愁慰东阳之瘦矣

卷七

钦定四库全书

大隐集卷七 宋 李正民 撰

五言古诗

程之徒

堂堂王夫子实为乡曲英十年游太学冬雪而秋萤
南宫掇异等四海驰僞声未展霄汉志忧患遽所丁
自言程之徒高论何峥嵘彬彬媚学子鼓篋称诸生
何必骛时文但贵存其诚道义苟内充爵禄必尔纓
吾师昔如斯草泽膺弓旌劝讲还英阁探颐多研精
祝李乐其说谈辨惟纵横仲子颇守常归来自穷经
一日贤诏下折桂何芳馨先生遂荐之横经阖闾城
又欲荐祝子可方古岩耕宜从布衣起知足平搀抢
贵公问其人科举颇所更答言彼材豪不肯循度程
贵公闻之笑何以取官荣推轂既未效鼓枻归洞庭
先生跻禁从仲子亦飞腾召对趋九陛一言帝心倾
亟命迁京秩训词人所惊庶可共学者品题自师评
李子独不偶沿流出舒荆游谒公卿间落寞无所成
迺来贫且病屏迹居四明自言已膏肓无以保性灵
我嗟师友义此道久凋零寄言後学者中庸当力行

寄彦章内翰

少希端木赐遇事多臆度老矣智虑衰所见颇疎畧
都将几许铁铸成一大错归来自悔咎俛仰怀愧忤
经营水云居逝将老寂寞为欠草堂资此计殊牢落
欣闻故人近铁瓮罗戟槊坐览江山胜守彼北门龠
尝观万卷书素号精且博尔雅偶未熟遂中蟊螟恶
那知谢太傅雅志在丘壑?稭连百顷场圃正收获
黄花已经霜余英犹烁烁仍携缥缈人有酒可斟酌
老拙失所望宛如鱼在涸鬼笑伯龙贫人忧顔氏乐
海濒富虾菜尚有骄藜藿妄意苕霅间数亩躬耕凿
相望幸不远鄙吝资发药扁舟泛烟波乘兴聊一噉

枯木叹

海隅有乔木枝叶多离披庇廕数亩地郁郁凌云霓
岁久渐生蠹蠹盛木乃衰朝蠹食其叶暮蠹食其枝
蠹虫日滋长食饱肌肉肥衆叶渐零落枝干亦枯萎
僵仆大道侧但存乾死皮羣蠹尽羽化鼓舞四散飞
蠹各得其所此木谁怜之吾嗟守株叟抱膝空伤悲

和元叔秋怀

陇头飞浮云山色时隐蔽曦驭转层霄渐减炎歊炽商飈折蒲苇清露泣兰蕙梁燕话归期塞
鸿怀远志畸人感物化閱世如梦寐滴堦闻雨声嚼蜡忘世味故园久离阻浩荡起归意高咏
秋兴篇安仁有佳思自怜守幽独壮怀日憔悴聊撷秋菊英衔盃玩浮世

送闻人伯封

应奉见车工杨惲逢选士古人记半面落落才一二美君眸子明洞彻无纖翳小吏曛黑来匆
匆便能识忆昔到君家经史肆论议简编讨遗忘指撷须臾至别来五六年学问益纯粹荐名
上天阊囊锥见锋鋭少年好奇伟万卷欲尽记春官方用赋所尚在词艺前人存矩矱雕篆有
深意寒窗务探讨詎可轻小技穷理尽性学推论良有自士方鹜场屋未能臻极摯山中有老
儒发药祛其蔽潜心造妙理离合见同异我怀伯业能嗜学忘肉味摩笈得异书事理了无滞
况子气方豪青萍尝一试孜孜其勉旃青霄将自致

春日城东送韩玉汝赴两浙转运以池塘生春草园柳变鸣禽为韵分得生字

野涨流水名园纷杂英旭景冠盖集清谈尊酒倾重此台省秀驾言江海行已喜怀抱粹况推
材实精衆许极高远时方藉经营詎止富中廩固将泽东氓还当本朝用不待芳岁更功名自
兹始勿叹华髮生

七言古诗

寄题史伯鱼读书堂

臧室繙经何太漫邳侯万轴新堪玩长大谁如伯业勤昼眠多似边韶慢斯堂扁榜号读书读
之百过乐有余焚膏继晷自克已彬彬学子顔之徒念我壮年游天禄万卷尽观如不足羽陵
蠹简拂蟬鱼太一青藜曾照烛辛勤白髮但尝胆燕坐茅斋犹泛览年来老眼渐昏眵每展青
编憎墨淡

今岁梅花春中犹未开因思三衢冬月之盛作长句

前年柯山芳意早肯使寒梅例枯槁溪边几树发偏繁牆角数枝看更好玉顔冒雪不奈寒香
心怯雨尤相恼南枝烂漫北枝催空惜飘零缀芳草竭来海角风景迟经冬不见端可疑红萼
涉春才似染青苞映日未全披千山隔兮万山阻想见瑶英詎如许一枝谁与寄相思回首旧
游心独苦

息交行

君不见子列御寇居郑圃四十余年人莫覩外游不若务内观食豨如人忘尔汝又不見玉川
先生洛城里闭关不出岁踰纪狂吟大句语惊人劝之请谒辄掩耳古来贤达贵安闲岂务奔

走尘埃前深居简出悔吝少治心养气精神全我念奇穷自平昔险阻艰难多所历十年京洛困虀盐五载江湖负羈勒比沐天恩处闲散琳宫赋禄容家食老僧参罢返林泉病马力疲栖阜枥扫除一室空复空收还魂魄安其躬衣冠深藏罢应接杜门却扫闲奴僮放怀书史得真乐坐忘乃与希微通不须疑我何为尔亦有文字如长虹

余君赠我以茶仆答以酒

投我以建溪北焙之新茶报君以乌程若下之醇酒茶称瑞草世所珍酒为美禄天之有碾碎龙团乳满瓯倾来竹叶香盈卣涤烦疗热气味长消忧破闷醺酣久君不见竟陵陆羽号狂生细烟小鼎亲煎烹扁舟短棹江湖上茶炉钓具常随行又不见沛国刘伶称达士捧罍衔盃忘世累无思无虑乐陶陶席地幕天聊快意欲醉则饮酒欲醒则烹茶酒狂但酩酊茶癖无咨嗟古今二者皆灵物荡涤肺腑无纷华清风明月雅相得君心自此思无邪

览新达诗卷有感

昔人作诗例苦穷今人作诗乃得通何意崩腾永嘉末复见正始之遗风杜陵太白困羈旅孟郊贾岛亦不逢圣俞不得一校理子美谪死吴山东升沈富贵何足道名声显赫摩苍穹新编起予为太息万事得失畴能同

寄邦求拟南食作

不到浙乡辜负口昔人有语真可取我住柯山三四年厌饫蕨薇几噎呕扁舟乘流来樵李极目江湖几千里白鱼市上烂如银紫螯簪头多似蚁舒鳧帖帖堕水面亦有麇鼈来近县黄闲射雉出林中田鼠化鹑毛彩绚况复海物错难名蝤蛸轮囷似斗升纷纷虾蛤不足数淡菜蚶蛎资多腥僻居海岸久寂寞寒拥红炉聊独酌笔之橙桂荐玉盘不比屠门空大嚼我念孙卿久滞留欲致数品无传邮烹羊炰羔自不恶更有负郭新良畴

寄尹叔

太湖三万六千顷中有长桥堕虹影茅屋渔舟数百家樵门打鼓官为令往来舟楫何纷纷拜揖将迎皆要人自从兵兴急供亿千枪万槩如鱼鳞又有强宗并大姓索课催租惟所命忽然平地起风波造谤兴谗喧衆听岁前官家欲移跸苇席茅茨千百室科敷比户与僧坊高下等差皆普及一时应办姑求备嘖有烦言长官罪差官密切来体量三尺深文想难避君不见海盐令尹祝夫子去年蒙恩当百里催科急迫不忍言鞭撻黎民非所喜一朝解印谢疲民至今豪强犹切齿国讐未雪兵未休安得斯民无疮痍但愿中兴功业成尽锁剑戟充耘耔

寄祝舜俞

彭泽县令五斗米陶潜轻之辞百里蜀道嶮崎九折坂王阳畏之能自免君今行事古人同要

作闲官兴非浅胡为穷腊远羈游路指太末干贤侯风霜皴肤雪扑面舟几折櫓车摧輶归来
赠我双鲤鱼尺素中藏一幅书具言劳苦自悔责乃知世事非良图苕溪春回波泛绿况有浣
田可耕斲我今亦欲赋归与便约临流结茅屋

五言律诗

早春次韵

春色方薰草南来未见鶯身闲聊适野志弱敢论兵落落松筠质欣欣桃柳情不妨联骑出蛮
榼亦携行平原齐吐麦幽谷未迁鶯王者虽无战元戎盍治兵山川羈客恨桃李故园情何处
花先发篮輿取次行乍暖先催柳余寒尚蛰鶯淮壖严斥堠江国偃戎兵得句重寻律衔杯旧
有情经营赖耆哲闲客且闲行佳人思燕燕公子眷鶯鶯酒户如悬磬诗坛未息兵林花还自
发巢鹊岂无情好泛清溪曲扁舟尽日行画梁将宿燕杨柳欲藏鶯贤杰筹前箸寰区望洗兵
悬鹑空自愧磨楯敢言情闻说山西将扬威正啓行

少游

少游词艺域文阵欲横行徐庶高朋友王家好弟兄鸾龙观笔落珠玉鬪诗成老境犹思旧忘
言看後生

夜坐

乡井千余里江湖一病身新年逢甲子清夜守庚申冷落炉中火溟蒙榻上尘永怀愁不寐惟
听漏声频

久雨不解次韵

雪後仍霖雨闲中积旅愁雷车声忽转云阵湿难收坐久频摇膝诗成苦掉头静观身世事泛
泛一虚舟易觉东阳瘦难祛庾信愁雪寒残更积雨惯落还收妄欲附骥尾终难料虎头五湖
波浪濶归泛钓鱼舟春事寒应晚旅人闲转愁空堦宵更滴远靄晓难收嗜好藏龟壳行年问
虎头孙郎多智策箭重却回舟閤闾苦贫病皂隶亦饥愁入夜声尤急连山势未收无言闲麈
尾有意念刀头独酌难成醉空乾瑶玉舟

建昌寄纸被

捣楮为衾被吁江远寄将夜寒如挟纈晨起讶凝霜雅称维摩室增辉杜老堂心平可高卧蝴蝶
梦飞扬

得平叔信

越絕羈游久相思断旅魂漂零鸿雁序憔悴鵲鵲原解绶辞岩邑全家寄屿村何时能过我诗律细重论

杂诗

海岸收残雨西风放晚晴霜林红未脱寒草綠犹生老觉光陰速闲观世累轻端忧多暇日憔悴庾兰成乔木丘园古疎篱舍屋深路随山脚转岸近海潮侵樵叟欣相遇禅房许独寻杖藜聊纵步乘兴欲投簪衰病惊残岁生涯类转蓬滔滔嬾回首默默但观空山映归云白窗留落照红地偏人迹絕彫卧短篱东放旷人间世栖迟一草堂神交传远信渔父许同行黄菊犹沾雨丹枫未陨霜午余幽梦断清磬出禅房岸帻茅檐下西郊转夕曛暮鷗低接翅寒鹄鬧鸣羣有炭胜东野无羶类广文虚名三十载外物漫浮云野岸营茅屋修篁出短篱纸窗迎暖日石砚结冰澌种菊陶元亮栽松杜拾遗田园已芜没飘泊竟何之九醞闻新熟三盃且自娛已能开杜室宁复论兵厨浮蚁盈春瓮流霞注鲁壶醉来聊欲寐不觉日还晡通宵风雨急瓮牖晓光催冷枕惊残梦寒炉聚宿灰作文无处卖觅句有时来疎嬾忘巾栉柴门且未开岁晏多风雨寒云晓更浓晚菰长乍翦香稻细新春路远思行客年荒叹老农祇园人不到惟听饭时钟汲汲谋三径区区卜一?艰难归旧隐荏苒叹流年欲设维摩榻重寻子敬羣飘零来海角华髮已盈颠久雨浑无节重云凝不收朔风吹瓮牖寒色透貂裘幸不妨农务何堪助客愁拥炉消短晷闭户但商讴

春雪次韵

寒风初淅沥密雪遽霏微冷敌鷺黄酒轻沾驼褐衣未教新柳展且伴落梅飞惟有翟廷尉门前鸟雀稀花犹吹六出气已应三微路破公车履祥呈光禄衣乍疑鹢失素稍怪鹭于飞盘瓠空惊走南方此瑞稀

再次春雪韵

旬浹寒弥急阳春暖尚微西华愁葛帔渔父点蓑衣京洛残堪望龙山度正飞麟经书大雪此瑞古今稀万壑铺平练千岩锁翠微车能翻缟带尘不化緇衣撼树桃榔满张图蛺蝶飞敲门传诗卷此曲郢中稀

挽刘刑部

西汉于张手传家旧得名金科惟尚恕棘寺每持平丹笔流余庆朱轡藹政声他年门下客接武位秋卿避地辞高密侨居寓武原放怀乐棊酒余力治田园方茂三松寿俄成万日墀九原箫鼓咽难驻已招魂

挽曾公衮宝文

靖国开皇极先公秉化钧谢庭知有子孙合遂延宾烜赫萧周上苍黄屈贾邻欲明当日事正论墨犹新际会光华旦传家各有人荣名今已矣陈迹重悲辛曷报生刍礼难留玉树春隼?空望断清泪落衣巾

挽沈伯华

望出东阳裔蝉联济美材海邦歌政化泽国早归来甲第朱门掩佳城白日开松风九原陌薤露有余哀

挽刘朝请【无虞父】

世德流芳远身兼五福全华堂优几杖蜡屐访林泉白髮光陰永青云嗣子贤佳城开吉兆松柏已苍然眉寿人生贵题舆善政闻中心如止水外物等浮云方乐千鍾养俄成万日坟欲知流庆远霏水自沄沄

挽广川先生

万卷胷中富千年笔下新广川扬素业延阁想芳尘晚陟螭坳峻俄留凤沼津遗书应满篋不愧泣麒麟

挽鍾处士

日昊身犹健居闲道更优庭栽兰九畹户种橘千头惠施曾无倦陰功祇自修荀裴门户壮他日振余休

挽綦内翰

扈跸来江表同时掌掖垣鲸波连画鷁鹿野对清樽涉世行藏异论交道义敦遽成生死隔回首泪潺湲鰲禁凝严地雍容侍北扉花砖朝直晚莲烛夜分归玉节恩虽异金瓯事已非飘零旧僚友华髮老渔矶东土游观乐西亭风景悲漫余曾躡屐空覆旧传卮高密山川隔丹邱草木滋凄凉谢道韞泣对白纱帷

挽鲁奉议

华胄流芳远平湖世载昌鲤庭遵善教龟组贲恩章劳佚身兼适悲欢念两忘平生修净业归路指西方盛大身攸致勤劳力克堪仁心兼五福庆泽在诸男经罢翻灵运人知吊老聃百年嗟已矣终始自无慙

挽胡茂老枢密

盛际符千载中朝第一人凤池鸣委佩朱邸奉重轮右府谋猷密殊邻意气伸佐时遗事业谁
为勒苍珉人物熙朝盛琼林复出羣高名题鴈塔平步上青云未应三壬兆先修万日坟丹台
应有籍脱屣谢尘氛昔日蓬山会平居笑语亲薄材陪贾马高义继雷陈南国居方卜东山道
益振遽嗟埋玉恨清泪洒衣巾

挽董舍人

华髮年方永祠廷力未愆谁云牖下死疑是醉中仙骥子持门户鱼轩泣几筵浮生真瞬息谁
与问青天

挽齐安郡夫人

懿范闺房秀齐姜素望优广川名益盛内壺德弥修寿量方难老生涯遽若浮延平双劒逝遗
恨在营丘

<集部,别集类,南宋建炎至德佑,大隐集>

卷八

钦定四库全书

大隐集卷八 宋 李正民 撰

七言律诗

元日示邦求

济时材术本无庸，长大犹存伯业功。
骐驎已消千里志，鷄鵠聊避广川风。
论都正恐讥侂父，置酒深惭及寓公。
早晚共谋归去计，烟波?棹五湖东。

示艾若讷

文章自昔为难事，词赋于今岂易工。
入室升堂方尽善，取青配白漫称雄。
师资未省逢勍敌，衡监应宜探古风。
顾我平生章句学，强谈文律愧空空。

寄汪彦章内翰

文华风采压时流，惠政春温着六州。
才向卞山归旧隐，忽寻湘水泛扁舟。
愚溪胜践今亲见，清境西偏几客游。
皐壤山林皆可乐，不须重作畔牢愁。

寄彦章内翰

翰林名德冠奎坡，暂解尘缨逸兴多。
敢谓交游同阮谢，不妨诗句敌阴何。
耳根到处闻犍鬪，心地闲来契羯磨。
此去苕溪三百里，扁舟终拟泛烟波。

访祝舜俞新居

平湖渺渺浸城隍，窈窕垂杨一径深。
千万买邻真得计，六年种竹已成林。
棊枰胜负消长日，琴韵清幽见古心。
萍泛蓬飞本无系，新亭何必苦沾襟。

送尹叔倅濠梁

淮邦井邑苦萧条，尚可观鱼访古濠。
志士揽衣辞旧隐，余民拭目看垂囊。
清传阖境持盃水，器赏名贤解佩刀。
无复高阳旧闾里，为寻故宅薤蓬蒿。
【外氏居濠故云】

赠刘无虞侍郎

粉户为郎赞冢卿十年先後典铨衡要津讵可驰高足大器於今见晚成相对樽前叹华髮宁
於纸上校虚名万钉宝带知非称欲买良田待退耕

闻吕丞相还朝

粉户为郎两见春当时曾识济川人留侯再践功名地白也今为放逐臣自笑鳬鸿飞渤澥却
慚冠劔拂埃尘数奇自是平生事终始须期入大钧

赤子潢池久弄兵暂辞台席抗蜺旌屏风隔坐方调燮檠戟前驱遽远征淮蔡已瞻裴相节秦
川犹列武侯营策勲未用膺光宠待复中原致太平

送尹叔之行朝

三年制锦在江吴游刃恢恢地有余贾谊已膺前席问嵇康新有絶交书田间雨过禾收早庭
下风来叶落初此去青云前路稳未应搔首赋归与

题海月亭

新亭注目极无边脱屣尘寰思杳然万顷秋涛翻浩渺一轮夜月对虚圆光连银汉疑无地望
断蓬萊别有天赤水枣花君莫问新诗賡唱似朱弦

章季万送示其祖内制次元叔韵诗

运际熙丰政日新近臣摛藻掞天门当年翰墨文章妙晚岁经纶德业尊纪事丰碑推大手忧
民温诏尽嘉言大门接武登螯禁犹喜交游到子孙

简刘卿任待制

暑雨霖霖朱夏寒登门暂着鵷?冠管弦岂解陪张禹葱菜真宜待井丹五技已穷甘退处一钱
不直叹衰残明朝鼓枻辞公去却向沧浪把钓竿

书事

嬾拙山林合退藏客情岁晚倍凄凉梅飘苔蘚香初歇雪积檐沟色尚粧旧历细看能几日新
诗屡和断来章何如认取安心法坐对炉熏一穗长

示侄淇

分符江左力难支窃食琳宫得禄迟淮上故园生杞棘江边大将列旌旗未知疏傅挥金日正是公孙脱粟时为报阿咸休怅望十年穷巷困朝饥

送刘子材四明幕官

雉堞连云左海傍曾攀鲸背到扶桑蒙冲声教通韩国梵刹光明记育王地接天台仙圣宅山藏奎画妙圆章时清幕府多余暇薄采江珧荐豆觴

徐元美甲第新修同诸公赋诗

大厦沈沈结绮栊诛茅新就化人宫春台乱落桃花雨北牖遥披柳叶风遁迹娱游同梓泽卜居穷僻似萧公人生适意方为乐何必簞瓢叹屡空

再赋戏元美

绵绵千载亢华宗大栋高蓂辟广宫柳径乍穿迷去路桃蹊初过面春风闲居不羡潘常侍投辖当如陈孟公竹外梅花犹可折莫教碧玉髻鬟空

秀士诗

一叶扁舟一席风梦回已听景阳钟夺袍有意趋文阵鼓篋无言拙笔锋好把犁锄傍东郭难陪衿佩集西雒只缘未富三冬学饮墨何须见愠容

退老堂

将相勋名纪太常旌旄聊驻水云乡栽培草木平泉里放浪琴书绿野堂身健未应亲几杖公归正欲望轩裳东山谢傅风流在盛事齐称左海傍

野步

步履寻春日正暄杖藜徐步小桥边身如柳惠人皆识名比韩康世漫传雪压寒梅枝嫋嫋烟笼修竹翠娟娟途穷兴尽空回首却见招提独岿然

食蛤蜊

泊水沈沙族类丰外緘顽殻力难攻虽云眉目亏天巧谁使琼瑶美内充海畔屡曾逢野士坐间那复识王融一樽风味思倾倒赖有芳鲜可荐公

次韵邦求少监

投老穷途乃叫阍再栖琳馆奉高真自怜奇蹇生华髮岂有声名继昔人
黎枣栽培功未半林泉卜筑兴方新看公稳步星辰去何必乘槎更问津

历落 崎寓海滨放怀林壑任吾真恩垂雨露沾枯槁义重金兰有故人
玉笋班聯年尚少筠筒诗律意尤新三阳交泰逢亨运策足须登要路津

和元叔冬至大风

风掀篱落尽欹倾夜半铜壶冻已生塞鴈冲寒云路杳林乌啼晓梦魂惊
贫探龙颔嗟无策愁望鹄原祇搅情拟学高斋枯淡叟不妨姓字且双行

海邑少交游相见者以为言故作此诗

结友观光少壮年一时英俊与周旋曳裾璧水三千士接武瀛洲十八贤
夜对短檠愁不寐朝餐苜蓿叹无钱如今只欲藏形影槁木寒灰学坐禅

寄雪上故人

交流苕霅转城闉尚想汀洲咏白苹择胜已居莲社界归耕恰及杏花春
雕胡映盃抄云子鱸缕堆盘破玉鳞鲑菜腥咸何足道未应回首海之滨

挽陈志行寺正

昔日陵阳接俊游松萝崇好重绸缪青衿共处披黄卷黑髮相看到白头
苕水卜邻方有志青山埋玉竟难留飘零更觉亲朋少东望新阡涕泪流

简邦求宗博

荆州清德畏人知况值中原战鼓鼙公自南来无意致我从东渡乏朱提
珍台鹤禄惭非称别乘瓜期奈久稽明日重阳菊花好且 痛饮醉如泥

寄艾若讷

宅相凋零久不振喜君文采日清新弹琴密令能官业献颂王褒迈等伦
岂有青松蟠涧谷待看驂骥絶风尘诸儒方讲升平事策足须登要路津

寄闻人茂德

诗人比兴隐而彰三百余篇妙义藏已识鸛鴒为巧妇仍知枿杜是甘棠
书生未省离城阙物

理何从见否臧闭户先生学不厌更同许郭辨毫芒

未捐辛苦读书灯老矣犹怀伯业能齐国吹竽吾独否荆山泣玉恨难胜满籛自足传儿子堆案何劳谢友朋已注虫鱼穷窈眇却游溟海看鷗鹏

寄元叔

涉世崎岖三十年栖迟琳馆祝尧天桔槔不用身谋拙梨枣先栽气守全何幸童乌新忝命应容老鹤渐归田囊金未足营三径搔首东风一慨然

寄李成德舍人【时致政归疎山】

蓬瀛当日接英游俛仰星霜十见秋红药青苔叨并命西山南浦动离愁宁论圆观情犹在且喜维摩病少休欲就书堂访高隐便疑猿鹤不相留

买舟之苕溪

二年宴坐穀溪滨廷尉门前鸟雀驯问舍求田将欲老畜鸡种黍孰为隣曾遭太仆兴谗口粗胜漳江抱病身暂泛扁舟苕霅去鰕鲈聊醉五湖春

自苕溪回棹

扁舟东下霅溪滨拟伴渔翁整钓缗黄纸红旗慙许国落花流水送残春拏舟处处争行乐修禊年年要及辰怅望故园桃李月东风吹泪漫沾巾

颐庆堂为徐氏赋

朱方玉几邈千龄落落云孙尚典刑跂翼翬飞新栋宇笔精墨妙旧丹青十旬釀酒宜为颂七水煎茶必有经积善故知颐庆远诜诜兰玉长阶庭

哭友人诗

流落生涯集百忧十年抱病甬东州忽惊白璧埋黄壤漫说朱衣驾赤虬高论难投衆人耳壮心空逐逝川流死生睽隔伤千里泪洒丛兰泣素秋

王谢门中鸾凤翔少年奇志已昂藏空余诗律知谁敌欲继家声失所望作赋曾惊祢衡俊行歌不见接輿狂临终一念归空寂讎肯修文学卜商

追忆大观丁亥年自新安侍下入宣城学路中作

朝云黯黯结秋陰叠叠层峦雾霭深农叟尽愁苗欲稿行人翻恐雨成霖四方奔走男儿事千里凄凉倦客心稍喜西风破残暑又携书劔度遥岑

县学

碧瓦鳞鳞接近郊青青衿佩得同袍欣闻庠序儒风盛不见桑榆太白高鲁国已观沂上舞汉朝应货蜀中刀献酬济济昇平事泮水从今有弁髦

送敏申赴勅局

弟兄接武上天关行色差池一岁间献纳已看腾碧落编摩宁久曳青班雨蒸梅暑兰舟稳纲解秋茶赤笔闲病鹤乘轩嗟老矣毳毳短羽恋云山

先畴戏简尹叔

樵李城东雀墓边先畴芜没仅名传南来书契今无有岁远比隣屡变迁剪叶旧疆几并沃钩璜遗业久输田莫言鸡肋难料理犹胜区区贷子钱

辞高安之行

投林倦翼漫差池揣分量材祇自知郁郁安能久居此栖栖若是欲何为文轩华毂非余望白髮苍顏叹我衰闻说风波犹未靖难於江海把旌麾

尹叔若讷和边字韵因再寄

遁迹东游沧海边全家到处寄邮传江淮李监人多厌甲乙商墟利则迁遣兴千鍾犹有酒思归一马尚无田买山拟作诛茅计难学巢由不用钱

将相驱驰正事边风声喜自道途传鰕生岂解求三捷荣路如何望九迁励志陶公朝运甓决疑平子赋归田谁人肯为将军地自笑都无直一钱

寄曹明甫

忆昔宣城接俊游回头三十六清秋少年志气青霄近老境飘零白髮羞可叹飞光如电往自怜外物等云浮何时相对一樽酒与子同消万斛愁

寄艾若讷

拟寻荒僻事田园窃食祠庭愧国恩休论鹤长鳧甚短且看齿落舌犹存陶潜昔去因多忤房

琯今知欠不言欲问大钧吾岂敢喙长三尺亦须吞

寄孙邦求

少年英气已峥嵘泮水曾传御史名白简自宜绳列位皂囊终不负家声且随郡守寻春去未向班心布武行知有弹冠贡公喜休嗟华髮镜中生

寄张子安

穀水分襟十五秋此身萍梗任飘浮久栖孤馆为真隐未访名山作胜游醉里周郎曾度曲闲中庾信祇添愁西风起我江湖兴拟把兰桡上钓舟

来往三吴二十年星星华髮已盈颠未开松菊陶潜径且泛江湖范蠡船黄石不逢宁论富丹砂可就试求仙乘闲欲访张公子共说昇平一慨然

寄元叔

湖海飘零畏甲兵敢将笔墨论功名好官未忆羊元保万户难侯李北平智短云霄曾跼足老来农圃合谋生王维荐弟虽无愧尚恐诸公厌衿衡

再寄曹明甫

忆昔陵阳寓学时登山临水共追随并游志气青云近投老光陰白髮垂顾我家无阿堵物喜君门有宁馨儿仍闻岁晚聊栖棘愿访茅斋杜拾遗

和叔食黄雀有诗求叶公书次韵

惊禽投案底微躯尚见头颅万里余敢谓苞苴犹到我偶因棠棣得逢渠身闲幸饱公孙粟地散难移薛相书闻道舍人已倾盖承明何必恋吾庐

邦求假仆制稟示诗褒拂次韵为谢

漫试词科久缀文误升禁掖掌丝纶判花旧职怀先德留草私家愧古人珍宝未能逃拙澁诏书何以变温纯相如多病辞源涸紫橐同君再拂尘

与客往天宁素饭以惠山水煎茶

精舍闲游结胜缘老来宁复嗜腥羶共分摩诘衆香饭仍试华山第二泉石鼎煎来甘有味乳花浮处色尤鲜几年泻卤伤牙颊吮漱华池便欲仙【惠山本名华山张又新以此泉为第二

】

闻人余庆见和因再赋

世路功名懒着鞭闲中乘兴便逃禅檀栾林里禽初啭阿耨池边柳正妍未怕俗情嗤北阮只愁神物戏南泉我来不为寻春色试举开遮问竺乾

次韵许希文

少年豪气压词场晚喜松筠耐雪霜但见貂裘嗟季子焉知素髮老潘郎黄公垆畔山河邈陶令门前草木长邂逅正当戎马际共惊飘泊在他乡

次韵王廷老

珥笔风謠萃此州二年坐啸政非优樽前自愧孔文举竹下欣逢王子猷九琐洞天空怅望一麾江海漫淹留归心拟借南风便万里沧波一叶舟

徐大諫道漳南与舍弟倡和次韵

天涯流落髯丝生喜见英豪一坐倾云霓微茫分岛屿风涛歘忽变陰晴幸逢胜饌开樽俎必有嘉言补圣明忧国济时公自任十年寰海困戈兵

谢公今起为苍生樽酒相看只细倾戏彩鲤庭窥丽藻披云鲸海属新晴感时华髮萧萧改致主丹心皎皎明从此灵台应偃伯共知堂上有奇兵

次韵德邵见寄

三年持橐侍君轩误剖麟符去日边暂解尘缨寻紫府愧无棠?在螺川羲之诏郡难为政邴曼辞官不待年等是飘零江海客祇应同病自相怜

次韵邦求宗博

番禺薏苡旧传名公酌贪泉志愈清绦帐有经谈训诂淮壖无地可归耕鸿飞久困孙内史龙具宁悲王仲卿琳馆素飧公自愧秋风萧飒二毛生

次元叔韵

吴越飘零一叶轻战场暂息虎狼争身闲自适琴书乐耳冷宁闻宠辱惊系表对谈通妙义禅源默契涤凡情他年更遂茅齐约重使云间见弟兄

次平叔韵

草长江南送暮春谁怜羈羽及沈鳞放怀自适渔樵乐会面欣逢手足亲
齿髮渐凋嗟晚景田园粗葺作闲人材高莫叹时相负会见诸公宠荐频

卷九

钦定四库全书

大隐集卷九 宋 李正民 撰

七言律诗

和同院蜡梅

曾笑江妃粉面光化工端为拂娇黄蜜脾旋滴明如剪宫额新涂暗有香应与玳梅分气味不同陶菊鬪轻狂捧心谁识西施病临监深颦未试粧

岭梅开过已飘扬独出奇姿浅淡黄绦萼巧粘花蘂蜜绡罗轻熨水沉香光摇烛跋连宵赏色映鹅儿殢酒狂只恐壽阳公主怪蛾眉画了不成粧

瘦骨纖肌出衆芳嘉名聊占蜜脾黄秦酥乱点寒生粟春酒初开冻发香事异代薪矜屋润巧同刻凤伴儿狂十年不见春风面依旧轻轻薄薄粧

再赋

不杂寒枝冰雪光蜜脾初点一分黄裁时巧借韩湘手到处浓薰荀令香东阁敛藏羞太白游蜂邂逅恍如狂艷阳时节闲桃李任学风流时世粧

东海生欲以酒见遗而郡禁方严仆每饮又少作诗谢之

霜凝鸳瓦晓纖纖静拥寒炉火屡添白堕春醪空有意青州从事邈难瞻幸逢朱博盃盘少况值曹公禁令严瓶汲甘泉聊漱齿夷应笑若清廉

览镜

览镜空惊鬓髮凋暮年踪迹逐渔樵如无似有梅天雨暂去还来海浦潮栗里忘忧惟浊酒锦城排闷且长謡草堂日晏犹高枕不怕当关苦见招

客有以茶易竹次韵

琅玕黝璧两清虚不比山陰鹅换书花乳试烹应有味龙孙新种未嫌疎轻身通气宜君饮冒

雪停霜称我居斜曲短长休更问森罗万象已如如

再和换竹

此君风度不可无禅老方翻贝叶书试遣酪奴相问讯为邀青士看扶踈芳香雅称松江水苍翠还宜长者居明月清风随处是去来有分意何如

和同院梅花

岁残万木冻如痴聚窟飘香起玉肌韵胜自依山谷里肤清偏称月明时且看雪後微微折只怕风前细细吹蓬岛瑶池空入梦不将清兴属芳枝

孤标无物可相宜浅浅娇黄点素肌曾向扬州动诗兴不劳杜宇啖芳时高情已与云为友冷艷仍愁雪共吹自笑刚肠如铁石难陪徐庾赋南枝

清真淡薄正相宜肯使赪容透玉肌自倚怀冰难受染何妨凌雪独先时烟迷远树依稀见风度回塘取次吹闻说江南春信早凭君折取最繁枝

和舒伯源梅花韵

极目凄迷杳霭间羣芳敛迹自知难半穿篱落涂黄浅静对溪流照影寒月地云阶偏适意雪车冰柱苦相干莫随羌笛风前舞却怕青青逼齿酸

羣芳谁与鬪时宜淡拂铅华不着肌爱静悄无蜂蝶影耐寒孤映雪霜时珑璁喜见银蟾满零落愁聽画角吹几许妍词传不尽只夸半树与横枝

叶落千林景最宜天教姑射露水肌轻明素粉初匀後浅淡娇黄半吐时青女有情来慰藉姮娥着意借嘘吹不须驿使传消息看尽南枝与北枝

檐卜花开鹜岭西何如江国见纖肌自矜六出非凡格独占三冬最晚时刻玉漫劳夸智巧镂冰那复耐风吹短墙深院凄凉甚竹外敲斜一两枝

一种幽香取次宜耻同桃杏献琼肌为嫌脂粉污真色谁道冰容不入时寒透芳心能底瘦风欺弱质等闲吹清樽何惜花前醉莫待飘零空折枝

春游

草薰风暖气潜催桃李商量次第开纂纂何须歌枣下熙熙聊复上春台田园粗足终归去轩冕无心任傥来尽道人生行乐尔勿辞频覆掌中盃

观德邵诗卷

天涯几点四明山万里沧溟去路难春晚池塘空梦草老来尘土倦弹冠文雄自可收三捷诗好那能博一官秋赋已闻丹诏下九霄寥廓看鹏抟

次韵同院晚春

病思愁肠叵奈何新诗无复苦磋磨欣闻郢客阳春曲罢唱吴侬小海歌幽径雨余芳草绿小园风静落花多融樽正好酬佳景休叹朋簪不我过

华年袞袞似江波更被闲愁暗折磨嬾逐西园飞皂盖却寻严濑听新歌春光不为干戈减花发长嗟风雨多已束轻装增别恨竹林高会阻经过

寄和叔

双鱼来自穀溪端手把缄书子细看授业马融褰绦帐怀归王粲倚危栏且凭黄耳传消息未办青蚨济急难七十从心今已过保兹遐福愿加餐

飘泊柯山二十春琴书索莫困埃尘忆攀杨柳当年别愁见桃花几度新公业有田犹告乏渊明解绶便忧贫浮生种种皆为累况是羁栖一旅人

寄尹叔

来往三吴几度春星星华髮镜中新厌餐柯岭冷毛茛急趋松江雉尾尊东海且垂任子钓西风尚畏庾公尘二千石禄惭非称未作隳官谢病人

为人踈懒自天真从宦区区本为贫尚恨有情难学道正缘无事不随人腥咸连日逢河伯击拍终宵困黍民乐静爱闲吾得计何须更问要涂津

寄毕少董

求金未有张车子梦草聊同谢客儿万里辛勤形骨瘦十年流落髣髯衰蓬蒿绕舍春归後苜蓿堆盘日上时极目五湖烟水濶扁舟重理钓鱼丝

寄元叔

十束三鍾未苦贫端居终岁谢尘氛春回苒苒生芳草日暮悠悠对碧云往事已嗟存土梗乘时争欲辨莠薰伤心极目空千里腸断稽山正忆君

寄和叔

君书於我不能忘我亦思君苦断腸女嫁儿婚方扰扰宦情文意愈茫茫病来颇厌盃中綠老去时添鬓畔霜一夜西风破残暑蛩吟四壁倍凄凉

阮公痛哭到途穷碧海相望西与东流落真同土木偶奔驰方类马牛风乌衣旧会嗟难继黄耳家书杳不通桂树连蜷猿啸苦王孙何久滞山中

木落山高断旅魂可堪云水隔烟村分甘赖有东屯稻托贈初无西瀼园淮上纷纭鼙鼓震海隅络绎羽书奔何时却得同樽酒弟劝兄酬笑语喧

半生粗粝嗣先芬肯向朝晡造业因夜鲤晨鳧那竟爽露葵霜薤自称珍烝豚未辨王武子豆粥犹慚石季伦惟有清高井居士葱蘢麦饭久酸辛

再领宫祠

流落天涯任转蓬三千窃禄愧无功身游乌?黄尘外名在丹台紫府中赖有俸钱优白傅且教闲处着司空挥毫拟就归田赋检点山资苦未丰

刘卿任尝新茶于佛舍元叔弟赋诗次韵

禁籞初尝瑞草新侯邦仍得贵余珍筠篮带雾分佳品禅榻扬烟集衆宾花乳清冷仙掌露云腴浮泛建溪春草堂睡起传佳句愧我难陪清路尘

北苑春芽鬪後先斷成圭璧任方圆泉轻火活汤宜嫩乳聚云浮色更鲜一种风流香味别几苞辐辏贵豪偏华堂饮散纖纖捧气爽神清作地仙

怀旧

遁迹渔盐远市朝回廊落叶响萧萧云迷岭岫天将雪草没汀洲海上潮欲寄新诗人杳杳重寻旧会恨迢迢暮年更欠刘龚语门翳蓬蒿转寂寥

泉守汪兄内翰惠荔子蕉乾

远使担簦到草堂泉州太守未相忘素书岂但寒暄问筐实仍分果蓏香荔子尚滋闽岭露蕉乾犹带粤林霜自怜辽鹤归飞倦咀嚼偏知气味长

和叔来谒李守值其在告作诗戲之

赤袍画戟拥朱门铃阁晨扃正谢宾京兆欲行犹案事杜陵投老尚论亲蕙帷鹤怨空寒夜名纸毛生踏路尘南郡高风非托疾未应吐哺愧前人

送元叔守建昌

论都献赋动凝旒谁料材高却滞留芸阁九乌刊蠹简霜台一鶚在清秋中年未得文章力俭岁空怀儿女忧游刃小邦真易尔且将歌吹荐觥筹

少时占毕共辛勤晚岁飘零寂寞滨未分尘埃蒙琬琰岂容蹭蹬老麒麟文因饱学多多辨诗为穷愁日日新五十专城虽不晚汉廷诏令要词臣

寄宣守内翰汪彦章

中朝旧德号儒宗凤阁鸾台揖下风梦寐升沉十年事岁寒情分两人同竹篱茅舍穷愁我红旆油幢富贵公应有澄江如练白愿凭尺素寄冥鸿

邦求示诗述其昆弟鼎臣宝臣守平江因以和之

玉昆金友播先芬两骥腾骧踵後尘琼笈继繙羣玉府麟符更镇五湖春政成比屋水霜肃庆衍高门雨露新棠棣不须刊善颂家风称述有安仁

纳凉诗

铄石流金正此时乍收羲驭霁余威屋头艷艷蟾蜍满草际荧荧熠燿飞沉李浮瓜聊自适披襟散髮欲忘归只愁玉漏频催转坐使清凉与愿违

寓居

昔年南渡苦奔波天幸惊禽脱网罗结绶怀黄真忝窃求田问舍已蹉跎烂柯山下樵苏贱樵李城边鱼蟹多萍泛蓬飘终未靖作劳聊复强悲歌

投老

投老踈慵分弃捐潜心终日玩韦编欲临南浦开三径更就东臯卜一?得意故人多厚禄入流旧吏亦登仙闲来且泛秦溪水笑把兰桡上钓船

次韵汪汝直同年

紫陌同寻上苑春升沉荣谢事难论时危重叹青毡失老去空惊白髮新共待声名继裴马更

崇风义比雷陈自慚持橐终无补拟乞麾符寂寞滨

大暑呈彦章内翰

亭午炎曦转毂迟好风时复问雄雌难为襦襦造门客正是村原渴雨时玉醴注荷湾象鼻金盃贮水渍龙皮琳宫散吏宁论此幸免文书苦见治

题蒙园

翛然风景可怡情采菊东篱晓露零天上早聯卿士月云间今见少微星映门杨柳丝垂地对岸芙蓉锦作屏拟结茅茨相近住往来二老可忘形

闻元叔移居姚江

涨海连天古县幽浮家泛宅竟何求红旗黄纸俱无预白璧明珠岂易投世路久谙聊尔宦情将老亦悠悠不须更说黄粱梦二顷良田早自谋

次韵叶舍人

宣室君王欲受厘斯民将见少休期闲中把卷空遮眼乱後操心甚累基邮置未传殷浩信筠筒先寄乐天诗壶中日月公应惜拚醉樽前十样眉

艰难险阻寄余生重奏埙篪耳屡倾静对竹陰谈近事频看山色验初晴老来渐觉忧婚嫁禄厚宁无耻圣明稍喜幽燕通使者叔孙当使郢投兵

螭坳执笔侍清光天阁峩峩耸百常便合挥毫演纶綽何劳琢句鬪琳琅峯峦对户千重碧?榷连云六月凉凤阁鸾台有虚位未容诸葛卧南阳

卜居

吴越飘零已十年侵寻緑髮变华颠身闲且运陶公甕力弱难先祖逖鞭兵火广陵无旧业沟渠樵李有新田此怀应被元龙笑更傍苕溪卜一?

别邦求

流落天涯见友生笑谈宛似旧宣城春愁黯黯浑无奈别恨绵绵谁与平胶漆久要前日契风霜不改故人情三年留滞羈怀恶且向云间跨海鲸

将之海盐留别和叔

闲官赢得自由身且逐渔盐沧海滨老去心情尤惜别乱余宗党喜相亲向平儿女催婚嫁陶令田园翳棘榛扰扰浮生须有後不应迢递为鲈蓴

国恩未报作闲人犹愧尘踪待玉宸松菊就荒徒引领山川信美独伤神杜陵衰老终辞蜀王粲登临苦忆秦行止非人难预料他年重上穀溪津

烟尘仓猝到淮东仅亢衰宗扰扰中浩气不为忧患折直辞宁与诡随同西清自愧名浮实河润深惭惠未丰白髮相看真惜别祇凭一溉养衰翁

连雨薪舫不至

大隐堂中岸角巾尚叨微禄不忧贫未论方朔一囊粟正乏支离十束薪泽国烟波偏苦雨梅天蒸润更兼旬扁舟会泛江湖去鸥鸟相随作散人

高安得请

免涉风波千里行江西道院久榛荆早知季子非忘故自笑樊生不习兵禄赋百朋恩未报门开三径计难成老来渐觉无多累遯世终期学向平

九霄飞下白云章宠假琳宫许退藏梦得固难之播水汲生安敢薄淮阳宁随鷄鶩同争食自喜芝兰保独芳苕霅西山犹好在扁舟从此钓沧浪

戲德邵

漫说灵犀一点通人生谁肯困途穷远同汉代东方朔近比江西黄仲熊休戴南金双德胜幸逢膏泽屡年丰薄田正可捐鷄肋义士于今少古鸿

戏和叔

耆年多病心未老异县久羈家益穷贻书乞米朝不饱作赋教子文尤工春风不消两鬓雪酒力尚借双腮红归来羣芳已零落苦恨鷓鴣鸣匆匆

人日和同院

层冰积雪已经旬霁色初欣日在人一岁暗添身渐老百篇赓和笔如神金花柏叶聊图醉车柳舟舫漫逐贫苦恨郊原芳意晚预期联骑去寻春

跳丸日月走虚空又见曦轮参尾中冰雪侵袭伤暖律芳菲排办待和风家无儋石犹能乐腹有诗书未是穷酒後笑谈无畔岸更将妙道问鸿蒙

玉烛初更品物新又观剪彩镂金人休嗟岁岁年年貌且送奇奇怪怪神酒有十千元自富食兼三九未全贫王孙诗笔能鏖战夜遣偏师敌富春

一三五七变而通端月駸駸气已中花胜菜羹新节物柳条桃萼旧春风诗成杜老曾悲雪文就韩公向讳穷我有乡名实不足已将贫富任空蒙

赠章生

廷尉归来解组纓门前罗雀自飞鸣已悲楚相为廉吏更愧相如擅长名十部贻书宁有补五浆先馈岂无惊朝廷不晚颁贤诏伫看鹏抟万里程

寄德邵

蹶屣担簦又徙居未能慷慨赋归与浯溪难继中兴颂西塞重寻渔父书故国山川怀望切在廷知旧记怜疎不须更论升沉事锺釜年年粟有余

闻说王门久曳裾余皇曾奉数行书柯山倥偬难为客海岸萧条且屏居侯喜不应操耒具井丹宁肯食葱菹扁舟过我非难事百结心旌待子舒

寄元叔因呈知府内翰

闻说移居向越州三生风月旧曾游秦碑古字应难读禹穴余书尚可求海螵江珧荐 醪林苞野蕨助肴羞遥知屡下陈蕃榻顾我飘零阻献酬

寄元叔

十年出处畧相同名在丹台第几重欲富未能求五牒为贫聊且受三鍾寒灰复焰慙安国穷鬼何知笑伯龙泛宅浮家苕霅上一觞一咏可从容

海上欣逢梅柳新旅怀凄惨倍伤春飘浮正类河中木聚散还同陌上尘终拟文章为世用未应富贵後时人登临况有新诗句满篋珠玑岂患贫

十日寒云不肯晴黑貂裘敝客心惊旗亭雪湿难沽酒炆竈烟消类戛羹学辩痴龙真末技文摘彩凤亦虚名山居自足三冬用老大何嫌秉烛明

卷十

钦定四库全书

大隐集卷十 宋 李正民 撰

七言律诗

和元叔再至分水韵

倦翼卑飞忆故林弟兄隔濶倍伤心神州翻作豺狼窟天堑犹防马箠侵何幸鹄原同急难宁将茅茹论升沉不须更语刘玄德始觉元龙用意深

自嘲

寥落羈栖向海隅终年局促卧蜗庐闲如白傅不饮酒穷似虞卿懒着书永夜悲凉听蟋蟀几回圆缺看蟾蜍扶摇何日乘风去独跨鲸鱼上碧虚

和元叔闻德邵省下之作

文場決勝事何如神助曾无合浦珠正论久知传木铎哇音宁使混鐔釵土风未改犹思楚射御今应复教吴白雪调高难继和坝箴歌咏古相须

和孙邦求

笔砚情亲二十年相逢直欲尽君欢短檠况味同春梦老鹤精神耐岁寒闭户每欣闻杖履衔盃屡笑倒巾冠墙头梅萼休嗟晚为恐骚人思渐阑

回首宣城一梦间黄公垆畔记前欢故交十载穷空谷得路三人到广寒韩愈应须拜东野锺仪未必困南冠平津晚佩黄金印稳步青云兴始阑

投老侵?两鬓斑十年情绪几悲欢深倾玉醕何辞醉养就金丹不畏寒鹤驭且芸崑阆草鸾台曾着鵷鷺冠少时豪气消磨尽赖有诗情偶未阑

结友何殊杵臼间旧游重话发清欢西江候月愁宵永南郭寻梅耐岁寒老笔尚凌游猎赋刚肠宜戴触邪冠鹖书屡上初无补宣室咨询待夜阑

流落天涯强自寬清樽相对漫追欢难求美玉能回暖岂有良金解辟寒放旷尚慙垂贝带招徠安敢望皮冠野梅官柳聊行乐坐见峥嵘岁已阑

再和邦求一首

曾綴枫宸供奉班异乡飘泊若为欢翟公罗雀交情见郑老无疆客坐寒稍喜羽书清紫塞欲从鞍马愧儒冠篋中未有归田赋敢谓临波意便阑

和平叔见寄

手折梅花驿使传在原鵠翼尚翩翩老来庾信多愁思归去陶潜只醉眠穷巷悄无车马迹安心久解祖师禅梦回云海遥千里春草池塘忆惠连

和邦求见寄

坐看霜霰送穷冬流落天涯类断蓬词翰难陪杜陵老沧浪聊访紫谿翁想寻芳草门庭在忆对梅花笑语同海腊腥咸难致远漫凭黄耳附书筒

和德邵

文传台阁播声名我老何庸作重轻束縕莫能还逐妇亡羊因使叹无兄初期荐牍青冥上忽泛扁舟沧海行病已好同游甫里虹桥风月待秋清

和尹叔见寄

海滨遯迹拟求安老矣尤谙世路难地远已辞龟钮印身闲仍带鹿皮冠少陵宴坐惟观壁彭泽知非欲去官鵬鷃逍遥皆自适勿疑控地笑扶抔

心似行云忆故山干戈满地欲归难愁肠索寞频浇酒病骨支离懒正冠郑太田多犹乏食阮公钱入便辞官久知身世皆如梦万事何须苦控抔

和平叔

旧结茅茨阅十春忆曾扪蝨话酸辛当年已讶霜髭老今日何辞酒盏频得僦东床人似玉颂功槐府笔挥银从今稳步青云上聊慰投闲物外人

红日新添一线催竹炉纸阁聚寒灰雨滋长亩才抽麦雪渍南枝欲放梅岁月峥嵘嗟老矣弟兄漂泊思悠哉扁舟过我消离恨肯使云帆取次回

岁晚栖栖作远游足音真可慰穷愁身闲文史聊覃思老去田园亦强谋旋拨浊醪斲冻酒何嫌粝食办晨羞新篇起我超然兴苦恨轻装不少留

示鹿苑如老

隐约平林夕照红杖藜松径叩莲宫有言未必输摩诘得句何妨示已公自静其心心合道无情于境境成空谁知覩面相看处涧水西流信已通

立春

余闰推迁岁已新青阳不待月加寅朔风卷雪寒催腊和气消冰早变春细饼堆盘随旧俗磔牛当路乐村民流光袞袞催人老心地闲来只任真

七始初华国令新芸芸品彙達于寅葭灰潜动先占候柳眼偷开早报春曾见花枝沾近侍且颁宽诏泽编民镜中鬓髮萧萧改却美松筠自葆真

次韵邢丞立春

一望东郊草色匀暄然和气物皆春发生青陆权舆始恢复皇州送喜频胜镂金花人渐老盘堆生菜味尤新赓歌共覩中兴日击壤难酬尧舜仁

书花萼集後

二李诗名播浙东二车豪迈气争雄霜台健笔凌骚雅凤沼余波入古风赋就崧高辞并美集编华萼句皆工龐眉书客遗音在白玉楼成事已空

快阁

万里长江势若倾登临仍值雨初晴前山依约云方敛远树参差晚更明禅榻静寻僧舍宿扁舟闲傍钓矶横时危满目伤心事谁把留犁再?盟

中秋对月

流年苒苒又秋中对酒何须念固穷??西风破残暑迢迢银汉泻长空一轮已见今宵满千里宁知此意同名姓旧闻题斧扆重看通籍大明宫

行县福清憇庐山院竹轩用壁间韵

伏雨阑风倦暑途傍檐踈竹暂清虚蓝田颇畏赵卿日裹饭频经乾竺居过岭黄云收?榼隔溪

烟暝点春鉏山川信美怀吾土何必临川更羡鱼

风雨

凄凄风雨卷重茅幽径荒凉杞菊凋媚学仅能延赵子言诗何遽失参寥人情狙诈真难测愁绪牛毛未易消静闭柴门谁与晤惟堪痛饮读离骚

括苍泛舟

一溪春水碧潺湲舟舻奔滩激浪喧雨洗陇苗何限绿日催林杏不胜繁峰峦环合疑无路草木蒙茸忽见村自叹经年久为客静听啼鸟更消魂

邦求置酒赏梅

短篱深院独开迟似恐芳心别有期细雨班班珠溅泪苦寒戚戚玉消肌数枝屋角争先见万点墙阴烂漫披冷艳清香能几许虚堂犹得荐瑶卮

再赋

破腊开花苦恨迟雪中辜负赏心期铅黄犹见涂娇额懒髓应难补病肌泪滴玉容空寂寞粧成半面已离披莫教点缀苍苔地要对残芳酌屈卮

赋雪

六花撩乱似飞蓬落处宁分室与宫墨突不黔非减爨秦乌变白罢盘风华颠欺我三千丈劲气输他十八公待得烛龙衔耀至冰消云卷静归空

深巷高眠路不通谁知车骑谒王宫威凌布被秋宵雨色比麻衣曹国风乱擎鴈陂思李将闲披鹤氅忆王公凄凉惟有诗人苦忍冻孤吟四壁空

和赵表之大监对雪

韬霞掩日冷云同恍惚身游银色宫善巧作花轻堕砌强名解舞漫随风四郊普覆沾丰泽万室平分荷至公兴减有时无着相观空是色色还空

瑶花飞舞下洪蒙冷落茶烟古佛宫剪水装花俱是幻开帘入隙总因风门无行迹知袁令坐拥重裘属卫公遥想净名禅榻上蒙头端坐万缘空

再赋

寒威逗晓入帘栊乱雨天花帝释宫嶢嶢易污休拥簪纷纷何似祇从风能文谁复延枚叟乘兴真宜访戴公老去映书无眼力夜阑惟喜月当空

霭霭云衢凝不通人间化出玉华宫汗漫光转方舆地淅沥声随广莫风飞絮比轻知酷似寒梅妬洁凉非公已占三白为嘉瑞愁杀贫家甑石空

对雪

朔风千里冻寒云三白呈祥副所闻洒处萧萧仍淅淅风来霭霭复雰雰模糊碧瓦俱同色挺特疎梅自出羣忽忆去年诗酒会邹枚司马尽能文

舟中值雪

百里清波一苇航茅檐灯火照渔梁寒吹褐袂风头急夜洒篷牕雪片扬乘兴去寻戴安道异书思见蔡中郎胸怀礧礧须倾倒樽酒相看气味长

酬德邵

三年絶域寄孤身啗雪吞旃踵昔人琴奏南音惟念楚鸡鸣中夜忽离秦重来泽国寻渔父免向沙场逐鴈臣好在五湖波浪濶解纓濯尽塞垣尘

送李及甫侍郎知筠州

珥笔风声播上流旧闻道院颇优游好将省闕弥纶手聊寄朝廷共理忧闔境鈎鋤知少盜他时襦袴会腾讴自惭为郡无佳政且作卢敖汗漫游

送明仲舍人知邵州

凜然气节压冰霜经岁朝绅惹御香吾道难行惊俗眼斯文将墮振颓纲他年致主千秋监此日荣亲太守章父子相仍居两省莱衣归奉冻醪觴

奉和元叔锡服

荣路回翔莫叹迟郊居连岁捧泥芝虎符已被新章绶茜绂犹循旧品仪应佩宝瓶三日宠却同显祖四明时一门丰泽知难报就日倾心比露葵

七言排律

寄和叔

踪迹飘然寄海隅往来宁复论亲疎风烟冷落渔樵市钟磬萧条释梵居卜筑拟为常侍赋干时休奉子公书泰亨乃见能连茹剥极安知不得舆蹭蹬且同栖枥马噉啍真类失波鱼男儿所患无能尔穷達终应有命与战伐干戈诛猘?急难兄弟困離渠敢忘越石思臬虜终学陶潜自荷锄婢膝奴顏焉敢比蜡言梔貌亦羞予嵇康岂肯为尸祝杨意何能荐子虚流落丹心徒许国衰迟华髮渐盈梳勿惊岁晚多怀感处顺安排乐有余

七言絕句

送艾若讷赴青田

骖鸾驾鹤上青田万壑千岩古洞天堂上弦歌真吏隐不愁淮浦有风传

春光欲动草芊芊水綠山青上濂船若使周公但茅屋雪袍宁醉楚江边

元叔易去假服戏作

几岁飘零领外祠新衔不带假银绯寻鱼不管娇痴女措大从来自綠衣

题大安驿诗大安驿距信州分水岭二十五里壁间有鲍娘题诗云鸡声哽入江南路柳暗莺残别是春因题

平生未省历瓯闽叠巘层峯困旅人珍重鲍娘诗句好江南别是一家春

两州水向岭头分入眼溪山处处新春色故应无彼此江南未必胜瓯闽

讼牒

决遣惭非朱子元纷纷讼牒拥輶轩自嗟虚忝皇华使材拙将何广上恩

余杭泛舟

漉田苒苒新苗出烟陇翛翛宿麦黄正是春晴蠶月好家家织妇采柔桑

校旧书

尘垢纷纷漫扫除可怜乾死蠹书鱼何须更待青藜照只合斋心读误书

赵表之创葺禪寂之室以名求诗

谁知至宝秘冥山费尽聪明竟转艰漫说化城为止息我今已得髻珠还【右宝所】

徧覆包容等太空乾坤都在范围中须知一点灵台地妙湛圆明未易穷【右范围】

呈赵表之大监为祥符藏基也

凡圣同居亦偶然谁知龙藏结良缘闻公旧有谈天口为借深潭五百年

木鱼

华鲸祇为催晨粥想像沧波夜不冥香饭已闻钟鼓响何须呼唤若丁宁

书河东李骧事

君既择臣臣择君胡为委贄事愚人李生若是真王佐岂向偏方遽杀身

题鹿苑寺一擊轩

本来无物可修治一击当年何所知拱手问师都不语等闲拈起布毛吹

列戟排枪几百竿森森直节逼人寒从初一击心方悟筛月吟风尽可观

题羊裘轩诗

世祖驰驱复汉家故人高卧老烟霞至今只说羊裘好拜袞谁思邓仲华

题丞厅清节轩诗

新种修篁翠叶稠鸾凰此日小迟留吟哦自是公家事我亦身闲愧食浮

扈从航海

云涛雪浪蹙天浮隐隐征帆去未休蛟蜃伏藏舟楫稳将军何用说防秋

友人来诗有纸价高之句次韵

文章小技等秋毫鄙作空令笔史劳闻道东家方给札柯藤穀楮两相高

观近报

眼看时事又更新尚对黄花笑逐臣鳬鴈去来缘底事功名真复付何人
因客话有感

女子争桑事至微两国暴骨实堪悲太行孟门岂崭絶坐觉人情尤嶮巇
破贼凯歌八章

两宫北狩未能归岁岁愁看塞鴈飞马上勤劳天子诏莫教霜霰拂龙衣
淮南千里少遗民万顷膏腴变棘榛辟地营田真上策稻粱已见满仓囷
万幕如云振鼓鼙角声呜咽马惊嘶亚夫持重惟坚壁应为桑榆太白低
闻道淮西遏贼锋捷书半夜到行宫投戈尽是三齐士不用鲸鲵志武功
签军五万立降旗虏将仓皇去莫追已出壽春三百里将军旋旆整归师
君王圣武自临戎诸将欢呼战必躬不是江头旗鼓出退师安得却成功
再岁吴门赋出车庙堂谋断两相符中兴功业休嗟晚收复关河是壮图
皇朝德泽浸寰瀛伪虏乘时敢抗衡南北生民皆赤子自然不战屈人兵
至嘉禾

溪山缭绕踰千里水陆驰驱阅五州不是江鲈胜肥羜此身那肯便东游
覽史

塞侯微巧为求名司马巧宦至九卿汲黯戇直安仁拙千载悠悠谁重轻
廷尉结鞶名愈重力士脱靴谗遽臻君子小人所怀异择地而行乃保身
司马万事只称好司空老矣三宜休处世何庸夸蹇蹇济时无术早抽头
觅松江水

啄腐吞腥聊当肉消烦止渴必资茶凭君为汲松江水活火煎来泛乳花

郑相家遇盗侨年以贫诉于朝得倅泉州

当衢甲第起青烟曾见升平富贵年一旦凄凉人事改不劳优孟戏君前

移桃栽晚发

绿叶盈条巧剪裁余花犹有两三开新来试手移桃李待向茅堂取次栽

大姓输钱诗

大姓输钱欲贍军州符县帖闇如云于今却羡锺山老用尽经纶得二分

兰溪怀和叔

山遥水濶方通婺笋嫩鱼肥已胜衢寄语长潭隐君子别来薇蕨味何殊

慈云老人

白足苍颜老行全曾随逐客海南边愿将一滴曹溪水救取城中劫火然

瓶花

折得寒梅全未开铜瓶贮水养根荄临鸾竞洗晨粧面疑是春风入户来

夜半

虚堂卧听雨如倾却讶蟾光透牖明起唤仆人犹未醒楼头挝鼓报三更

南归

沦身絕域久睽孤投老归来鬓髮疎不但高人能笑我此生安敢食鲈鱼

三年海上牧羊羣已分沙场寄旅魂满面尘埃人不识相看惟觉语音存

风霜不改旧茅茨自悔轻身触祸机丈室本来无一物犹存禅榻待翁归

黄童白叟喜相迎底事吴侬亦有情絕域归来真异事幸逢西北罢戈兵

萧萧草木映疎篱猿鹤相看似见疑大雅保身还自愧不须更诵北山移

南北飘零三十秋，乱离重到旧扬州。
田园芜没身空老，却羡如今马少游。
投老耽书未肯休，世间万绪判悠悠。
草堂盖罢浑无事，犹待翻修五凤楼。